



光緒順天府志

人物志  
先賢  
八七

ル 5  
1481  
47



門凡5  
孫卷

門凡5  
1481  
48

人物志七

先賢七

明

光緒順天府志九十七  
黃岡洪良品纂江陰繆荃孫覆輯

劉士原

王二共

劉英

甄庸

李慶

賈信

兄子琳  
榛柏

張素

李敷

李秀鼎

董子和

劉中敷

子璉  
孫機

秦亨

武周文

王騏

子復

李儀

李侃

董方

岳正

邢表

李賓

芮釗

劉聰

施聚

金純

朱驥

紀常

子誠

劉志

趙某



順天府志九十七

駱貴	李東陽	陳壯
楊塤	田景賢	歐信
燕忠	張禴	王鎧
<small>張翰 蕭選</small>	賈斌	張欽
邢昭	頓銳	安璽
楊秦	張詩	楊行中
王誥	徐珏	<small>子鎬 子世揚</small>
王儀	王佩	楊淪
<small>子緘</small>	<small>喬伊 朱乾亨</small>	馬慎
陳堯	王遴	王鈇
劉體乾	劉效祖	宗禮
<small>毛綱</small>	福時	王价
高敏學	崔鑑	王原
李松		
王時舉		

李亨廷  
王大用  
姜璧  
楊惟清

明

劉士原昌平人洪武中以才能薦舉擢潞州知州有惠政遷陝西參議累官左布政使朝覲入都止跨一蹇驢帝廉得其實稱揚不已命馳驛赴任時有天下清官劉士原之譽昌平志王二共武清人洪武時由人才授長安令民謠曰村落安堵賴有王明府畿輔唐志七十

四尋擢東平州知州歷官鳳翔府知府武清吳志

劉英寶坻人洪武中由辟舉知繁峙縣廉能守法深得民心畿輔唐志七十以抗疏言事解官去山西通志邑人爭詣闕留之上顧左右曰安有得民如此而肯為紕政者哉命還其職以愜人望後考滿改雲陽縣繁峙人至今祀之寶坻洪志

甄庸宛平人洪武時舉人才授戶部主事永樂元年陞松江知府  
政平訟簡二年降右軍都督府經歷三年擢山西道監察御史巡  
撫廣西激揚有體四年陞工部侍郎累官南京兵部尚書庸性凝  
重言若不出諸口遇事處之綽有餘裕人稱篤厚君子畿輔唐志七十四  
李慶字德孚順義人幼有異相長於兵順義黃志洪武中以國子生署  
右僉都御史明史列傳剛直不畏強禦遇事侃侃爭論人嚴憚之萬曆沈志  
五後授刑部員外郎遷紹興知府永樂元年召為刑部侍郎有幹  
局馭下甚嚴帝以為才數命治他事不得時至部然屬吏與罪人  
交通私饋餉慶輒知之繩以重法五年改左副都御史兩遭親喪  
竝起復時勳貴武臣多令子弟家人行商中鹽為官民害慶言舊  
制四品以上官員家不得與民爭利今都督蔡福等既行罰公侯  
有犯亦乞按問帝命嚴禁如制忻成伯趙彝擅殺運夫盜賣軍餉

都督譚青朱崇貪縱慶劾之皆下吏已劾都督費璫欺罔梁銘貪  
暴鎮守德州都督曹得黷貨皆被責中外懷其風采十八年進工  
部尚書尋兼領兵部事仁宗立改兵部加太子少保明史列傳大理寺  
少卿弋謙言事過激帝不懌呂震吳中及侍郎吳廷用等劾謙誣  
罔劉觀令十四道御史合糾謙明紀十一惟慶與夏原吉無所言帝尋  
悟降敕自責竝責震等震等甚愧此兩人明史列傳辨山陵事中官有  
求執不與至相詆訐不為動號為生李一統志王子皇太子謁孝陵  
居守南京慶及左諭德周述等從慶在途約束將士秋毫無所擾  
太子欲獵慶諫止明紀十一及太子還北京遂留慶南京兵部明史列傳宣  
德元年柳升征黎利命慶參贊軍務綱目三編十八許擇部曹賢能自隨  
明史列傳抵鎮夷關升意殊輕賊明紀十一時慶病甚郎中史安主事陳鏞  
亟言於慶曰柳將軍辭色皆驕驕者兵家所忌綱目三編賊或示弱以

誘我未可知也防賊設伏璽書告誡甚切公宜力言之慶强起告

升

明紀

升不爲意伏發升死明日慶亦卒軍盡沒

明史列傳

賈信字中孚永清人用季子也

案賈用元時人自有傳

元至正中師事固安

王騏有志聖賢之學凡禮樂名數星麻兵刑食貨水利之類皆熟究之性孝友父歿未葬火焚其廬信搏顙籲天火至樞所忽滅及營葬親負土石感疾良久乃瘳明初盜掠縣城信從子珍被執信挺身告賊曰此吾兄子甯執我勿苦彼也賊數聞其名欲降之縛於柱信不爲屈至夜給守者脫歸集里民爲義兵擊破賊俄官兵至悉平之官欲盡誅望誤者信走說曰貧民迫凍餒耳誅之寃矣官然其言置不問信喜談兵膂力過人善弓矢刀槊馳馬若飛又好書每事他出必以書册自隨遇佳山水輒徘徊終日善詩尤工書法宣德五年卒年七十歲兄子琳

永清周志

琳

琳字崑玉信長兄智之子也少力學工文辭洪武中以太學生授山東東昌府照磨府號煩劇而軍衛尤橫數鞭辱府中佐史前官率不能堪琳執法嚴軍衛有非理事皆抗弗從民由是賴以少安有繼母訴子不孝琳呼至前委曲開譬母子泣謝去卒以孝慈稱嘗治廨後隙地得白金二百兩會部符徵錢卽以金代民輸納建文時將軍盛庸師過東昌卒入民家取酒遂相毆擊一市盡譁琳答卒遣之卒訴琳罵將軍庸詰之琳曰卒王師民亦王民也民毆且死卒不當答耶琳雖愚何至罵將軍將軍大賢奈何私一卒撓國法庸意解爲責軍士以謝民有干富室金不應遂詣京告大姓陳氏六十人謀亂命錦衣衛千戶劉住往捕之琳廉得實謂僚屬曰朝廷命某佐是郡忍坐觀善良者橫被荼毒耶卽力白上官復令耆老四十人赴闕訴下法司鞠實論告許者如律爲治廉靜平

恕不畏強悍皆類此正統十二年卒年七十三

永清周志

鉞字廷威別號古燕琳弟瑛仲子也幼好學年少補生員比長膺力過人尤精武畧成化初縣多盜賊剽掠村落人不聊生官吏無如之何鉞身先士卒率其子六人設法擒捕獲其渠魁一十八人又用間掩捕餘眾賊黨悉平事聞於朝授本縣巡檢司巡檢遇歲飢流殍載道捐俸易米賑恤窮民與知縣共白巡撫乞疏請捐稅不可因發官帑賑之後勸富民出餘粟貸貧者爲定仔息秋稔取償不給則招糴繼之民賴以全活者不可勝計

永清周志

榛字奎亭鉞曾孫七歲就外傳日記數百言稍長通六經浸淫百家之說年十八爲生員尤精武略投軍門効力授霸州兵備道中軍守備訓練之暇投戈講藝熟察霸州形勝若防若守相視險易俱有成畫鄉練社長守望相助而形勢聯絡軍容肅然上官以是知其能有大猷從數十人如達官貴人狀假東宮龍牌自稱奉令勾檢山東公事徑過府州縣衛官吏皆不能辨厚致供張多餽儀物舟車往來少不如意呵斥鞭笞莫敢詰問適過霸州榛偵其狀疑之不爲供應使人來譁于轅榛曰此僞耳或曰如真奈何榛曰卽非僞何得遂擾吾民吾豈惜一官任此輩橫行無憚耶遣使偵之得一僧與其渠魁對奕於舟乃邀僧至訊鞫之僧亦不知龍牌眞僞但言自半途誘之使來榛以大舟誘其黨使入舟中卽率健卒數十人擒之乃知巨猾張差黨屬三十二人械繫至轅立置於法一時相傳以爲神明擢錦衣衛指揮進京師中營遊擊時內官橫行傷殘善類榛官京營不避權貴因民間訴寃抑事勾捕揚榮家奴楊光先遂誣榛與妖僧達觀通謀又誣丁酉鄉試巡視失察械送法司拷掠備至獄成交遊無敢爲顧恤者謫戍廣東死於戍

所永清  
周志

柏字嵩年榛再從弟也柏幼穎悟一覽輒能記憶由增廣生員任浙江衢州府經歷民有親在與弟訟產者柏曰訟弟不友無親不孝杖而逐之又有負金不能償至翁壻兄弟相訟者柏曰奈何以財故傷恩卽出金代償勸其敦睦有二卒盜敗舟一板前官以盜官物坐死柏曰兩卒之命抵敗舟一板耶竟得末減歲凶請上官發廩以賑始至召父老問逋稅故皆言豪戶不肯加耗並徵之細民民貧逃亡而稅額益闕柏方創爲平米之法令出耗必均又請敕諸上官頒鐵斛下諸縣爲準式革糧長之大入小出爲奸利者地僻土豪得盤聚爲姦令長至輒餌以厚賂賂入因從而把持之柏至吏白應往視陳大戶陳大戶者鉅猾也柏曰此非王民耶不來且誅之大戶恐入謁柏廉其不法事繫之獄詰朝以兩瓜及安

南石榴數枚爲饋皆黃金美珠也柏不視械送府府官受大戶賄縱之歸復致前饋柏怒欲捕之而府檄調柏他去遂解任歸絕意仕進優遊三十餘年崇禎二年卒年七十五永清  
周志

張素字文質固安人父士學隱居樂善嘗有鄉人入室竊物既見及反身藏避少頃呼其名諭之曰汝得非饑窘乎其人羞赧跪拜復與之米麥而去人稱長者素天資秀穎博學多聞少孤事母至孝母歿廬於墓側哀毀骨立時有瑞草靈鵲之應有司欲上其事力辭而止永樂己丑登胄監庚子授河南涉縣知縣洪熙初調封邱縣撫字賢勞政績顯著乞老還鄉以四樂自號士大夫咸題咏以贈卒年九十二崇祀鄉賢固安  
陳志

李敦字居學涿州人一統  
志永樂中領鄉薦入國子監以言事切直爲仁宗所知授京衛經歷尋除禮部主事累官至四川布政使涿州

吳志 數臨事剛決號令必行一統志 奸滑有犯者繩之不少貸人稱為

鐵面李正統初召拜吏部左侍郎卒涿州續志

李秀鼎大興人永樂初以國子生拜為左春坊贊善講經書深見

禮待為人博學強記當時號為書庫及致仕猶訪以時事宣德初

以輔導錄其子畿輔唐志七十四

董子和字有節灤縣人曾大父顯字繼先隱德弗耀大父成由人

材任麻城縣尹父恭湘潭縣令薛瑄董公神道碑 子和幼嗜學通經史大

義居家以孝友著侍父疾通州高志 晝夜在側衣不解帶復稽首北辰

求以身代既而父歿水漿不入口者三日幾絕復蘇葬祭如禮而

哀戚過之平日樂善好施人有死無葬具者即助之棺槨婚姻未

就者即助之財禮有假貸不能償者即焚券不復問有鬪辯不能

平者待其一言而決董公神道碑 里有牧官馬斃法當償者追呼無以

應將自盡子和貸以償之得不死遇蝗旱民不聊生量拯以粟全

活甚眾卒年五十八子昱正統七年進士歷官戶部主事員外郎

山東都轉鹽運使有惠政通州高志

劉中敷大興人初名中孚明史列傳 洪武三十二年被選守安定門中

心敵臺當年入王府辦事庚辰三月差往保定招撫人民督運糧

儲辛巳差同內官石童守通州八月東軍臨城中敷與陳珪等出

東門外截殺全勝而還功臣錄一 授陳留丞擢工部員外郎仁宗監國

命署部事賜今名遷江西右參議宣德三年遷山右參政進左布

政質直廉靜吏民懷畏歲大祲言於巡撫減賦三之二明史列傳 正統

三年官戶部尚書綱目三編九 王振初用事欲令朝臣畏已導帝用重

典御下防大臣欺蔽自是言官承振風旨屢摭大臣過失以軍官

俸糧改於京倉支給明紀十三 諷給事御史劾中敷與左侍郎吳璽等



下獄釋還職六年中敷璽及右侍郎陳瑋請以供御牛馬分牧民  
間言官劾其變亂成法下獄論斬詔荷校長安門外凡十六日而  
釋十一月瓦刺入貢詔問馬駝芻粟數不能對復下獄論斬中敷  
以母病特許歸省明年冬當決囚法司以請命璽瑋戍邊中敷俟  
母終具奏已釋為民景帝立起戶部左侍郎兼太子賓客時方用  
兵論功行賞無虛日中敷言府庫財有限宜撙節以備緩急帝嘉  
納景泰四年卒贈尚書中敷性淡泊食不重味仕宦五十餘年家  
無餘貲子璉明史列傳

璉正統十年進士授刑科給事中恥華靡居官剛果明史附傳時北  
虜入寇以才幹選喜峯口記功有鞍馬文幣之賜後陞光祿寺卿

改遼東苑馬卿卒於官子機萬曆志機字世衡萬曆志幼有孝行明史附傳為諸生時畿郡有鷹神乃一獵

鷹也一日飛止公宅奴以糍飼之偶不潔鷹攫其奴若懲之者居

數日呼公名語曰劉機大貴人他日當坐八人轎至南京語已飛

去機後舉進士涉異志為翰林修撰武宗出閣充講讀官出入三朝

多所裨益萬曆志正德中代張綏為吏部尚書以人言乞歸起南

京兵部尚書參贊機務明史附傳劉六等走湖廣劉七齊彥名帥五百

人舟行自黃州順流抵鎮江南京諸司議擇將適都督李昂自貴

州罷官至機即召任之昂以無朝命辭機曰機奉敕有云敕所不

載聽便宜此即朝命也眾服其膽識明紀致仕歸卒明史附傳工部

治瑩禮部諭祭者四鄉人榮之機從姪焯字彥光以鄉薦入內閣

秘書從事歷儀部侍經筵恩眷甚厚尋擢參議卒萬曆志

秦亨字子真順天人畿輔唐志究性理之學通五經尤長於易北

五編永樂初以易學見知於文皇帝召至京師欲處以顯職力辭就

教乃除荏平教諭遷永甯府教授唐志所至訓迪有方北學編五弟子

多有成就已而從尚書黃福征交趾唐志既郡縣其地於是編氓

籍定賦稅興學校置官師數召父老宣諭德意一切鎮之以靜上

下帖然明史黃福傳多贊畫功乞休歸北學編五學者猶質問經史正統間

疾卒唐志郡守李瓚觀其遺文知學有本原舉以配祀劉忠定祠

北學編五案畿輔唐志儒學門以先生為順天人而北學編

既載先生為大名郡庠生又注引唐志作順天人今從唐志

武周文大興人洪武末以明經入侍燕邸永樂初召為侍講學士

上嘗謂胡廣曰朕在藩邸喜觀易時官僚亦有通曉者不如武周

文言之切實次日周文入謝遂以老乞休畿輔唐志七十八

王騏字秉良號存齋固安人少負奇畧遠謀於經史子傳博覽強

記尤專意詩禮學為文章春容平實不尚藻飾而氣概橫出乎辭

語間補弟子員適永樂初以鄰縣生備城守事定授永清縣主簿

尋調山東蒲臺縣丁憂民吏感惠不忘詣闕保留會有詔求賢騏

膺薦擢北京行部工曹主事居官廉介不阿為權貴所嫉左遷河

南舞陽知縣縣多盜標掠村落民不聊生官吏亦被戕害騏設法

捕禁獲其渠魁誅之餘悉喻以禍福縱去歲饑捐俸賑恤全活甚

眾又以賦稅遠輸為患請折布花之半以供官民至今告便考滿

入京仁宗監國詔諮民隱騏手疏條陳利害數事獲賜馳驛還任

尤留意學校考課諸生日加月益解任之日行李蕭然縣人懷其

德走白當道乞留撫字朝廷嘉其能陞裕州同知仍掌縣事耄倪

歡騰如獲珍璧年五十卒子復固安陳志

復字初陽一統志天性寬厚沈靜寡言三歲喪母及長事繼母以孝

聞為文冲淡善於講解同列謂之王訓詁固安陳志正統七年進士授

刑科給事中陞通政使司左參議景泰初也先擁英宗入關邀大

臣迎駕眾憚行復奮然請往乃遷右通政假禮部侍郎與中書舍人趙榮

明史列傳齋捧勅書以行至德勝門外得仰瞻御容頓首拜泣

固安志進羊酒諸物明紀也先怒令左右持刃迫脅

陳志復等不為懼還仍泄通政事再遷通政使天順中歷兵部右侍郎成化元年

延綏總兵官房能奏追河套部眾有旨獎勞復以七百里趨戰非宜且恐以僥倖啟釁請赦戒諭帝是之進尚書錦衣千戶陳珏者

本畫工及卒從子錫請襲百戶復言襲雖先帝命非軍功宜勿許

遂止明史列傳二年六月毛里孩大入延綏明紀命復出視陝西邊備

自延綏抵甘肅言延綏東起黃河岸西至定邊營接甯夏花馬池

縈紆二千餘里險隘俱在內地而境外乃無屏障止憑墩臺以守

軍反居內民願居外敵一入境官軍未行民遭掠已盡矣又西南抵慶陽相去五百餘里寇至民猶不知其迤北墩墩率皆曠遠非

禦邊長策請移府谷響水等十九堡置近邊要地而自安邊營接

慶陽自定邊營接環州每二十里築墩臺一計凡三十有四隨形

勢為溝牆庶息響相聞易於守禦又言甯夏中路靈州以南本無

亭燧東西二路營堡遠絕聲聞不屬致敵每深入亦請建置墩臺

如延綏計為臺五十有八又言甘肅永昌西甯鎮番莊浪俱有險

可守惟涼州四際平曠敵最易入又水草便利輒經年宿留遠調

援軍兵疲銳挫急何能濟請於肅州五衛內各分一千戶所置涼

州中衛給之印信其五所軍伍則以五衛餘丁選補且耕且練斯

戰守有資兵威自振又言洪武間建東勝衛其西路直達甯夏皆

列烽堠自永樂初北寇遠遁因移軍延綏棄河不守誠使兵強糧

足仍準祖制據守黃河萬全計也今河套未靖豈能遽復然亦宜

因時損益延綏將校視他鎮為少調遣不足請增置參將二人統

軍九千使駐要地互相接實今日急務奏上皆從之復在邊建置多合機宜及還朝言者謂治兵非復所長特命白圭代之改復工部謹守法度聲名逾兵部時中官請修皇城西北迴廊復議緩其役中官領騰驤四衛軍者請給胖襖鞋袴復執不可曰朝廷制此本給征行之士使得刻日戒途無勞縫紉京軍則歲給冬衣布棉此成憲也奈何渝之十四年加太子太保復好古嗜學守廉約與人無城府當官職識大體居工部十二年會災異言官言其衰老乞休不許居二月汪直諷言官更劾復乃傳旨竝令致仕歸久之卒贈太子太保諡莊簡

明史列傳

李儀涿州人

一統志

永樂間以薦舉授戶部主事宣宗既平高煦儀請削趙王護衛帝不聽既而言者益眾帝封其詞遣使諭王如儀指王即獻護衛趙卒無事儀尋出知九江府有惠政英宗即位之

歲始設諸邊巡撫僉都御史丁璿方督大同宣府軍儲而儀以右

僉都御史巡撫其地盛有所建置

明史列傳

軍民相安權貴皆為斂避

涿州吳志

明年請以大同東西二路分責於總兵官羅文方政從之

列傳阿台朵兒只伯屢寇甘涼邊將告急時朝議將出大兵擊阿台

等儀言四裔為患自古有之在備禦有方耳和甯殘部窮無所歸

乍臣乍叛小為邊寇邊將謹待之將自遁何必窮兵不納大同督

糧參政劉璉不職儀劾之璉乃誣儀淫亂事會參將石亨欲奏鎮

守中官郭敬罪先咨儀儀誤封緘咨牒於核饒主事文卷中戶部

以聞亨敬遂互相奏許詔儀璉自陳而切責敬等儀自負其直詞

頗激二月被劾下獄瘐死

明紀

十三儀居官廉謹邊人素德儀建昭德

祠以祀

明史列傳

李侃字希正東安人

一統志

曾祖士瞻元翰林學士承旨嘗使閩適

海酋據城王師攻之不下士瞻喻以禍福酋遂出降闖人立祠祀之祖繼本登進士持身端潔樂育人才河朔學者多師事之著有

一山集時號一山先生東安李志侃正統七年進士授戶科給事中景

帝監國陳簡將才募民壯用戰車三事明史列傳也先逼紫荆關京師

戒嚴明紀十四議者欲焚城外馬草侃言敵輕剽無持久心乞勿焚免

復斂為民累皆報許時父母在容城侃曉夜悲泣乞假冒險迎之

景泰初議錄扈從死事諸臣後侃因言避難偷生者宜嚴譴以勵

臣節上皇將還明史列傳禮部具迎奉儀上傳旨以一轎二馬迎於居

庸明紀十五侃與同官劉福等明史列傳言奉迎禮太薄帝報曰朕尊大兄

為太上皇帝尊禮無加矣顧云太薄其意何居明紀十五尚書胡濙為

解乃已再遷都給事中軍興減天下學校師儒俸廩侃奏復之戶

部尚書金濂違詔徵租明史列傳學士江淵以告帝詰責戶部金濂內

慚抵言無有侃等請詰天下有司違詔故濂恐事敗乃言銀布絲

帛詔書未載若概減免國用何資帝欲宥之侃與御史王允上殿

力爭遂下都察院獄明紀十五石亨從子彪侵民業侃請置重典并嚴

禁勳戚中官不得豪奪細民有司隱者同罪帝宥亨彪餘如其請

廷議易儲明史列傳會議者九十一人明紀十五眾相顧莫敢發言通鑑輯覽一百

四侃泣言東宮無失德時議壯之擢詹事府丞天順元年改太常

丞進太僕卿明史列傳二年夏四月復設巡撫官遷侃撫山西明紀十七奏

言塞北之地與窮荒無異非生長其間者未有能甯居而狎敵者

也今南人戍西北邊怯風寒聞寇股栗而北人戍南亦不耐暑多

潛逃宜令南北清勾之軍各就本土補伍人情交便戎備得修時

不能用奏發巡按李傑罪傑亦許侃按傑事有驗除名侃無贓罪

獲宥六年考察屬吏奏罷布政使王允李正芳以下百六十人因

言諸臣年與臣若不堪任事者臣悉退之臣亦當罷詔不許侃性

剛方力振風紀貪墨者屏跡其年冬以母喪歸軍民擁泣至不得

行服除遂不出家居十餘年卒侃事親孝明史列傳母晚年喪明每退

朝必論說史傳以悅其心墓誌好學安貧歿幾不能殮二子德恢德

仁皆進士一統志德恢嚴州知府德仁河東鹽運使明史列傳

董方字仲矩通州漷縣人畿輔唐志七十一正統十年進士試政兵部旋

以父憂歸服闋通州高志授大理評事以蕭維楨薦遷寺正畿輔唐志用法

平恕克雪冤抑有巨室被盜東阿民蔣傑與盜遇并報之訥弗能

辨不勝拷掠遂誣服周洪謨刑部尙書董公墓誌銘方訊實釋之通州高志錦衣旗軍

鐵堅與百戶薛海鬪傷腦奪銀簪官擬白晝奪財傷人者死方謂

死起忿爭非造意攘奪從輕典金吾衛卒領大內官銅出道中竊

銅板尺餘覘卒執之有司擬以盜庫物律斬方謂物既領出非潛

入內庫盜者宜論監臨自盜墓誌銘得減死景泰間奉命往山西錄

囚太原民白政讐殺王選投尸汾河事覺政誣選妻與己私同謀

殺夫獄成方謂彼為夫婦三十餘年生子十數人何至是盡拘鄰

里證驗政具服選妻得釋羅禮妻被盜殺有司誣劉達夫婦害之

俱應死方白其冤後知殺人者達壻也其餘活死罪可矜疑者若

千人通州高志事竣還朝建言十事皆允納天順丁丑陞右寺丞墓誌銘

曹欽謀逆趣軍士救護賊平擢本寺右少卿畿輔唐志成化乙酉遷刑

部右侍郎丙戌持節詣楚藩行冊封禮癸巳秋進秩都察院右都

御史巡撫大同大同久不雨墓誌銘方至祈雨輒應河南軍戍大同

者多餓民居方構營房若干眾論稱便戰馬斃者以千數為區畫

買補逾月遂足以老乞休越六年卒年六十八贈太子少保諡襄

毅方好學通州高志手不釋卷有詩文集寺丞劉翰為編讞獄錄學士

劉定之序之以行

墓誌

子甯由進士官按察僉事

通州高志

岳正字季方溇縣人

一統志

別號蒙泉學者稱為蒙泉先生

懷麓堂集十一

正統十一年會試第一賜進士及第授編修進左贊善高自期許

氣屹屹不能下一人

明史列傳

嘗閉戶夜草疏請復恭讓后位號其伯

兄端俯樓隙窺之驚曰奈老母何取其草裂之乃止

懷麓堂集

天順初

改修撰閣臣徐有貞李賢下獄帝既用呂原預政頃之薛瑄又致

仕帝謀代者

明史列傳

尚書王翱以正薦帝亦素知正名召對文華殿

正長身美鬚髯帝遙見色喜既登陸連稱善問年幾何家安在何

年進士正具以對復大喜曰爾年正強仕吾北人又朕所取士今

用爾內閣

通鑑輯覽一百五十一

正頓首受命趨出石亨張軌遇之左順門愕

然曰何自至此比入帝曰朕今日自擇一閣臣問為誰帝曰岳正

兩人陽賀帝曰但官小耳當與吏部左侍郎兼學士兩人曰陛下

既得人俟稱職加秩未晚帝默然遂命正以原官入閣正素豪邁

負氣敢言及為帝所拔擢益感激思自效便殿論奏至唾濺帝衣

有規以信而後諫者慨然曰上顧我厚懼無以報稱子乃以諫官

處我乎

明史列傳

湯序嘗奏災異請盡去奸臣帝問正正言奸臣無指

名即求之人人自危且序術淺何足信也有僧為妖言錦衣校邏

得之坐以謀反中官牛玉請官邏者正言事得實不過坐妖言律

邏者給賞而已不宜與官僧黨數十人皆得免

明紀十七

或為匿名書

列曹吉祥罪狀吉祥怒請出榜購之帝令撰榜格正與呂原入見

曰為政有體盜賊責兵部奸宄責法司豈有天子自出榜購募者

且事緩之則自露急之則愈匿帝是其言遂不究石彪鎮大同遣

使獻捷下內閣問狀使者言捕斬無算不能悉致皆梟林木間正

按地圖詰之曰此地皆沙漠汝梟何所其人語塞時亨吉祥恣甚

正言於帝二人權太重恐久不可制請以計間之帝曰卽可以朕  
意告二人通鑑輯覽一百五正出見吉祥曰忠國公常令杜清來此何爲

者吉祥曰辱石公愛致誠款耳正曰不然彼使何公所爲耳因勸

吉祥辭兵柄復詣亨諭令自戢明史列傳且云上使我告公如此二人

揣知上意因詣帝前免冠請死帝內愧慰諭之而責正漏言正對

曰臣觀二家必以謀叛滅臣欲全上恩故令早自爲計耳二人聞

益怒通鑑輯覽一百五會承天門災正極言亨將爲不軌且言陳汝言盧

彬小人狀時徐有貞再下獄復云用有貞則天變可弭帝皆不納

命正草責躬詔通州高志正草赦曰乃者承天門災朕心震驚罔知所

措意敬天事神有未盡歟祖宗成憲有不遵歟善惡不分用舍乖

歟曲直不辨刑獄冤歟征調多方軍旅勞歟賞賚無度府庫虛歟

請謁不息官爵濫歟賄賂公行政事廢歟朋奸欺罔附權勢歟羣

吏弄法擅威福歟征斂徭役太重而閭閻靡甯歟讒譖奔競之徒

倖進而忠言正士不用歟抑有司闖葺酷暴貪冒無厭而致軍民

不得其所歟此皆傷和致災之由而朕有所未明也今朕省愆思

咎怵惕是存爾羣臣休戚惟均其洗心改過無蹈前非當行者直

言無隱敕下舉朝傳誦明史列傳曹石相謂言姦邪蒙蔽不謂我曹抑

不謂徐有貞乎譖於上野記謂正賣直謗訕帝怒仍授內侍書明

日謫欽州同知明史列傳旣行道鄴以母老留家月餘復爲尙書陳汝

言所劾逮繫詔獄通鑑輯覽一百五杖百戍肅州至涿州夜宿傳舍手楮

急氣奔且死涿人楊四者頗尙意氣爲祈哀解人其人怒不肯楊

醉以醇酒伺其酣睡謂正曰楛有封印奈何正曰可燒鑿令熱以

酒將紙就炙之紙得酒皆昂起因去釘脫楛剗其中復釘封之其

人覺有異楊說之曰業已然矣今奉銀數十兩不如納之懷麓堂集乃



得至戍所明史列傳時太監猛虎石鎮甘肅傳有密諭須生不須死鎮

巡而下亦雅重之致客禮焉懷麓堂集英宗亦悉其忠嘗念之曰岳正

倒好只是大膽正聞自為像贊述帝前語末言臣嘗聞古人之言

蓋將之死而靡憾也明史列傳越四五年曹石俱以不軌敗懷麓堂集帝謂

李賢曰岳正固嘗言之賢曰正有老母得放歸田里幸甚乃釋為

民憲宗立以原官直經筵纂修英宗實錄初正得罪明史列傳室廬財

產盡賜指揮季鐸鐸得旨自往據岳門檢括淨盡家人出門一一

搜驗奇辱特甚岳還適鐸得罪上曰季鐸家產盡是岳正物可悉

取還之岳乃亦往據鐸門搜括如鐸岳為儒臣貴無幾何鐸素積

不貲皆歸於岳野記尋被譖畿輔唐志又以忤大學士李賢出為

興化府知府至宮築隄溉田數千頃節縮浮費經理預備倉欲有

所興革鄉士大夫不利其所為騰謗言正亦厭吏職五年入覲遂

致仕又五年卒年五十五正博學能文章明史列傳於書無所不讀其

為文高簡峻拔追古作者詩亦雅健脫俗字法精邃大書尤偉旁

及雕繪鐫刻悉臻其妙晚好皇極書懷麓堂集所著有類博稿十卷嘉

靖中追贈太常寺卿諡文肅明史列傳建祠祀之通州高志

邢表字居正文安人畿輔唐志博通經史尤精理學嘗曰中庸一

書聖賢關鍵唯我能尋著景泰丁丑成進士彭韶邢拙庵傳授獲嘉縣知

縣治行最擢彰德知府畿輔唐志適衡水民王澤為校尉馬成誘至安

陽殺澤竊其妻以逃澤甦赴愬於表捕之不得具疏城隍數日成

携其竊婦出首人咸以為神彭傳因疏論趙藩驕橫調知衛輝並有

善政畿輔唐志時久旱瘟疫大行醮以禳之俄頃雨大如注次年水災

奏免六郡稅糧陞山東左參政轉右布政使調四川左布政使彭傳

歲災大發廩賑貸全活無算茶課逋者三百餘萬斤表請每斤徵

銀一分充松潘餉從之唐志晉都察院右副都御史巡撫四川上言川事之壞土司驕縱淫佚苗情難束以漢法而貪帥好激變以邀功名以故竊發易創也率縱之使橫卽大創亦易舉也率弛之使蔓蓋不蔓無以糜大官之錢不橫無以爲封拜之地此西南諸蠻所以易戢而難靖者自昔皆然表請簡壯勇正首惡安反側置戍建堡使蠶叢鳥道之鄉悉遵道遵路而不敢依林箐爲伏戎之莽恃巉巖爲升高之陵又思大荒之後繼以大兵民艱乃食亂是用長非屯田無以計久遠但屯法之不行皆緣歲有豐歉租惟一制請與軍民約課耕不課稅俾沿邊閑地聽其儘力開墾粟旣充則價自賤以銀易粟邊儲庶不憂匱乏奏可凡兩年得羨糧數萬石撫蜀四年建昌之役戎服臨陣者八越月致疽發於背卒家無餘資軍民號泣爲之罷市賜諭祭葬祀四川名宦彭傳

李賓字廷用順義人正統進士授浙江道御史己巳邊警募兵萬餘軍威遙震虜遁去陞副都御史提督永平山海諸軍興屯田之利兵民交賴英廟復辟召爲大理卿時刑獄嚴刻賓疏古失刑數事直言不諱朝論避之辛巳秋曹欽謀不軌唐志攻東西長安門縱火明紀賓率家人擊之撲滅長安門火唐志天順八年官左都御史剛簡鎮默以伉直著名指揮僉事門達綱目知東宮局丞王綸必柄用預爲結納無何憲宗嗣位綸敗達坐調貴州都勻衛帶俸差操甫行言官交章論其罪明史賓疏言達恃恩藐法玩弄威權文網苛細大獄屢興假託上旨恣逞貪殘官校驛騷子弟奸比罪浮於謫譴當正國法於是逮繫坐斬籍其家達廷訊時負固強辨至賓前曰公宜訊我遂引服綱目三歷陞南京兵部尚書令有司設常平倉平江洋鹽盜唐志南畿仍歲大饑賓請令

南畿浙江江西福建諸生及官員軍民子孫納粟送監姚夔言太  
學乃育才之地近者直省起送四十歲生員及納草納馬者動以  
萬計不勝其濫且使天下以貨為賢士風日陋請罷其議報可明紀

賓乞歸不從進太子少保卒畿輔唐志諡襄敏萬曆沈志

芮釗字宗遠寶坻人畿輔唐志正統進士由御史歷江西副使遷

陝西布政使所在皆有政聲寶坻洪志以右副都御史巡撫甘肅訓練

卒伍謹斥埃廣蓄積鎮守三年邊鎮宴然畿輔唐志會母喪朝廷重邊

計特遣官營葬詔還鎮時寇入涼州莊浪諸處釗分兵進剿所向

克捷寇出沒幾一載而城守無虞居民不致流散者釗之力也既

勞於王事又痛不得終喪竟卒于官寶坻洪志貧不能殮人服其清操

云畿輔唐志有友人毛欽病革以後事託聰

劉聰字守愚薊州衛人畿輔唐志七十四

聰為之舉二喪婚嫁其子女凡故舊告急無不周之官兵科給事

中時稱兵科為錢窖聰獨持風力請託不行上章勸孝宗早視朝

以勤政事止傳奉以抑奔競皆嘉納之陞湖廣參政承勘南渭王

長子獄論死者五人聰廉其誣悉釋之竟抵王長子罪遷山東布

政使薊州沈志擢右副都御史巡撫宣府畿輔唐志留心邊務境內肅清既

而致政歸歿於家祀鄉賢祠薊州沈志

施聚其先沙漠人居順天通州一統志父忠為金吾衛指揮使從成

祖北征陣亡聚嗣職通州高志以勇敢稱明史巫凱傳從北征至得勝口擒

可可帖木兒一統志累擢都指揮同知宣德中備寇遼東以曹義薦

進都指揮使通州高志義與兀良哈戰聚皆從之也先逼京師景帝詔

聚與焦禮俱入衛聚慟哭即日引兵西部下進牛酒聚揮之日天

子安在吾屬何心饗此明史巫凱傳比至寇已退乃還歷官至左都督

通州志 充右副總兵一統志 天順元年封懷柔伯食祿千一百石明年

以守邊久與世券聚智勇樸直與士卒同甘苦在遼東訓練有法

增繕障塞興修儒教軍民悅服卒謚威靖四傳至瑾吏部言不當

復襲世宗特許之通州志 傳爵至明亡明史巫凱傳

金純字文明平谷人景泰進士通州志 除南京刑部主事陞郎

中純性方正不濫交游發伏摘奸人皆服其明允成化己丑授四

川順慶知府未赴丁父憂服闋補廣西桂林知府平谷志 桂巖獠賊

劫掠鄰境御史檄純招之純遣謀語賊曰太守親來招撫以蘇眾

命獠皆痛哭引領聽撫通州志 明日具招牌親詣巖口獠賊皆魚貫

而下老幼約三千餘人純悉遣散之事平御史欲奏其功純以地

方無虞為幸多矣何敢邀功御史卒以純招撫羣賊平定地方及

治郡十事以聞上賜誥命一通進階中憲大夫未幾丁內艱服闋

再守江西廣信府會永豐銀坑賊起隨令近鄉兵民及大姓有力

者捕之賊遂散避陞山西參政時河東旱荒邊儲告乏純設法搬

運足備軍用轉本司布政使致仕卒年八十八平谷志

朱驥字尚德大興人初襲衛千戶淹蹇不為人知尚書于謙以女

妻之坐謫戍還官成化時掌衛事二十餘年委任獨至驥為入小

心慎密不逞糾緝未嘗妄興一事凡涉註誤者輒縱舍有所論列

悉推諸官校以故從之蒞事者多至顯官時人莫不賢驥而歎于

謙為知人云通州志

紀常字元正號西臯其先山東人徙居文安常生五六歲未能言

八歲讀書十三解行文有驚人語邑儒馬大章奇之因締姻好大

章貧且卒或譖令改盟父試問之則泣而不諾父喜曰黃童能知

大義他日必不在人下成進士授戶部主事晉刑部員外郎習法

明允僚友稱爲老法司凡大獄涉疑滯者皆就質之出補陝西僉事陝西有三缺人皆難隴右常毅然不避隴右近邊塞山谷險峻爲盜藪常摘伏如神指授方略不三月盡擒之改徙漢中漢中守性驕褊好庇其下常至守正執法電矚風行一如振落課績第一陞湖廣按察使臬司滯牘淹囚最多常勵精裁決月餘而囹圄空丁母艱服闋補官四川囊橐如洗僕賃皆貸之親友陞河南右布政司尋轉左以疾引休歸嘗自言爲秀才未嘗言財貨以至厯官此心可質天地又嘗手錄長史家訓告戒次子誠曰人家興替不在富貴貧賤使貴爲公卿富比崇愷而不知禮義不可謂興若簞食瓢飲肘見纓絕而禮義相先不可謂替卒年八十子誠嚴詢紀西皋傳誠字勉夫生有異稟常指之曰是兒當亢吾宗者戊午鄉試常邁疾誠侍不欲往常曰我望汝爲忠爲孝豈在區區奉湯藥乎強之

行遂舉於鄉明年成進士授南京行人司初以遠親爲念常復遺之書曰汝委贄爲臣何分南北我尙未老勿貳爾心尋遷工部虞衡司郎中分署遵化督鐵冶人多視爲閒局率無所事事誠熟察弊端至則條議九事廣召佃清山塲定冊籍罷窰稅止發配復本色減工料修厥城革冗食皆切時務次第行之及闕射於講武亭見亭後有堂可令諸生肄業遂闢湧泉書院扁其堂曰講易諸生進而質曰公以易語諸生諸生又皆學易名固宜爾後進或有別業其繼公而至者亦未必皆治易也奈何誠曰易五經之原而文字之祖也書得易之情禮得易之序樂得易之和春秋得易之斷語易而五經該之矣孔子假年學易可無大過易之道其可遠哉因書爲記嗣陞懷慶府知府擢井陘兵備副使令民什伍相保互相糾察民無爲盜卽盜至亦無所容境內肅然滹沱故道自深州

饒陽達獻青二縣入海自饒陽既墊之後每一水至民多魚鼈誠

謂必欲除永遠之害莫如復故道必欲舉疏濬之利莫如排羣疑

竟阻於眾咻事未及行病作疏歸三載卒丁士美紀文泉傳

劉志字景仁順天人性謹樸言若不能出口每論禮必以朱子家

禮為的為某國公府教書訓導某欲遷其嫡母之墓而以生母配

葬講具奏草志禮折之某強焉志曰以若所為非獨禮悖且不免

於法某乃賂他訓導錢暄者草疏以進英廟震怒究為謀者柳暄

於市人皆服志之有識又嘗勸人毀銅佛以鑄器不肯強之乃從

後志年未五十得奇瘍被面以死人指以為毀佛之報嗟乎今天

下如志者尙可得哉李東陽都城故老傳

趙某順天人本楊姓鬻醬為業人呼為醬楊天順初迎鑾之役武

官胥士乘勢納賂以冒官賞至累千數百人或以語某某搯手謝

曰我粗人無食肉相財帛非所惜恐反蹈禍機耳不越歲冒官者

事敗盡革職或遭貶竄人始曰趙某不若也某尤好意氣其女夫

刑部主事朱鐸貧而有守每遺錢穀以助其廉朱病卒子又死某

育其女俾不失節李東陽都城故老傳

駱貴字秉彝順天人粗涉經籍少為童師性伉直不匿人過母喪

引儻家禮去旛幢鼓樂用人為方相市兒爭譁笑之尤不喜神怪

嘗有降神者人各獻香楮貴脫所跋雙屐置案上曰吾無他聊以

供神觀者縮頸貴大笑而去後以壽終李東陽都城故老傳

李東陽字賓之號西涯李文正公祠碑記茶陵州人以戍籍居京師明史列傳

父滄為武清渡子有叟來言汝有善念當為擇瘞親地指一山曰

有白狐卧處是李夕往見卧白狐因折樹枝有聲狐驚聳身三立

去卽其穴瘞明日叟來曰侯狐自起爾今驚去當中衰然汝子三

公矣果生東陽祠碑四歲能大書吾學編舉奇童景帝召見名臣

十雙履二寸許絆繫之一粗紵小衫著以見帝祠碑命書麟鳳龜

龍十餘字上大喜大興張志抱置膝上賜果鈔八歲兩召講尚書大義

帝京景物略四稱旨命入京學天順八年十八成進士選庶吉士授編

修累遷侍講學士充東宮講官宏治五年憲宗實錄成由左庶子

兼侍講學士進太常少卿兼官如故五年旱災求言東陽條摘孟

子七篇大義附以時政得失累數千言上之帝稱善下所司議處

東陽甚負文名大學士徐溥等以誥敕繁請如先朝王直故事設

官專領乃擢東陽為禮部侍郎兼翰林學士典誥敕通鑑輯覽八

年以本官直文淵閣參預機務明史本傳冬十月占城奏安南侵撓帝

欲遣大臣往解明紀二東陽曰春秋王者不治夷狄安南雖奉正

朔修職貢然恃險負固積歲已久今遣官至其國徒掉寸舌小必

掩過飾非大或執迷抗命若置而不問損威已多即問罪與師貽

患尤大宜勿聽吾學編中官李廣煉藥被寵東陽疏引唐柳泌宋郭

京為鑒祠碑科道疏救武岡知州劉遜上震怒俱下獄又同疏申

救得釋尋召至平臺奏事吾學編十一年皇太子出閣就學明紀二

進太子少保禮部尚書兼文淵閣大學士明史本傳召見面議四營總

兵官去留是年清甯宮災東陽與同官上疏曰吾學編古帝王未有

不遇災而懼者向來奸邪熒惑聖聽賄賂公行賞罰失當災異之

積正此之由明紀二有為李廣乞祠額者東陽執言不可祠碑清

甯宮成召能仁寺僧入大內慶讚又執不可上皆從之十二年給

事中華昶劾程敏政考會試通私命東陽覆試十六年加太子太

保戶部尚書謹身殿大學士吾學編十七年闕里先師廟成遣東陽

祭告明紀二還上時政疏吾學編帝嘉歎悉付所司明紀二是時帝

數召閣臣面議政事東陽與首輔劉健等竭心獻納時政闕失必

盡言極諫明史本傳時人為之語曰李公謀劉公斷謝公尤侃侃明史謝遷

傳十八年上不豫召入受顧命吾學編武宗立屢加少傅兼太子太

傅明史本傳正德元年上不親政屢與同官上疏皆不報又陳政令十

失是冬加少師太子少師吏部尚書華蓋殿大學士二年逆瑾擅

權益恣暴吾學編無所不訕侮於東陽猶陽禮敬凡瑾所為亂政東

陽彌縫其間亦多所補救明史列傳尚寶卿崔璿御史姚祥主事張偉

為選卒誣執吾學編給事中安奎御史張或以覈邊餉失瑾意皆荷

重校幾死東陽力救璿等謫戍奎或釋為民明史列傳四川鎮守太監

羅籥以既革巡撫請得便宜行事瑾主之力東陽謂兵馬錢糧祖

制無歸一人者執言不可祠碑記三年有遺匿名書於御道數瑾罪

者詔百官悉跪奉天門外頃之執庶僚三百餘人下詔獄次日東

陽等力救會瑾亦廉知其同類所為眾獲宥明史列傳凡朝官忤瑾者

悉誣以舊事罰米輸邊通鑑輯覽一百七多至千五百石東陽委曲開導

瑾不從乃移原籍倉中交納大興張志瑾患盜賊日滋欲戍其家屬及

為之囊橐者明史列傳或自陳獲盜七十人所司以新例從事東陽解

之乃免明紀二劉健謝遷劉大夏楊一清及平江伯陳熊輩幾得

危禍皆賴東陽而解明史列傳五年三月甲子大風霾天色晦冥者數

日辛未禱雨釋囚免正德三年逋賦東陽等因上詔書所未及者

數條帝悉從之明紀二會張永發瑾奸伏誅上以東陽有反正功

加特進左柱國廕其從子兆蕃為尚寶丞吾學編東陽乞休辭廕不

許時政事一新而張永魏彬馬永成谷大用猶用事帝嬉遊如故

皇子未生多居宿於外又議大興豹房之役建寺觀禁中東陽前

後上章切諫不報明紀二七年東陽等以京師及山西陝西雲南



福建相繼地震而帝講筵不舉視朝久曠宗廟祭享不親禁門出入無度谷大用仍開西廡屢上疏極諫帝亦終不聽九載秩滿兼支大學士俸河南賊平廕子世錦衣千戶再疏力辭改廕六品文官明史一日朝退沈思休致袍帶未及解有道士服紫玉環來見指東陽所服帶并自指曰何如我環其能棄却入山東陽日久服無味入山須之歲月耳道士笑出庭中微吟踏劍飛去祠碑遂乞休前後章數上至是始許賜敕給廩隸如故事又四年卒年七十贈大師諡文正東陽有孝行初官翰林時嘗飲酒至夜深父不就寢忍寒待其歸自此終身不夜飲於外工篆隸書碑版篇翰流播四裔士大夫出其門者悉粲然有所成就初與劉健謝遷請誅瑾及健遷去而東陽獨留氣節之士多非之侍郎羅圯上書勸其早退至請削門生籍然立朝五十年清節不渝既罷政家居請詩文

書篆者填塞戶限頗資以給朝夕一日夫人方進紙墨東陽有倦

色夫人笑曰今日設客可使案無魚菜耶乃欣然命筆移時而罷

其風操如此明史子兆先天世蔭皆姪歿甫百年而中衰如叟言

祠碑

陳壯字直夫畿輔唐志其先浙江山陰人祖坐事謫戍交趾後調

京衛遂家焉舉天順八年進士授南京御史明史帝將以元夕張

燈命詞臣撰詩進奉明紀編修章懋等建言得罪壯抗疏救之帝

遣中官採花木復疏諫尙書陳翌請以馬豆代百官俸壯言飼馬

之物不可養士大夫事乃寢壯家素窶常祿外一無所取明史讀

書務實踐父歿畿輔唐志廬墓側居喪一循古禮明史母憂亦然畿輔唐志

歷江西僉事致仕家居十餘年宏治中以尙書張悅薦起官福建

居二年又乞致仕時倪岳爲吏部素賢之擢河南副使歲荒賑饑

民懷其惠僉都御史林俊謝病舉以自代未及遷而壯又乞致仕

巡撫孫需奏留之又二年竟致仕去

明史列傳

楊垣字景和京師人

日下舊聞考引東海集

天順間錦衣衛都指揮門達怙

寵驕橫袁彬不為達下達深銜之誣以罪

明史門達傳

垣素不識彬而

為之上疏曰正統十四年車駕北狩從臣奔散逃生惟袁彬一人

特校尉之役乃能保護聖躬備嘗艱苦及駕還復辟授職酬勞公

論稱當今者無人奏劾卒然付獄拷掠備至罪定而後付律法司

雖知其枉不敢辨明陷彬於死雖止一夫但傷公論人不自安乞

以彬等御前審錄庶得明白擊登聞鼓以進

東海集

詔并下達治時

大學士李賢方被寵任數陳達罪達恨次骨欲并去之

通鑑輯覽一百五

遂拷掠垣教以引賢垣即謬曰此李學士導我也達大喜立奏聞

請法司會鞫垣午門外帝遣中官裴當監視達欲執賢并訊當曰

大臣不可辱乃止及訊垣曰吾小人何由見李學士此門錦衣教

我達色沮不能言

明紀十七

彬亦歷數達納賄狀法司畏達不敢聞坐

彬絞輸贖垣斬帝命彬贖畢調南京錦衣而禁錮垣

明史門達傳

未幾

英宗升遐言者劾達罪舉垣事為證達遂得罪垣父為漆工宣德

間嘗遣人至倭國傳泥金畫漆之法以歸垣遂習之而自出己意

以五色金鈿並施天真爛然倭人見之亦齟指稱歎以為不可及

成化初修英宗實錄稱為義士云

東海集

田景賢字宗儒涿州人

畿輔唐志七十一

舉成化甲午鄉試乙未進士為

戶科給事中

羅洪先禮部尚書田公神道碑銘

劾貴戚慶雲伯周壽

畿輔唐志

忤憲宗

旨廷杖瀕死

神道碑銘

猶極言不已尋擢通政參議

涿州續志

覈實宣府諸

邊儲積立法畫一以便出納視居庸三關歸備禦之策以佐朝議

碑銘建白咸切時宜

畿輔唐志

代祀東方凡道途所經耳目覩記可駭

異者具以上聞蓋雖不在言路無由盡論天下事然猶隨事納忠

神道碑銘

以冀一言之用唐志歷官禮部尚書掌太常事劉瑾擅政唐志奴

視諸大臣俱入賄求免然賄入禍亦不免太常典諸儀禮郊祀燕

享朝賀樂舞節目繁碎最易得罪神道碑銘景賢長身玉立簡靜自持

毫不為屈涿州續志終瑾之身竟不能有所螫毒神道碑銘後進太子太保

卒贈太子太傅涿州續志孫汝麟登嘉靖庚戌進士官戶部主事神道碑銘

歐信字孚先薊州人一統志成化進士任戶部主事奉命賑陝活飢

民以萬計畿輔唐志署郎中事時權貴有請河東鹽十萬引眾不

敢出一語信獨持不可督餉大同增置東大有倉乘賤而糴不數

歲贏五十餘萬石劉大夏巡撫至歎曰典邊儲者盡如歐郎中吾

無此行矣中官樊德趙宣上言保定河間有隙地可作皇莊信往

看力白其妄乃止陞浙江參政歷河南山東布政使俱有賢聲薊州

沈志正德初累擢右副都御史巡撫大同訓兵練武綜覈屯政一統志

備舉廢墜以才能稱畿輔唐志未踰年以勞瘁卒薊州沈志

燕忠字良臣薊州衛人成化進士任甯國府推官讞獄多所平反

畿輔唐志有民賈於江淮間怨家嗾其僕殺之因盜其貨罪人久

不得忠廉得其情誅之薊州沈志宏治中歷御史一統志以災異上言親

賢納諫重名器節財費嚴賞賚薊州沈志近尤官日眾土木日興莊田

賜撥日廣奔競無恥之徒充列庶位一統志言甚剴切孝宗嘉納之

巡按陝西發奸摘伏風聲凜凜賊吏望風解組陞環慶兵備副使

薊州沈志會都御史楊一清修舉馬政以忠為苑馬卿正德初就遷陝

西按察使一統志禁和買節妄費民間有冰玉之謠進布政使以簡

靜為治陝人逆璫劉瑾方柄國忠獨不拜其墓且無所餽瑾啣之

卒不能害巡撫宣府改大理寺卿執法秉公辨知州田崑之寃正

胡某殺父之獄皆逆鱗忤權貴人爲忠危而竟從忠之議江西藩

臬交惡獄久不決蓋因宸濠主之也忠奉命往按獄成人無異言

沈州志性峭直不輕交際貴近請託必正色拒之唐志有包孝肅趙

清獻之風居官三十年卒之日囊無餘蓄沈州志所司奏忠剛正得

大臣體特贈刑部尚書一統志

張禮字汝吉別號東盤平谷人一統志宏治壬戌進士選翰林院庶

吉士正德初授兵科給事中轉左給事中平谷志劉瑾擅政唐志毒

害正人兵部尚書劉大夏一時領袖瑾尤嫉之平谷志先是大夏言

鎮守中官如江西董讓薊州劉瑯陝西劉雲山東朱雲貪殘尤甚

乞按治帝不悅大夏以言不見用數上章乞骸骨詔加太子太保

賜敕馳驛歸禮請留之不報明紀二太監段聰以待東宮頗得寵

倖遂欲借逆瑾之力負緣乞官其姪禮上疏力諍之改監察御史

平谷志查盤山東墨吏望風解綬一統志陞大理寺卿進左少卿平谷志

知縣劉儒受贓爲僉事呂和所按儒賂中官欲反罪和禮執不可

竟正儒罪後巡撫山西鎮守太監吳經貪橫虐民禮置其黨於法

勢始敢武宗西巡禮極諫上怒執禮左右搥訊竟無所得乃止一統志

志嘉靖壬午卒於官軍民感禮之德立祠以祀其子扶視歸家惟

圖書數卷而已弟禴平谷志自有傳

王鏜字彥升平谷人宏治進士任山東德平知縣政平訟理擢御

史剛毅不畏強豪巡通倉宿弊一清又奏請添修通州新城以保

倉儲唐志按蜀適廖麻子喻老人倡亂鏜與總制彭澤竭力

勦除其亂乃平平谷志武宗賜璽書褒之累遷河南副使以憂歸遂

不出唐志年七十八終于家平谷志周棨字國信通州人宏治十四

年進士知徐州蕭縣有僧欲強姦民婦婦不從僧殺之時其夫他

往婦家誣夫弟甚堅榮疑為冤獄未定夢婦白死狀甚悉乃託齋諸寺僧而殺人之僧亦至禽治之一訊即服遂釋其弟邑人稱為

神明祀鄉賢

通州高志

邢昭字仲明三河人

一統志

謹之子宏治丙辰進士授洪洞縣尹擢

浙江道監察御史

三河陳志

按鹽浙江守正不阿因忤劉瑾廷杖一百

不死人稱鐵鑄邢昭

畿輔唐志

七十一 謫高平知縣瑾誅復山西道監察

御史終汝甯府知府

一統志

張翰號西野宛平人宏治中由進士選

御史彈劾不避權貴時劉瑾當國內外重足而立翰獨長揖不為

屈瑾不能堪拳擊翰翰躍起擊瑾仆地人或危之翰曰恨未殺此

奴為國家除禍根耳無何瑾敗歷官副都御史巡撫四川

宛平王志

蕭選字廷舉三河人宏治己未進士為盤厓令摘發幽伏人以包孝

蕭目之為立生祠

三河陳志

亦因忤瑾左遷揚州衛經歷擢知獲嘉拜

山西道監察御史巡鹽河東國計充裕累遷僉都御史

畿輔唐志

賈斌薊州貢生為鴻臚寺鳴贊為人小心勤慎動無所苟宏治年

視朝忽大雨群臣皆失次斌肅容鵠立孝宗器之陞禮部左侍郎

進尚書正德改元致仕歸處鄉黨如布衣時有公事詣有司惟乘

馬側行年八十有五助之輿夫終不受

薊州沈志

張欽字敬之通州右衛人世襲武清衛百戶

通州高志

本姓李張其母

姓也

舊聞考

一百五十四

案通州志

云因祖贄張氏從其姓與

此互異又云通顯後復姓故志李欽考史亦有復姓之文而

所書仍為張欽蓋當時張侍郎之名

播傳遠近史亦從世所稱者書之

事父母孝有不悅長跪請至

解乃已正德六年進士由行人授御史巡視居庸關十二年帝聽

江彬言將出關幸宣府欽上疏諫曰臣聞明主不惡切直之言以

納忠烈士不憚死亡之誅以極諫比者人言紛紛謂車駕欲度居

庸遠遊邊塞臣度陛下非漫遊蓋欲親征北寇也不知北寇猖獗

庸遠遊邊塞臣度陛下非漫遊蓋欲親征北寇也不知北寇猖獗

但可遣將徂征豈宜輕勞萬乘英宗不聽大臣言六師遠駕遂成  
 己己之變且匹夫猶不自輕陛下奈何以宗廟社稷之身蹈不測  
 之險今內無親王監國又無太子臨朝外之甘肅有土番之患江  
 右有輦賊之擾淮南有漕運之艱巴蜀有採辦之困京畿諸郡夏  
 麥少收秋潦為沴而陛下不虞禍變欲縱轡長驅觀兵絕塞臣竊  
 危之已聞朝臣切諫皆不納復疏言明史列傳上有卿輔之臣下至耳  
 目之官皆不避誅死苦諫陛下未蒙俞旨臣愚以為不可出者有  
 三人心動搖供億繁苦一不可也遠涉險阻兩宮挂慮二不可也  
 塞俗強梁輕身挺出往與之角三不可也臣奉職巡關分當效死  
 即加斧鉞之誅亦不敢避張侍御閉關三疏圖記疏入不報明史列傳至八月朔  
 忽報駕至昌平即欲過關是日欽令分守指揮孫璽閉關南門太  
 監李嵩欲赴昌平候駕欽止之曰今日之事有死而已可擅離職

守乎俄千戶閻岳至南門傳旨欽捧璽書并監察御史印至門固

守收其扇鑰手自持之誓曰有奪關者御史當手刃之名臣應夜謚錄

草疏曰臣聞天子將有親征之事必先期下詔廷臣集議其行也

六軍翼衛百官扈從而後有車馬之音羽毛之美今寂然一不聞

輒云車駕即日過關此必有假陛下名出邊勾賊者臣請捕其人

明正典刑若陛下果欲出關必兩宮用寶臣乃敢開不然萬死不

奉詔已酉使者復來欽拔劍叱之曰此詐也使者懼而返為帝言

張御史幾殺臣帝大怒顧左右為我趣捕殺御史明紀二會廷臣

亦多諫者帝不得已而還京師盛傳張御史閉關三疏云通鑑輯覽一百

七又二十餘日欽巡白羊口帝微服自德勝門出夜宿羊房民舍

遂疾馳出關數問御史安在欽聞追之已不及感憤西望慟哭明

年帝還自宣府還至關笑曰前御史阻我我今已歸矣世宗嗣位

出為漢中知府累官太僕卿明史列傳總制楊一清疏薦擢延綏兵備

副使欽請給關防置簿籍釐剔衛所積弊鳳翔有地曰胡店山險

多巨盜欽請於巡撫劉允悉擒滅固原迤北地平衍敵易闌入欽

受總制檄東自環縣西抵蘭州幾千里內多立塹壘不三月告成

邊地賴之嘉靖十七年欽以右副都御史巡撫四川每歲徵收糧

額一人多至千石難辦易侵欽令郡縣多簽收戶每戶無過百石

數少易完上下稱便請城堡增戍於漳臘以禦西北築隄防以悍

嘉定水患嘉定人立石頌其德通州高志歷官工部侍郎卒年六十六

欽性剛正不俯仰時俗歷仕三十年家無儲積曲周王尙一鶚序

三疏刊行稱其無尺寸之業貽子孫清德尤不易及也舊聞考一百五十四

楊秦字濟之良鄉楊志良鄉人一統志生而英敏端慤不妄笑語為兒時

父問之曰女志何如曰我欲為御史父奇之遣就學讀書即曉大

義長為弟子員弟子員皆弗若也正德庚午領順天鄉薦丁丑登

進士第己卯除行人司行人王用賓楊公墓志武宗南巡良鄉楊志秦率同列

抗疏諫墓志廷杖謫國子監學正嘉靖元年復任行人授福建道

監察御史良鄉楊志正色直言彈劾弗少避其奉勅陝西清戎也墓志

查盤軍器照刷文卷清審刑獄良鄉楊志民用大悅先是抽丁補伍輒

復散亡秦曰是貧所致耳迺察其殷富者使厚遣之貪吏冒逃卒

以私餉者歲逾數千石秦稽諸邊得其情俾悉償焉墓志因奏建

局除戎器又疏請惜人才以隆治化良鄉楊志時少師楊石琮總制邊

務一旦過陝講武病其器敝秦令悉易之石琮嘉之曰我軍固有

侍哉墓志三年復命良鄉楊志攝四道事有囚當死託鄉人以千金賂

之秦叱之曰我知其法耳不知其賄自是疏之墓志議廟制劾禮

官依違不決出為四川按察司僉事平寇有功賜金綺畿輔唐志七十四

蜀大饑廷議命藩臬二人賑濟皆曰非楊僉事不可乃周歷郡縣

區處咸宜凡數月力憊而疾殆竟卒年四十八子守正守公墓志銘

守公性孝友嘉靖三十一年應試薦時兄守正為副守公白學院

阮鶚讓兄應薦守正固辭守公固讓誠懇甚切阮為之動容檄邑

旌其閭曰孝友之門良鄉楊志

頓銳字叔養涿州人畿輔唐志七十九性閑靜嘗步屨城外見西溪中羣

鷗上下飲啄自得與己意合因自號鷗汀涿州吳志幼聰慧日誦數千

言正德六年進士以詩名都下畿輔唐志當時稱涿郡有才一石銳得

其八斗四庫全書提要一百七十六選高渚知縣遷代王府長史去官歸築室

於城之西懷玉山自號懷玉山人著書歌詩畿輔唐志其五言古詩氣

韻清拔頗為入格七言古詩跌宕自喜近體專尚音節四庫全書提要

所著有鷗汀集漁嘯集涿鹿先賢傳畿輔唐志

安璽宛平人正德十六年進士刑部主事明史列傳嘉靖三年帝欲考

獻帝改孝宗為伯考明史張中羽傳召見羣臣左順門示以手敕言章聖

皇太后命去本生字羣臣駭愕而張璫桂萼復列上禮官欺罔十

三事且斥為朋黨於是九卿詹事翰林給事御史六部大理行人

諸司各上章爭之皆留中不下尚書金獻民少卿徐文華倡言曰

諸疏留中必改稱孝宗為伯考矣吏部右侍郎何孟春曰憲宗朝

議慈懿太后葬禮姚夔率百官伏哭文華門此我朝故事也通鑑輯覽

一百八其年七月偕廷臣伏左順門哭諫帝大怒繫之詔獄杖三十

踰旬再杖之璽與同官王思王相給事中張原毛玉裴紹宗御史

張日韜胡瓊郎中楊淮胡璉員外郎申良張燦主事仵瑜臧應奎

余禎殷承敘司務李可登凡十有七人皆病創先後卒明史王穆

宗嗣位贈璽光祿少卿明史列傳



王誥字承恩保定人官安慶懷甯知縣居官廉介值宸濠不軌誓以死守捍禦二十餘日賊潰城完上錫敕書旌其忠義懷甯人爲立去思碑轉應天治中值江南北大祲病疫粥藥賑活數萬人子顯忠年十九成進士官戶科給事中首疏訓儲貳恤邊士咸蒙嘉納又彈本兵與總督大臣凜凜巡視光祿凡供御率立法定價諸璫憚之竟忤權相謫杞縣丞至則建公塾萃諸生之資穎者督訓焉由是人文彬起尋陞臨晉去士子思之祀名宦泣臨晉平徭清賦民建祠刻石頌德遷湖州同知董織造却羨餘萬金民立却金亭累官山西參政陽城介休間有盜數千據險爲患屢歲莫制顯忠冒矢石定其巢穴後告歸居家以孝友稱里人化之保定成志張詩宛平人自號崑崙山人初學舉子業於呂柟繼學詩文於何景明聲名籍甚會順天府試少尹令士人自負几入場詩遂拂衣

出絕意不應舉作汗漫遊畿輔唐志七十九一意爲詩宛平王志所至留題畿輔

通志與翰林江暉馬西元林楸易廖洞野呂柟諸公相唱和一時稱盛入汴謁李夢陽夢陽與之夜宴瓶芝忽墮取以爲拌各賦芝拌

行至汝南視何景明疾相守七月景明卒乃還宛平王志歸居一畝之

宅隙地種竹每遇風雨畿輔唐志則披襟相對欣然命酌興至輒跨一

蹇任所之中途雖迫於風雨饑寒不顧也杭守李士行稱爲春風

不足融其情醅醪不足況其味眞足以知詩也所著罵思結髮笑

琳七子等文雄奇怪變見者不敢以今人目之書法放勁得顛旭

素師遺意人謂懸之可以驅鬼宛平王志

楊行中字維慎通州人一統志父疇敦孝友撫弟遺孤成立嘗拾遺

金歸其主通州高志行中嘉靖初進士一統志授浙江山陰知縣厚重廉

平善理繁劇凡興學勸農築隄捍海諸惠政次第畢舉報最擢監

察御史

通州高志

巡察遼東

畿輔唐志七十四

時巡撫呂經激兵變部議勦行

中請榜示諸城令亂者自相擒捕以贖罪從之兵遂寢

通州高志

世宗

將幸奉天行中力諫上震怒

畿輔唐志

命廷杖會風變得免歷南京右

僉都御史揚子江巨盜黃勤等聚黨結鹽徒肆擾行中密授弁兵

方略捕獲之餘黨盡散人呼為江神累遷刑部侍郎奉命案鄭王

但列王驕僻狀而洗不軌寃釋株連數百人遷南京工部尚書疏

請博咨才略以備安攘因舉侍郎鮑象賢總兵俞大猷等從之時

倭寇猖獗南京城久圯請繕完以便防守遷南京吏部尚書行中

素遠嚴嵩

通州高志

嵩惡其不附已以考察罷歸

一統志

隆慶六年卒年

八十四其始為御史也章凡十餘上皆允行左都御史王廷相稱

其剛直明練為御史十年不調吏部尚書許讚將薦擢語同列云

吾今薦一不識面御史何如初救陶仲文於戍所仲文貴幸欲有

以報行中拒之曰彼非吾徒吾亦非彼德也行中年六十餘父卒

猶孺子泣所受祿悉贍族無吝家居恂恂如寒素

通州高志

傲廬蕭然

雖老猶不廢學

一統志

嘗纂輯通州志略記鄉賢子鎬

通州高志

鎬字景卿萬曆三十七年舉人授山東泗水知縣揭天理二字於

堂政皆公允恤郵傳清賦役興利除弊悉裨於民性耿介尤不避

權貴自奉甚薄或謂之曰若此何用服官為鎬正色答曰予豈溫

飽者流恐愧先人清白耳嘗與戶部尚書李三才講求慎獨誠意

之旨力行不懈易簣時謂諸子曰此時心上一物不著可以見先

公不愧矣亦祀鄉賢子世揚

通州高志

世揚字二遠性穎敏

通州高志

善史學多識古人姓氏地里物產及翰

墨家瑣細事

馬健順傳

尤究心書學注蘭亭消化諸帖專論筆法故生

平作書不求貌似古人卒年八十所著有嫗解潞水之什東郊風

雅瘦瓢等集

通州高志

王儀字克敬文安人嘉靖二年進士除靈璧知縣

明史列傳

歲大祲道

殫相望民各鳥獸散儀下車不及解衣卽拮鎖棄倉實與民設糜

以飼疫者所借以活全甚眾奸民有寇盜者至官府不敢問儀廉

得其素昵者明貸其罪籍以報諸寇出入得信乃督捕人卒至火

其家盜來無所著邑遂靖

中丞王肅菴傳

以能調嘉定擢御史一統巡按

陝西秦府豪占民產儀悉奪還民延綏大饑朝命陝西布政使胡

忠為巡撫儀論罷之已巡按河南趙府輔國將軍祐棫招亡命殺

人劫斂積十餘年莫敢發儀偕巡撫吳山奏之奪爵禁錮會儀出

為蘇州知府甫三月祐棫潛入都奏儀摺摭并許都御史毛伯温

以私憾入已罪且言臣嘗建醮祈皇嗣為知府王天民訕笑請并

按問帝心知祐棫罪而悅其建醮語為遣使覆按解儀伯温任下

天民獄

明紀三十二

除儀名蘇州士民走闕下乞留帝不許

明史列傳會言

官亦交章論救復職得江西撫州

文安楊志

蘇州士民復走闕下乞還

儀至再不報歸愬於巡撫侯位位以聞帝乃許之至則歎曰

明史列傳

郡賦當天下什二而田額溷亡可考何以定賦賦不可以救吾誠

不能一日安其上遂日沉思擘畫僚屬射循阡陌計丈

文安楊志

使各

縣為籍

明史列傳

民毫釐不敢有所隱乃以八事定田賦而賦平以十

歲編徭役而役平以三法考課鈔而民之灌輸平

文安楊志

治為知府

第一

明史列傳

擢按察副使兵備蘇松四郡

文安楊志

時巡撫歐陽鐸均田

賦

明史列傳

令賦最重者減耗永派輕齎最輕者徵本色增耗米

明史歐陽鐸

傳儀佐之以治蘇者推行於旁郡坐與操江王學夔討賊敗績停

俸戴罪未幾殪賊江中進秩一等遷山西右參政分守冀甯寇抵

清源城儀洞開城門寇疑引去按行所部築城郭積糗糧榆次平

定間遂皆有城明史列傳尋推僉都御史巡撫宣鎮鎮當彫敝之後儀

大集賓佐講畫戰守利弊上十餘疏易將領之庸弱者于是拔才

能問疾苦飭廢墜申號令修器械嚴警邏節候望邊政一新文安楊志

俺答犯龍門所總兵官郤永等郤之斬五十級明紀三儀進右副

都御史明史列傳巡撫如故會以邊情奪職廷臣交口推儀才幹旋補

陝西副使兵備肅州肅故有哈密遺種雜民間歲久滋蔓為害計

徙之境外肅以甯文安楊志稍遷右參政復拜右僉都御史巡撫甘肅

未行明史列傳會俺答犯京師詔儀馳鎮通州仇鸞部卒掠民間捕而

笞之枷市門外鸞訴於帝逮訊斥為民一統志生平清約自持既貴

食不重肉衣不裁綺兢兢如少時嘗曰君子立身必資于身者薄

係于物者輕故能處紛華而不染世以為名言退居九年卒年七

十有八文安楊志著有陝西河南奏議各若干卷上谷奏議若干卷吳

中田賦錄若干卷文安楊志隆慶初子緘訟寃復官賜卹明史列傳緘字伯

默晚號愚谷自著愚谷山人小傳以見志隆慶進士授中牟令首

與僚佐約常祿之外以一錢入者有公評胥吏以一錢入者有公

法上下肅然先是黃河轉徙田額浸失其初緘履畝均賦清欺隱

之田若干頃修賈魯河長堤田絕水患毀淫祠以建橋梁民不病

涉邑舊有魯恭祠嘗以朔望躬詣父老相謂曰魯恭遠矣吾不悉

何狀今里少吠厖野多馴雉公奚不若而慕之也緘聞而笑曰談

何容易余獨不愧此心耳尋推吏部驗封司主事去之日士民攀

留車軛不得行相率立生祠肖像以祀焉文安楊志累官按察使分巡

遼陽以知兵名明史列傳每憑軾出關巡行邊塞周覽要害考求卒

乘教演戎車聚則為城行則為陣一切雄邊威敵之具無不畢陳

巡按御史陳登雲敘緘修守之功薦其才堪大用是年秋遼道殫

相望緘奉命督賑隆冬親歷亭障手足皸痲全活者二萬餘人尋與撫巡不合復失內閣意指詔致仕

沈涵大參  
王四槐傳

徐珏字汝和涿州人少有膽智為諸生屢試不第遂投筆學武登嘉靖癸未武進士授居庸把總時大同軍亂殺鎮巡官據城不下命廷臣往撫之携珏行珏至單騎入城曉以大義眾咸感泣事平賜白金三百兩遷大同都司歷副總兵庚戌敵犯京師奮勇鬪擊捷聞上撤御前饌賜之授都督僉事守大同以忤嚴嵩左遷保定鎮守是時敵薄浮圖峪珏拒戰八晝夜敵敗去後倭寇蹂躪閩浙珏率子姪為先鋒夜抵倭巢大捷者三遷南京中府僉書值南京兵亂珏驅家眾戰於城中擒數十人梟其渠魁馬三死眾遂散轉北京後府僉書以老乞歸

涿州續志

楊瀹字南郭涿州人嘉靖壬辰進士授戶部主事監石渠倉凡監

倉官例多所取給吏承風因緣為奸瀹獨取所支俸金悉碎鑿之大如粟日以一付謹愿吏以易魚蔬仍約市賈非此金市物者卽白之議吏罪自瀹任監倉後賄賂請託俱不得行管河西務裁革積弊民咸以為便未幾上以館局需人敕內閣吏部舉充以唐應德等十人奏上選七人瀹與焉授翰林院編修朝廷大制作如九廟實錄屬瀹成藁為多充嘉靖乙未會試同考官最稱得士視學山東校士湖南書院得優等者六人李攀龍為首許邦才次之旣謝病家居教授生徒所著有翰林集南郭集

涿州吳志

陳堯字敬甫通州人嘉靖進士為工部郎出守台州治行為東南第一轉長蘆都轉鹽運使遷貴州按察使

畿輔唐志  
七十四

多以文學飾

吏治所至輒聚生徒講學南安人為之築醒翁亭咸稱其品詣可當廬陵

宛平王志

時採皇木取丹砂使者相望堯每事節省日勿導荒

服以奢靡後巡撫四川轉南京工部侍郎總理河道會河淤沛下  
堯乘小舟訪古廟碑記知刁陽可濟運遂引漕由湖而北決口以

塞以刑部左侍郎致仕卒通州高志所著有醒翁集宛平王志

王佩文安人授工部主事陞員外郎分理清源嘉靖十七年值獻

皇太后梓宮還河深不盈尺佩密借朝陽湖水一夕而下眾異為

神方嚴開以待時分巡道于廷寅者浙人也以鄉里私舟至固欲

啟聞佩執不可于縛其吏卒撻之山東撫按以聞上怒逮于廷杖

死暨九廟成錄功受金綺之賜陞郎中出守慶陽府政績卓著撫

按交疏薦之自于之死浙人私以嫉佩竟以劾歸入慶陽名宦文安志

楊喬伊字良相三河人畿輔唐志七十四嘉靖丙辰進士任安慶府推官

明刑慎獄一時呼喬青天三河陳志遷南京戶部郎中值兵變殺侍郎

黃某伊馳赴軍中諭以禍禍眾始帖然解散畿輔唐志後以同事排擠

罷職歸三河陳志朱乾亨字子貞大興人性篤孝嘗割股以愈母疾嘉

靖辛丑進士授戶部主事有巨商以暮夜金相餉者却弗受陞懷

慶知府不賄上官約下以法為貪墨者所擠輒拂衣歸懷民泣留

如失父母祠名宦大興張志

馬慎字自修大城人父齡正德丁卯舉人任河南永甯令廉而有

為慎忠勇天植居鄉多義讓為諸生時歲貢已及慎念次貢李淮

年老讓淮先貢慎遂中嘉靖庚子舉人辛丑進士甫登第聞父有

疾堅請歸省父卒服除授戶部主事代州糧儲節積羨金十萬兩

悉入內帑誥褒美之有白金綵幣之賚再督理兵餉恤士卒慎出

入士馬騰飽除大同知府值庚戌之變練兵固守民賴以安未幾

丁內艱再除登州知府兩府俱有宗藩梗沮難治慎清正不苟無

敢譁者登州有海防慎以武略著於時陞湖廣按察司副使整飭

淮海道倭寇犯境慎統領親兵張祥等援勦親冒矢石經數戰斬

獲倭級百餘奪獲盔甲器械巨艦有差捷聞敘功加一級銓曹方

擬柄用值叅將王介乃總督趙文華倖弁仗勢奸猾出征畏縮不

前慎實申兩院介陰狡捏詞賂謀當路令慎回籍聽勘後介恐事

白受顯戮服毒而死慎得補山西潞安道副使以疾卒於官

大城張志

劉體乾字子元東安人嘉靖二十三年進士授行人改兵科給事

明史中列傳司禮太監鮑忠卒其黨李慶為其姪鮑恩等八人乞遷級

帝已許之體乾抗疏力爭乃止錄三人時國用絀廷議請追宿逋

增賦額體乾獨言冗吏冗費之弊一統志請革冗濫語侵內監時論

難之畿輔唐志七十一累官通政使遷刑部右侍郎改戶部左侍郎總督

倉場隆慶初進南京戶部尚書南畿湖廣江西銀布絹米積逋二

百六十餘萬鳳陽園陵九衛官軍四萬而倉粟無一月儲體乾再

疏請責成有司又條上六事皆報可明史隆慶三年夏四月詔取

太倉銀三十萬兩體乾言太倉銀所存三百七十萬耳而九邊年

例二百七十六萬有奇在京軍糧商價百有餘萬薊州大同諸鎮

例外奏乞不與焉若復取以上供經費安辦帝不聽體乾又言今

國計絀乏大小臣工所共知卽存庫之數亦近遣御史所搜括明

歲則無策矣今盡以供無益費萬一變起倉卒如國計何乃命止

進十萬兩帝嘗問九邊軍餉太倉歲發及四方解納之數體乾言

祖宗朝止遼東大同宣府延綏四鎮繼以甯夏甘肅薊州又繼以

固原山西今密雲昌平易州俱列戍矣各鎮防守有主兵其後增

設召募增容兵而坐食愈眾各鎮芻餼有屯田其後加民糧加鹽

加京運而橫費滋多因列上隆慶以來歲發之數明紀三又奏國

家歲入不足供所出而額外陳乞者多請以內外一切經費應存

革者刊勒成書報可明史列傳隆慶四年三月詔市綿二萬五千斤體

乾請俟湖州貢帝不從趣之急明紀三十八給事中李已言三月非縣

時不宜重擾商戶體乾亦復爭乃命止進萬斤明史列傳體乾清勁有

執議論務存大體有古大臣風時內供日多數下部取太倉銀又

趣市珍珠黃綠諸物體乾惜浮費每疏爭一統志李已輒助之會帝

從中官崔敏言命市珍寶體乾已執奏不從復偕同官陳吾德上

疏帝震怒杖已百錮刑部獄斥吾德為民明紀三十八體乾積忤帝意

一統志秋七月奪官閒住明紀三十八給事中御史光懋御史凌瑄等交

章請留不聽神宗即位起南京兵部尚書奏言留都根本重地故

額軍九萬馬五千餘匹今軍止二萬二千馬僅及半單弱足慮宜

選諸衛餘丁隨伍操練發貯庫草場銀買馬又條上防守四事竝

從之萬曆三年致仕卒贈太子少保明史列傳

王遴字繼津霸州人嘉靖二十六年進士除紹興推官入為兵部

主事歷員外郎明史列傳峭直矜節概不與交惟與同官楊繼盛善一統

志繼盛劾嚴嵩及其孫效忠冒功事下部覆世蕃自為藁以屬武

選郎中周寃寃發之反得罪尚書聶豹懼趣所司以世蕃藁上明史

列傳遴力爭不可次日另具一藁呈聶聶擲於地曰君為君子豹為

小人矣竟覆如世蕃藁繼輔唐志七十一繼盛論死遴為資粥館且以女

字其子應箕明史列傳嵩父子銜遴次骨乃撫他事下之詔獄事白復

官繼輔唐志及繼盛死收葬之遷山東僉事再遷岢嵐兵備副使有威

名為巡撫所忌劾去官民相率訟寃詔許起用四十五年擢右僉

都御史巡撫延綏明史列傳冬十月丁卯俺答犯定邊固原總兵郭江

敗死明紀三十六總督陳其學陝西巡撫戴才坐免遴貶俸一秩隆慶

改元寇六入塞皆失利去而御史温如玉論遴不已解官候勘後



楊鈇勘上其功遂以故官巡撫宣府遴乃大興屯田邊儲賴之秩

明史

滿進右副都御史尋拜兵部侍郎

能一統

會議閱邊遴請行事竣遽移疾歸

明史

居正歿起南京兵

部尚書奏行計安留都十二事軍政大肅召拜戶部尚書

一統

先

是奉詔蠲除及織造議留供銀百七十六萬餘兩命於太倉庫補

進遴言陛下歷十餘年之積不足償二年取補之資矧金花額進

歲當百萬自六年以後增進二十萬今合六年計之不啻百萬矣

庫積非源泉歲進不已後將何繼因言京通二倉糧積八百萬石

足供九年之需請量改折百五十萬石三年而止詔許一年

明紀

一尚寶丞徐貞明

明史

嘗請興西北水利時以財匱不能舉及謫

官南行

通鑑輯覽

至潞河終以水田議為可行

明紀

又著潞水

客談論水利當興者十四事既還朝給事中王敬民

通鑑輯覽

疏論薦遴亦力贊之帝乃進貞明少卿賜之敕令往會撫按諸臣

勘議

明史

故事戶部銀專供軍國不給他用帝大婚暫取濟邊

銀九萬兩為織造費至是復欲行之遴執事未幾詔取銀四千兩

為慈甯宮用遴又力持皆不納

明史

遴陳理財七事請崇節儉重

農務督逋賦懲貪墨廣儲蓄飭貢市帝報曰事關朕躬者已知之

餘飭所司議行時釋教大盛

明紀

又請僧道年四十以下及無

度牒者悉令歸農

一統

聚眾修齋者坐左道罪禮部尚書沈鯉請

如遴言詔許之后如宦者多言不便事中止

明紀

改兵部屏絕

請託

一統

遼東鎮總兵官李成梁賂遺徧輦轂

明史

獨不敢至遴

門遴之為戶部尚書也頻執爭為中官所嫉及改兵部申時行以

管事指揮羅秀屬遴補錦衣僉書遴格不許會帝將重閱壽宮中

官持御批索馬遴以為題本當鈐印司禮傳奉由科發部無徑下

部者援故事執奏帝不悅時行乃調旨責遴擅留御批失敬上體  
御史因交章劾遴遴乞休去明紀四十一張佳允代之給事中張養蒙  
言羅秀本太監滕祥奴賄入禁衛往歲營僉書尚書遴持正為所  
中傷去未幾秀即躡用物議沸騰於是黜秀佳允亦罷遴雖退聲  
望愈重以高年存問者再三三十六年卒贈太子太保天啟中追

謚恭肅

明史列傳

王鈇字德威順天人

一統志

嘉靖二十九年進士授常熟知縣

明史列傳

邑多大猾

畿輔唐志七十六

匿亡命作奸鈇悉貫其罪倭患起鈇語諸猾

曰何以報我

明史列傳

諸猾咸請效死

唐志

於是立耆長部署子弟得

數百人

明史列傳

分防訓練繕築城垣

畿輔唐志

三十四年三月倭自三丈

鋪分掠常熟江陰甲寅鈇與蘇松兵備副使任環指揮孔燾分統  
官兵民三千破其巢於南沙斬首百五十有奇焚舟二十七餘倭

皆遁去乙巳賊分為二北掠潞墅南掠橫塘延蔓常熟江陰無錫

之境

明紀三十四

將由尚湖還海鈇憤曰賊尚敢涉吾地邪必擊殺之

會邑人錢泮字鳴聲者以江西參政里居忿倭熾其父柩力從與

贊鈇乃用小艇數十

明史列傳

追倭於上滄港

明紀三十四

倭夾擊之隘中

獨耆長數人從皆力鬪死鈇陷淖瞑目大呼腹中又死

明史列傳

贈太

僕少卿

一統志

並廕錦衣世百戶遣官諭祭立祠死所歲時奉祀

明史列傳

高敏學寶坻人

一統志

嘉靖庚戌進士授行人司以風節自勵視權

貴蔑如也擢兵科給事中時趙文華私人籍嵩勢益無忌敏學憤

甚具疏劾之帝大怒詰責敏學敏學侃侃不撓廷杖折脅絕幣而

卒後嵩敗文華死

寶坻洪志

追贈光祿寺少卿仍恤其家

畿輔唐志七十六

毛

綱字伯練薊州人嘉靖進士授汝甯推官宣藩校於法

畿輔唐志七十四

崇王怒以刑威之蕪州志綱不為動畿輔唐志王加禮焉蕪州志歷兵部郎

出守杭州累遷戶部尚書致仕家居置義田蠲內外貧族畿輔唐志

劉效祖字仲修京衛人夙有孝行大興張志嘉靖庚戌進士宛平王志理衛

輝平反無算遷戶部主事畿輔唐志備糧儲督漕輓聲望日隆歷

員外郎中嚴嵩欲羅致門下婉謝之陞陝西固原兵備副使大興張志

平涼馬苑特奧援縱卒擾民效祖執之寘於法一日敵入花馬池

效祖登城捍禦敵知有備引去尋為忌者所中罷歸五原人扶老

攜幼號泣車前聲震四十里畿輔唐志歸闕日涉園宛平王志寄情詞曲小

令可入元人之室如沈醉東風云東華路塵沙滾滾玉河橋車馬

紛紛官高休羨榮命蹇須安分靠青山緊閉柴門間把英雄細討

論能幾箇到頭安穩又一闕云門巷外旋栽楊柳池塘中新浴沙

鷗半灣水繞村幾朵雲生岫愛村居景致風流間啜盧仝茗一甌

醉翁意何須在酒朝天子云景陽宮曉鐘鳴珂巷玉驄總是南柯

夢生來無分紫泥封機巧成何用捉霧拏雲攀龍附鳳這心腸無

半種拄一條瘦筇引一箇小僮沿耕墮瞧耕種又一闕云喜碧山

日親把銀魚早焚銷繳了功名分軺車鳩杖鹿皮巾也不讓黃金

印晚景無多前程休問趁明時自在隱尋幾故人團坐在簞門常

則把陰晴論入小山樂府中不能辨也昭陵嘗遣中使索其題冊

呼曰念庵念庵副使別字也因賦詩云更生雙鬢已蕭騷敢謂文

章擅彩毫過誤偶承明主問因緣不是鬱輪袍蕪州詞話所著有四鎮

三關志十二卷春秋稿二卷宛平王志古文詞襍著共七卷大興張志弟繼

祖號述菴性孝友博學多才與兄名齊一時由成均選松江府檢

校明習吏事歷官有廉能聲及擢昌黎丞遂疾歸語諸子曰吾平

生歷秩甚卑惟恪盡無忝存心不敢自欺耳以次子餘祐貴貤贈

通議大夫兵部右侍郎宛平米志

宗禮字道周京衛人嘉靖中武舉累官神機營遊擊將軍奉命禦

倭畿輔唐志七十六禮驍健敢戰練士三千明紀三十五屢殲賊眾畿輔唐志嘉靖

三十五年徐海引大隅薩摩二島倭分掠瓜州上海慈谿自引萬

餘人攻乍浦胡宗憲壁塘棲與阮鶚相倚角海趨阜林鶚遣禮擊

之崇德縣三里橋三戰三捷辛亥明紀三十五倭眾萬餘猝至禮所統

不過九百人自寅至午所殺傷過當而禮亦身被重創兼糧盡乏

食後軍無救者遂力戰而歿事聞贈都督同知蔭一子指揮僉事

諡忠壯畿輔唐志

李松大城人畿輔唐志七十四父淮郢陵主簿松警晤不羣弱冠小試不

利因下帷攻苦嘉靖戊午舉人壬戌進士王秉乘少司馬李公傳任歸安令

時巡方使者按浙立清廉貪酷四牌諭各邑令自審政績立牌下

眾競趨清廉松獨立酷牌下使者驚異詰之松曰讀聖賢書叨甲

第頗知自愛貪則斷不敢出清廉亦自分未能歸安豪右世族非

嚴勿治酷或有之使者動色稱奇畿輔唐志密屬以緝捕豪勢因構禍

幾不免謫州判正直之氣不以微官故少貶李公傳遷滕縣令畿輔唐志

繼主工兵曹政皆有狀李公傳累遷遼東甯前道僉事畿輔唐志丰稜表

著威惠並施李公傳歷十二載進副都御史巡撫遼東三年軍民悅

戴以艱歸畿輔唐志

福時東安人本姓張福時其名也諳韜鈴善騎射世宗朝以世職

歷官漕運叅將值河決僂運八載飛輓為諸郡先大學士徐階兵

部尚書楊博皆知之晉掛印總兵官鎮淮安督漕如故世宗常品

論羣臣有清不過福時勇不過馬芳之語及徐楊去國福亦罷歸

卒世宗凡敕時手書名而不氏故以為改福姓云畿輔唐志七十四

王价大城人少孤介動必循禮言笑不妄發長而讀書邑中每晨詣書舍道經先師廟必入揖乃往坐齋中雖盛暑未嘗去衣巾明世廟時以貢舉遊京師銓部顧芳春當代偉人也聞价名令二子受經焉逾年補江南無錫縣縣丞顧聞之駭然來謝曰公才宜作推知盍早使我聞諸价怡然曰豈有受秩公朝而拜恩私第者乎故不敢顧嘉歎再四而去無錫者卽顧里也舊例縣丞到任糧長初見白銀各五兩以爲贄禮里擴三百六十合之可得千八百金价至痛懲其弊皆併去一邑驚愕縉紳苞苴不行事不便民者與縣主每力爭堂官始怒甚既而悔曰王公君子也以故官微而多惠政親友規以不近人情者卽正色曰如君之言必盡取無義之財始爲近人情乎言者愧謝而去卒於官貧弗能斂適顧解組回里感价之高潔同貲助之始得扶柩歸子應亨

王秉乘縣佐王公傳

王時舉順天通州人

明史楊思忠傳 矣通州志云字晉卿號養吾其先江西人洪武初始祖英充錦衣衛徒

通嘉靖四十年進士授河南府推官偃師縣有田黃二姓指腹約婚黃生女秋雲田生男克普婚遂定後黃通顯田貧不能聘黃欲寒盟女請於母密遣鄰姬約克普暮至某所遺以金使備禮娶歸克普喜甚露其實於友朱龍沈橋龍橋思攘其貨醉克普酒暮造約所果有金在地持以行時秋雲同鄰姬睨於旁姬訝非田生且熟二人面呼其名叱之二人懼事露剽及掠金去克普醒往見兩尸血淋漓仆地驚走遺一履不及躡血漬襟袖事發不能辨坐抵罪時舉至疑其冤按之未決夜夢女子訴曰某某實殺妾者逮田生枉矣覺而異之審夢中狀捕二人至一訊卽服發其金猶在也抵以法田生得釋擢監察御史

通州高志

四十五年十月時舉劾刑部

尙書黃光昇言內官季永以訴事犯乘輿本無死比乃擬眞犯奸

人王相私閹良民者三本無生法乃擬矜疑宜勒令致仕帝怒明史

楊忠傳謫徙延慶衛隆慶改元復官畿輔唐志七十四召補山西道御史巡

按貴州時戎備久弛土獠肆掠時舉檄各道督游校偵察之懸賞

厲戒期撲亂首分別土司地界界內有亂酋長連坐羣盜盡息時

陳皇后無子通州高志帝頗耽聲色陳皇后微諫帝怒出之別宮外庭

皆憂之明紀三十七時舉於萬里外疏請正位中宮以端治本通州高志語

極切直畿輔唐志帝方廣市珠寶疏陳奢靡之害臺諫有被謫者申救

甚力至議屯田議鹽政議貴陽更置城邑無不切中時繫萬厯初

掌河南道疏請復建文年號大義侃侃通州高志累遷大理少卿卒畿輔

唐志年四十六逾月妻董舉子實堅妾王亦有遺娠舉子實穎人以

為天錫之嗣云祀鄉賢通州高志

崔鑑順天人年十三大興張志父嗜酒狎娼召與居娼恃寵時時陵鑑

母父又被酒數侵辱之一日娼惡言詈母母復之娼遂擊敗母面

母不勝憤入室伏牀而泣將自盡鑑自學舍歸問之母告以故鑑

曰母無死即走至學舍挾刃還娼適掃地且婦且詈鑑拔刃刺其

左脇立斃乃匿及牖下亡走數里忽自念曰父不知我殺娼必累

我母明史列傳我安忍以為母者累母耶大興張志急趨歸父果訴於官將

繫其母矣鑑至告捕者曰明史列傳殺人者我大興張志非母也眾見其幼

不信鑑曰汝等不信請問凶器安在自出刃示之眾乃釋母繫鑑

寘獄事聞下刑部讞尚書聞淵等議鑑志在救母且年少可矜難

拘常律帝亦貸其罪明史列傳

王原文安人父珣貧窶苦里役謀於妻張氏曰吾單弱不能支門

戶今躬耕薄田數十畝其直不能辦一歲差使地去差存吾與汝

俱不免為餓殍吾將逃焉汝母子守薄田勤紡績庶可存活別後

勿相念也出而不告所往張氏撫原煢煢以居原幼多病及長問父存亡母曰汝父累於貧棄家避差迄今已二十年矣紀常王原大悲慟乃設肆於邑治之衢治酒食舍諸行旅遇遠方客至則告以父姓名年貌冀得父蹤跡久之無所得明史列傳一日跪其母前曰吾將去尋父以歸母曰汝父去家二十年不通音耗尋可得乎原仰天而號曰人而無父何以爲人泣與母別王孝子傳乃去之齊魯數年至田橫島居易錄時日已西沉颶風甚急止宿於岔口口土神祠王孝子傳夜夢入古刹日當午見廊僧方炊就乞食僧與之一盂曰此莎米飯也味甚爲汝澆以羹居易錄乃肉汁也曰甘乎曰甘已復口誦偈授之曰如來如來眞箇來好去好去還須去忽聞剝啄聲而寤大泌山房集一丈人攜杖而入問原奚自原以實對丈人曰鶴鳴于天其子隨其影以周旋今形影不相屬而卒以相合不敢許爾王孝子傳

子傳原告之夢丈人曰日當午南方也莎草根附子也調以肉汁附子膾也急去當於寺中求之原謝而行抵輝縣入帶山夢覺寺山有寺名曰夢覺曰愍報會大雪宿山門下居易錄一苾芻出見而駭之曰少年何處人何以至此原噤日文安人尋父而來曰識其顏乎曰不識也引至禪堂住持哀而食之粥王孝子傳是時珣方在寺爲僧居易錄住持素知珣文安人因召而問曰汝識此少年乎曰不識也曰同桑梓曷敘寒温珣曰汝父爲誰曰某珣呼原乳名不覺欷歔原曰是也相抱而哭珣無歸家意曰拋棄妻子二十餘年有何顏面見汝母原以頭觸地牽珣衣望住持哀而大號住持曰天作之合非人力也強之行住持號法林詩僧也口占七言以贈之曰豐干豈是好饒舌我佛如來非偶爾昔日曾聞呂尙之明時罕見王君子借留衣鉢種前緣但笑懶牛鞭不起歸家日誦法華經苦惱眾生今

有此王孝子傳原遂奉珣以歸年六十有四矣又二十年始卒居易錄有

司上其事聞於朝詔旌其門原年亦八十有四有子六人孫一十

五人曾孫二十有二人應霖應期舉進士大泌山房集居易錄

李亨廷名缺以字行香河人生而穎悟偉軀美髯喜結交不論貴賤施

予不望報酬好獎進善類而能化惡縣有周猴兒者素無賴偵亨

廷出知厚攜伏百家橋將發矢劫之亨廷下馬前曰若非周猴兒

耶何無賴若此猴厲聲應曰饑寒迫耳亨廷曰男兒墮地何往不

得衣食乃假途綠林乎吾居邑里不見敬是吾德不修也乃取橐

中所有厚遺之且諭曰後勿復為若然則棄東市者皆若曹也猴

兒感泣而去後遂易行從善通州役于四為亨廷中表姪會臺使

者以訪事屬刺史而四與焉寶坻人某與張監生某睚眦久矣乃

重賄四欲置張於訪亨廷知之令四毀單以滅其跡張得免禍亨

廷亦不令知也先是歲歉饑民死者枕於道廷亨捐橐理朝陽菴

養里中殘疾無告者全活甚眾亨廷赴試河間府距邑四百餘里

聞廷亨名願識面者趾相錯也嘉靖間擢貢得館陶縣訓導不出

惟務耕讀家居聞邑長鳴金過門必正冠鵠立俟金聲絕乃止其

誠敬類此崇祀鄉賢香河劉志

姜璧字元卿文安人畿輔唐志生而馴謹篤學領隆慶庚午舉人

辛未進士文安楊志授安樂令邑有大俠王彥飛橫行鄉里睚眦殺人

兵備使者素之不得璧至召諸賊曹畿輔唐志語之曰若輩受賕縱奸

梟當死能縛玉自贖當貸若梟眾恐願自效即共為具飯王中酒

伏健兒急縛之度已得王又虞有道劫者預飭尉率健卒逆之劫

者猝遇尉悉駭走遂逮彥飛至庭文安楊志立斃杖下眾凜然任五年

擢御史按淮上畿輔唐志時淮揚飢奸民以其間競為私鑄商販不通



百姓嗷嗷幾釀大亂璧檄所司禁私鑄而亟發金錢萬餘倉粟數千賑之始以事聞全活甚眾於時黃水入淮淮大溢總河大臣與撫臣相掣肘而有司行河者率委之倖貳又有議罷范公舊隄勿修而別開支河者璧言佐貳權輕不如專任守令大臣事權不一難責成功宜罷總河以其事歸撫臣便又言河口外高內下文安楊志開支河則引倒流之潮恐開私販之路不若修范公廢隄使內水不出外水不入外不損鹽竈之地內不傷耕植之田疏凡數百言皆鑿鑿可行部覆如議唐志以外艱歸服闋出按中州中州宗室最眾而祿不給文安楊志巡撫御史褚鈇議稍減郡王以下歲祿均給貧宗帝遣給事中萬象春就周王議新會王睦棖號於眾曰裁祿之謀起於睦棖聚宗室千餘人擊之裂其衣冠上書抗詔明史諸王傳人情洶洶璧時方在道聞之即疾馳入大梁捕其謀主袁東魯數

人令武卒列伍備非常始疏陳其狀有詔罪首惡而釋其黨中州晏然璧常言治大狷宜緩急則謀洩而易脫平大眾宜急緩則黨固而難安真名言也河南贖緩歲額四千後漸倍之璧曰此膏脂也非刑罰嚴峻何至是疏如舊額雖陳東達曹徐西接毫潁故設有兵巡道彈壓盜賊久而罷至是有議復者璧言增官則增費若改清運道兼屯鹽而以屯鹽道移駐睢陳則事專而費省議雖寢識者是之文安楊志擢撫鄖陽罷歸孫銓唐志銓字總六別號山啟朗眉秀目方脣豐頤祖愛若握珠總角從高陽孫承宗授句讀以國器目之萬厯壬子舉人仕肥城令肥夙號難治至則一意與民休息立傳帖革坐簽民鮮追呼之擾有殺其妻而疑其鄰者獄具公驗其痕皆寸許疑斧形夫輒悟曰數日前其屠屠沽兒貸弗應蓋屠沽兒之解大輒也恆操斧云遂伏辜陞

光州牧時流氛孔棘光有兩城其北單弱而倉庫寄焉遂嚴修備  
卽一株一鋸不需民間而守禦備光人藉以無恐臺使者上其績  
擢杭州同知杭郡衝煩甲天下盜竊兇窟往來茗雪蕭湖間羣起  
標聚眾莫敢撻銓廉得其狀發奸摘伏卽市偷巷竊訊無弗獲擢  
漢中知府當兵燹後加意拊循勞瘁成疾罷歸

太守姜山啟傳

楊惟清字子廉先世自淮安徙通祖景芳業農家頗贍嘗遇一士  
人餒甚詢之乃避難無依者款於家留三載去其人後登第來謝  
及任府尹數造門敦請景芳終不詣其署其高潔如此

通州高志

惟清

少窮經史學問淹博萬厯元年舉人授山西太谷知縣潔已愛民  
多善政家居極謹厚犯亦不校里中有無辜罹法者力雪其冤嘗  
貸金於人弗能償焚其券弟惟洪惟治相繼登甲乙科子八人皆  
力學次子若桐號虞律天啟元年恩貢生授江南睢甯知縣報最  
將遷尋乞歸崇禎甲申城破爲流賊所執不屈死年八十餘惟洪  
子若梓字原育生有至性數歲父卒事母張以孝著登萬厯四十  
一年進士授河南信陽知州禁絕耗羨判決如神不以案牘假胥  
吏手著有申陽末議皆足爲吏治法初若梓甫莅政監司洪某意  
輕之易服矚其聽訟閤者密以告訊讞自若洪由是異其才凡疑  
獄悉委鞫焉歲旱步禱跪烈日中雨立至謂未霑足跪如故監司  
掖之起人感其愛民之誠居恆勸農桑興學校爲士子校文藝多  
所造就課最擢禮部祠祭司員外郎攝儀制司事值神宗光宗相  
繼崩熹宗嗣位大禮疊至若梓敬慎將事無纖悉闕略廷議改元  
謂光宗初立詔以明年爲泰昌今一月而崩紀元焉屬若梓建言  
曰一年三君前代所無若仍以明年爲泰昌則無以處今上若遂  
以明年爲天啟則無以存先帝皆不可請以今年八月後改爲泰

昌元年明年爲今上天啟元年既存先帝之元又尊今上之統庶  
於情理爲愜閣臣九卿皆是其議具奏報可弟惟治通州高志惟治字  
子理惟清弟性篤孝父母卒哀毀幾殆廬墓所晨夕長號不已登  
萬曆二十年進士授河南南陽知縣地當孔道多供億惟治經紀  
有緒不困郵傳值歲祲大疫亟請發廩以賑搆藥選醫多方濟之  
活者幾萬人盜賊竊發設法掩捕悉駭散中使奉命開礦惟治力  
爭南陽無礦甯歲輸二百金以安山谷及民間廬墓大災後賦莫  
辨婉諭急公不以追呼擾民聽訟矜宥小過惟豪強故犯務寘之  
法三年邑大治舉卓異第一擢刑部主事累遷郎中嘗盛暑閱獄  
見圍扉早閉多蒸鬱厲氣憐之許每晨啟戶納涼著爲令居刑曹  
九年遷河南布政司參政礦盜嘯聚民倉皇出走馳檄撫之盜卽  
散擢陝西按察司致仕歸喜作樂府詞千言立就每歲按部使者

造門請謁謝弗見見亦不及私畿內有警與州守登陴畫地固守

捐貲修城樓櫓屹然以資保障崇禎辛未年七十四卒季子若橋

成進士歷官至御史著有香雪齋集通署詠行世通州高志

王大用霸州人逮事敬皇帝爲奉御侍慈壽皇太后於仁壽宮毅

皇帝時陞御馬監太監賜蟒衣內苑乘馬通顯矣然性刻廉剛直

弗能下其儔輩以是不得久內庭出爲遼府承奉是時遼莊王病

不能視事委政國妃毛氏國妃賢通書史沉毅有斷而大用從內

佐之所釐正國家事不可勝道頃之莊王與國妃相繼薨嗣王立

王聰敏辯給而嗜利刻害及長多不法常出數百里外遊戲有司

莫敢止故無所憚然心獨憚大用好直諫王積弗能忍乃曰

承奉老矣宜免朝請於是大用希得見王王少無子所幸樂婦生

子置外舍久之王有痿病度終無子乃取外舍兒內宮中時兒已

八歲詐曰宮人某氏子欲以聞於朝故事王子生承奉司郎具所  
生母姓名及產媪狀關相長史乃得奏附玉牒王以其事下承奉  
大用曰王安得有子承奉乃不識何宮人有娠及及產子狀不敢  
奉令王大怒曰老奴敢爾者死邪於是盡捕大用諸用事者皆榜  
笞數百被重罪欲以迫脇大用大用終不爲動王乃召大用繆爲  
好語曰而不知予之爲病耶事成而後有主而富貴可長保獨奈  
何爲他人忠大用伏地叩頭流涕曰老奴受國厚恩死無以報顧  
此事涉欺罔法例嚴甚王子非眞子外悉知之後有發者禍且不  
測老奴死不敢奉命王謬謝曰承奉言是也乃以計給奪其印而  
自署承奉名行之大用既見欺無可奈何懟以首撞壁大叫曰生  
不幸爲刑餘又棄外藩今王所爲如是吾弗能匡救禍且及矣誠  
不忍老見刑獄卽閉戶自經繩欲絕會有救者得甦日夜涕泣竟

至失明以死國人悲焉

張居正王承奉傳

華陽吳祖椿校

人物志八

光緒順天府志九十八

先賢八

黃岡洪良品纂

明

李三才

傅好禮

龔先進

侯拱辰

何選

岑應春

王嘉謨

邢孔陽

馬經綸子健順

劉渠

米萬鍾

梁應澤

張邦紀

張奇勛王溥

王好善

李天麟

鄧希皋

袁住

孫祖壽

楊春元子光夔光龍

劉廷諫

何呈瑞

于奕正

王愛

崔玉乾

紀汝清

王珍

賈應鶴

宋一鶴

王來聘

陳所聞

曹鳴鶚

任之華

王孕懋

張文炳

紀克揚

劉廷訓

周騰蛟

阮漢聞

朱之馮

劉文炳

鞏永固

成德

金鉉

王承恩

高時明

申湛然

劉德瀆

史可法

閻應元

米壽圖

黃彛

崔子忠

王嘉猷

曹廣攄

顧仲禮

張法保

陳霖

袁重

祝綸

裴成錦

楊一訓

歐俊

奴滑忠

劉然勝

王萬盛

柳芳

孟振

侯顯

宏

苗必進

張致和

午

李致中

李致和

芳

李致中

李致和

邦

郭龍

李致和

魏

郭龍

李致和

邦

郭龍

李致和

敦

郭龍

李致和

陳

郭龍

李致和

永

郭龍

李致和

城

郭龍

李致和

韓

郭龍

李致和

吳

郭龍

李致和

劉

郭龍

李致和

李

郭龍

李致和

淮

郭龍

李致和

樊

郭龍

李致和

明

郭龍

李致和

李三才字道甫通州人萬曆二年進士授戶部主事歷郎中與南樂魏允貞長垣李化龍以經濟相期許及允貞言事忤執政列傳

真天序志九十八

二

帝責允貞言過當

明史魏允貞傳

三才抗疏直之坐謫東昌推官再遷南

京禮部郎中會允貞化龍及鄒元標竝官南曹益相與講求經世

務名藉甚遷山東僉事所部多大猾積盜廣設方略

明史列傳

通州高志民歌思之

明史紀事本末六十六

尋以右僉都御史總督漕運巡撫鳳

陽時礦稅使四出攘奪公行稅監陳增尤甚

通州高志

數窘辱長吏獨

三才以氣凌之裁抑其爪牙肆惡者嘗密令死囚引為黨輒捕殺

之增為奪氣

通鑑輯覽一百一十二

姦民趙占元李大榮等以礦稅故起為

盜三才捕斬之

通州高志

再疏陳礦稅之害

明史列傳

略曰自礦稅繁興萬

民失業陛下為斯民主不惟不衣之且併其衣而奪之不惟不食

之且併其食而奪之征推之使急如星火搜括之令密如牛毛今

日某官拏問明日某處怠玩稅課罷職上下相爭惟利是聞加以

無賴亡命假旨取財得銀方止如此者聖心安乎否乎且一人之

心千萬人之心也皇上愛珠玉人亦愛溫飽皇上愛子孫人亦愛

家室皇上欲使黃金高如北斗而不使百姓有糠粃皇上欲子孫

千萬年而不使百姓有一朝夕試觀往籍幾有朝廷如此政令天

下如此景象而不亂亡者哉

歷代名臣言行錄二十四

踰月未報三才又上言

臣為民請命月餘未得請聞近日章奏凡及礦稅悉置不省此宗

社存亡所關一旦眾畔小民皆為敵國風馳霧驚亂眾麻起陛下

塊然獨處即黃金盈箱明珠填屋誰為守之亦不報三十年帝有

疾詔罷礦稅俄止之三才極陳國勢將危請亟下前詔不聽清口

水涸阻漕三才議濬渠建閘費二十萬請留漕粟濟之督儲侍郎

趙世卿力爭三才遂引疾求去帝惡其委避許之

明史列傳

南北臺省

交章乞留御史史學遷疏言陛下以陳增故去三才非所以抑姦

邪扶正氣不報三才遂去淮之徐州連疏請代未得命會侍郎謝

杰代世卿督儲復請留乃命三才供事俟代者帝亦竟不遣代也

明年疏言天變人離睢州又有巨盜請免徵求以紓民困亦不報

通州高志既而睢盜就獲三才因奏行數事部內晏然明史列傳歛人程守

訓以賞官中書為增參隨縱橫自恣三才劾治之得贓數十萬增

懼為己累亦搜獲守訓違禁珍寶聞於朝論死遠近稱快通鑑輯覽一百

二十顧憲成之講學東林也好臧否人物三才撫淮久結交徧天下

與憲成相得尤深三才揮霍有大略以折稅監得民心淮徐歲祲

又請振卹蠲馬價准人愈德之三才屢加至戶部尚書內閣缺人

建議者謂當參用外僚意在三才及都御史缺需次內召由是忌

者日眾謗議紛然工部郎中邵輔忠首劾三才大奸似忠大詐似

直明紀四十七三才四疏力辨且乞休給事中馬從龍御史董兆舒彭

端吾南京給事中相繼為三才辨大學士葉向高言三才已杜門

待罪宜速定去留為漕政計明史列傳一時劾者救者朝端聚訟通州高志

前吏部郎中顧憲成遺書葉向高謂三才至廉至淡漠勤學力行

為古醇儒當行劾以服諸臣心明史紀事本末六十六又貽書孫丕揚力辨

之明紀四十七御史吳亮刻之邸鈔中攻三才者大譁明史顧憲成傳御史喬

應甲劾三才十貪五奸帝皆不省三才請罷疏十五上久不得命

遂自引去帝亦不罪三才既家居忌者慮其復用御史劉光復劾

其盜皇木營建私第侵奪官廩為圍囿三才憤甚自請籍其家又

請諸臣勘帝命御史李儀徵給事中吳亮嗣往勘通州高志其明年光

復坐事下獄三才陽請釋之而復力為東林辨白曰今奸黨讐正

之言一日東林一日淮撫所謂東林者顧憲成讀書講學之所也

從之游者如高攀龍姜士昌錢一本劉元珍安希范岳元聲薛敬

敷竝束身厲名行何負國家哉偶曰東林便成陷穽如鄒元標趙



南星等被以此名即力阻其進所朝上而夕下者惟史繼借諸人

耳人才邪正實國祚攸關惟陛下察焉疏入衆益恨之亮嗣既往

勘久之無所得第如光復言還報遂落職爲民明史列傳天啟二年復

起戶部尚書未上卒畿輔唐志七十一後魏忠賢亂政其黨御史石三畏

追劾之詔削籍奪封誥崇禎初復官通州高志三才英邁豪雋傾動士

大夫負重名當世才大而好用機權明史列傳由是爲衆所忌毀顧擊

三才者若邵輔忠徐兆魁輩咸以附魏忠賢名麗逆案而推轂三

才若顧憲成鄒元標趙南星劉宗周皆爲時名臣故世以三才爲

賢三才所著有雙鶴軒詩集灼艾集無自欺堂稿誠恥錄行世通志

傳好禮字伯恭固安人萬厯二年進士知涇縣擢御史嘗陳時政

請節游宴停內操罷外戚世封止山陵行幸又上崇實杜漸諸疏

語皆剴直巡撫浙江歲大祲條上荒政行部湖州用便宜發漕折

銀萬兩易粟賑飢明史列傳自陳擅發罪上特宥之畿輔唐志七十一改按山

東泰安州同知張壽明當貶秩文選郎謝廷案用爲永平推官謂

州同知六品而推官七品也好禮馳疏劾其非制廷案坐停俸壽

明改調好禮尋謝病歸召進光祿少卿改太常明史列傳時稅使四出

奸民張禮等僞爲官吏羣小百十人分據近京要地稅民間雜物

弗予捶至死明紀四十四好禮上疏極論其害一統志因言自朝鮮用兵

畿民富者貧貧者死思亂已久奈何又虐征之國家縱貧亦不當

頭會箕斂括細民續命之脂膏况奸徒所得十萬輸朝廷者什一

耳陛下何利爲之奏入四日未報明紀四十四復具疏跪闕下三日神

宗震怒降廣昌典史既而上思好禮言下其疏誅奸民張禮等二

十八人害乃除畿輔唐志好禮之官未幾請急歸家居十五年卒明史列傳

天啟中贈太常卿一統志崇祀鄉賢祠子商衡字伯舍孝友稱於閭

里曾舉優行同子生員國樞國樑儒士國楠俱死節固安志

龔先進字彬庵密雲人居鄉愿恪以孝友稱萬曆六年授湖州府

通判時郡頻歲水災漂沒民舍先進設法全之既丁外艱服闋補

大同府通判署懷仁縣知縣值荒旱民飢肆市皆罷乃為發倉廩

停征徭齋心步禱甘霖沾足俄以忤權貴左遷陝西布政司知事

秩滿補鳳陽府通判為政簡易不事催科歲當徵下縣漕米頑猾

多逋賦上官將待其逾期劾之民間微聞是言爭先輸納訖事反

在諸邑先上官喜將列課最先進已絕意進取遂解組歸杜門不

出地方有司重其人每造廬存問之卒年八十三子翼明戶部員

外郎孫蕃錫興安府知府密雲志

侯拱辰大興人畿輔唐志尚壽陽公主明史公拱辰夜歸府遇一

人偃蹇太甚執而撻之少頃則有中使趙祚者倚醉入府扭結拱

辰窘辱甚至詢之則被撻者其家奴而祚則永甯公主所役也拱

辰憤甚上疏旨下笞祚而已仍戒拱辰毋生事野獲編拱辰掌宗

人府明史公五十餘年凡所建言皆慷慨切直萬曆中青宮久虛

廷臣擬上疏莫敢首署名者拱辰曰會典以宗人府為文職第一

願首署名至冊封代王與挺擊獄起拱辰據經引義無所顧忌國

事者定畿輔唐志卒贈太傅諡榮康明史公主傳案明史以壽陽公

與讓考劉若愚酌中志沈景倩野獲編均以嫁侯拱辰者為壽甯

公主嫁再與讓者為壽陽公主若愚親給事宮掖景倩亦當時人

聞見較確疑明史之誤姑存以俟考

何選字靖卿宛平人萬曆十一年進士除南昌知縣徵授御史明

列十四年給事中姜應麟首抗疏請立元嗣為東宮貶廣昌典史

大學士申時行率同列再請建儲不聽通鑑輯覽選語鄭貴妃

弟國泰以朝野公論鄭氏禍福懇言於妃俾自請國泰猶豫唐志

七十選厲色責之曰若不及今為身家計吾儕羣擊之悔無及矣

國泰懼乃入告於妃且疏請早定以釋危疑明史已知出選意銜

之唐志未幾吏部議調驗封員外郎鄒元標於文選疏六日不下

選以為言帝憶前事謫湖廣布政司照磨稍遷南京通政司經歷

刑部缺員外郎吏部擬用選帝憾未釋謂特降官不當推舉切責

尚書孫丕揚等而斥選為民明史天啟中贈光祿少卿一統志

岑應春字繹仁本徽州汪氏父宗沆挈家之京師應春生三歲父

歿母貧不能自存改適州吏岑某撫於岑遂從岑姓為通州人好

學工文聲譽早著登萬曆十四年進士授工部屯田司主事營山

陵與中官相忤出董清河陶務清河人歲辦陶千里輸納所司核

當否乃返陶所受直然曰辦曰輸曰核無不為陶人難者清河人

輒以陶死比受直又多侵蝕應春憫之為立法甫陶出即予直附

糧艘赴納囑所司曰陶所已核勿再擾也疏請勒石以紓陶人困

備兵東充荒多盜人相食悉心賑濟盜賊旋息遷寄嵐副使為

設新障百八十里邊人稱岑公堡焉卻羨縉絕供應政績卓然朝

議有論清不如法者詔鑄秩向所忤中官中之也年五十五卒葬

州城南後十餘年清河人段世正過墓所猶感治陶之德痛哭拜

奠而去子廣序歷官監司苑馬寺卿通州高志

王嘉謨字伯俞順天人父應祥以武舉官至署都督僉事有善行

同巷有張翁者疾革語其子曰吾觀里中為善最篤者莫如王干

兵吾將受生其家矣汝欲見盍訪之張翁逝其子走叩都督家嘉

謨果生矣生而穎慧異常成萬曆丙戌進士授行人奉使列藩餽

遺無所受以才望選禮科給事中宛平志疏請建太子因災變請上

修省糾參權璫田義八罪等奏直聲震一時陞授陝西參議調四

川參政平播酋之變以終養告歸大興張志卒於家嘉謨生平好讀書

不妄交游著有薊邸集四十卷宛平王志

邢孔陽字公昭文安人萬厯進士畿輔唐志七十四授行人奉使冊封高

麗事竣賜金幣晉戶部主事鄒元標計部邢孔陽傳督代州餉羨金萬

餘司吏以獻孔陽峻卻之遷郎中管通州漕儲河道事時河決不

時畿輔唐志疏論治河者欲復故道以殺河流治漕者引河流以濟運

艘各言所便今引流緩沁衛不可忘漕宜修海運不可棄遣屬邑

分淪勿逼而南由清入海別引沁水從魏博折而東之以資運滌

俾南入海旱俾東入運儀瓜北河流如帶當宿重兵防扼吭焉築

堰疏流為急治洪建閘為上合二臣職掌而一之有攸濟矣總河

中丞潘季馴嘉孔陽議可經久之通倉有三成處西部陸運較

水運倍孔陽相地形疏渠自南徂西抵倉三里許用力寡而見功

多通人甚賴之押運官有返帆銀入府染指者恆侵半孔陽給時

封識如舊會陝西告災司農欲移京粟萬餘由漕運達河南令南

陽汝甯陸運於潼關孔陽聞之馳書告司農曰移粟之役是以三

十鍾致一石將斃河南而緩陝西之救何若馳一吏入羅關內借

支省藏京粟航於中州令富室糴之入鏹關內以補借支之數且

免陸運之役是萬夫跋涉一吏代之千里餽糧一旦甦息矣卒從

其議民皆樂於輸助開口自大通橋至通州共六啟閉為蓄水通

運計適豪商運皇木由閘達京以省陸運之費孔陽視之謂閘設

為糧計非為木計萬一木植衝閘咎將誰歸商借與援請益力孔

陽持益堅抗疏上聞以此當途皆銜之遂拂袖歸兩臺屢以人才

疏薦孔陽堅不起年七十餘卒邢孔陽傳

馬經綸字主一通州人萬曆十七年進士明史列傳授山東肥城知縣  
挾仁贈編以往仁贈編者皆集先達格言以爲治具者也至任以  
召募代徭役以浮羨充丁糧闕至道書院以課士易土城以石繕  
修堅固既竣曰民罷矣引邳邑隔徵例請寬歲額若干考最擢監  
察御史時尙書孫丕揚奏丁此呂貪縱戎政侍郎沈思孝疏救此  
呂經綸以思孝爲首禍之臣請斥罷大意謂息辨胎以息禍胎息  
正人君子之禍以息宗廟社稷之禍語多切直時論韙之又因海  
防兵譟疏陳五策并條上邊薊五事通州高志帝素惡諸言官欲因罪  
之明紀四十三時以兵部考察不當上意以兩京科道不言旬日中被  
斥三十有四人中外震恐通州高志趙志皋等申救至再孫丕揚在告  
亦借九卿力諫石星請罷職以寬諸臣皆不納陳于陛又特疏申  
救帝怒命謫降者悉調邊方雜職丕揚等以詔旨轉嚴再疏乞宥

帝益怒盡斥爲民明紀四十三經綸憤甚抗疏曰頃奉嚴旨斥逐南北  
言官臣幸蒙恩罰俸供職今日乃臣諫諍之日矣陛下數年以來  
深居靜攝君臣道否中外俱抱隱憂所恃言路諸臣明目張膽爲  
國家裁辨邪正指斥奸雄雖廟堂處分未必盡協輿論而搢紳公  
議頗足維持世風此高廟神靈實鑒佑之所資臺省耳目之用大  
矣陛下何爲一旦自塗其耳目耶夫以兵部考察之故而罪兵科  
是已乃因而蔓及於他給事又波連於諸御史去者不明署其應  
得之罪留者不明署其姑恕之由雖聖意淵微未易窺測而道路  
傳說嘖有煩言陛下年來厭苦言官動輒罪以瀆擾今復變而以  
箝口罪之夫以無言罪言官言官何辭臣竊觀陛下所爲罪言官  
者猶淺之乎罪言官也乃言官今日之箝口不言者有五大罪焉  
陛下不郊天有年矣曾不能援故典排闥以諍是陷陛下之不敬

天者罪一陛下不享祖有年矣曾不能開至誠牽裾以爭是陷陛下之不敬祖者罪二陛下輟朝不御停講不舉言官言之而不能卒復之是陷陛下不能如祖宗之勤政罪三陛下去邪不決任賢不篤言官言之而不能強得之是陷陛下不能如祖宗之任人罪四陛下好貨成癖御下少恩肘腋之間叢怨蓄變言官俱慮之而卒不能批鱗諫止是陷陛下甘棄初政而弗獲克終罪五言官負此大罪陛下肯奮然勵精而以五罪罪之豈不當哉奈何責之箝口不言者不於此而於彼也日者廷臣交章論救不惟不肯還職而且落職爲民夫諸臣本出草莽今還初服亦復何憾獨念朝廷之過舉不可遂大臣之忠懇不可拂陛下不聽閣疏之救改降職爲雜職則輔臣何顏是自離其心腹也不聽部疏之救改雜職而編氓則九卿何顏是自戕其股肱也夫君臣一體元首雖明亦賴

股肱腹心耳目之用今乃自塞其耳目自離其腹心自戕其股肱陛下將誰與共理天下事乎夫人君受命於天與人臣受命於君一也言官本無大罪一旦震怒罪以失職無一敢抗命者既大失人心必上拂天意萬一上天震怒以陛下之不郊不禘不朝不講不惜才不賤貨咎失人君之職而赫然降非常之災不知陛下爾時能抗天命否乎臣不能抗君君不能抗天此理明甚陛下獨不思自爲社稷計乎明史列傳疏上帝大怒亦貶三秩出之外明紀四經綸既獲譴工部都給事中海陽林熙春等上疏曰陛下怒言官緘默斥逐三十餘人臣等不勝悚懼今御史馬經綸慷慨陳言竊意必溫旨褒嘉顧亦從貶斥是以建言罪耶抑以不言罪耶臣等不能解也前所罪者既以不言之故今所罪者又以敢言之故令臣等安所適從哉明史列傳帝益怒加貶經綸爲典史後南京御史林培

疏陳時政帝遷怒經綸竟斥爲民旣歸杜門卻掃凡十年易簣時友人張祥來視曰到此全要主持答曰學道有年到此時纔是學道正容端坐而卒年四十四州人巷哭肥城人爭來視喪通州門人私諡聞道先生一統志天啟初復經綸官贈太僕少卿祀鄉賢子

健順通州高志

健順字貞元少孤能讀書崇禎初貢生同學韓登瀛好內典及諸禪語錄健順獨究程朱宗旨以經傳格言爲本然亦時露超悟或問讀古書苦不解又不能憶奈何健順曰淵明不求甚解東坡不求甚熟得此二法能解能憶矣將卒告諸子曰君子不憂不懼吾不能也吾所謂知憂懼者也卒年四十九馬健順傳

劉渠字玉川保定人修幹闊臂鷲勇絕人游京師肄業武庠遂精騎射萬厯壬辰倭寇朝鮮國王李叒棄玉京奔平壤倉皇求救明

以朝鮮屬國爲遼左唇齒以大將軍李如松往援之募壯士與俱渠仗劍往從之凡兩載克復平壤前敵斬倭首有功凱旋授錦衣衛中所試百戶世襲復歷京營參將時京城外海子等處響馬數十縱橫劫掠渠悉擒無遺路不爲梗邊卒數百人譟殺其帥取路潞河而南且行且掠晚宿民家汚人婦女渠偵得之引兵夜趨盡撲殺之當事上其績進正千戶丁巳遷延綏東協副總兵值套寇薄邊渠伏兵以待及至發伏縱擊之遂獲全勝兼得馬駝牛羊無算於是大刀劉將軍之號時與劉綎齊名朝廷數下璽書褒美戊午因撫順等城告急又令鎮守薊永山海兼備倭總兵署都督僉事移鎮山海應援薊遼辛酉命提調出關援遼遷都督同知駐守盤山驛賜蟒玉加太子少保掛援遼前將軍印駐劄高平堡時經畧熊廷弼與巡撫王化貞議論不合渠歎曰勢值盤錯尤宜同心

決策以弭禍患今齟齬若此胡以濟乎會警報星亟渠擐甲秉堅  
東至沙嶺伏兵起四面合圍自辰至酉奮臂疾呼激勵將士莫不  
爭盡死力終無一旅相援渠登高四望知勢不可支遂以將軍印  
付家人黃雄等上還朝廷望闕叩頭曰臣荷重恩夙夜思維以圖  
報効今血力已竭惟有粉身以謝耳言訖躍馬突圍日皆盡裂力  
戰既久血鎧盡赤身矢蝟集遂歿於陣歿之夕有大星殞於東北  
其聲如雷子二長應捷次應宣世襲錦衣衛柴經國劉將軍傳

米萬鍾字仲詔宛平人畿輔唐志萬曆二十三年進士明史文苑傳令

永甯銅梁調六合入為大理評事由戶部郎歷陞至江西按察使

山東右布政使大興張志工書與董其昌齊名時稱南董北米一統志逆

閻魏忠賢方毒禍朝紳萬鍾與之鄰閻求其書翰不應又屬其私

人謂能少屈即上卿開府可得也萬鍾笑曰乃公即願富貴少年

時稍垂項沒肩上卿開府已久今老矣豈有三十年共姜垂老獻

笑者乎拒之甚力閻怒無以中之會從江右歸道經南京守備太

監為閻構生祠聞其至奉幣求為文以頌上公萬鍾斥其人去閻

聞益怒大興張志嗾倪文煥劾為黨人畿輔唐志遂削籍崇禎初起太僕少

卿卒官明史文苑傳生平好石人稱為友石先生大興張志家藏一研山有

七十二峯洞壑奇絕每天欲雨則水出欲霽則先燥萬鍾以五百

金購之又寶一風字硯萬鍾知六合縣時嘗入覲往返兩月餘硯

墨猶未燥也池北偶談十九嘗構漫園勺園又構湛園標園中佳勝為十

八題因哀集一時賦詠類為湛園雜詠四庫全書提要所著有澄

澹堂文集十二卷詩集十二卷易義四卷象緯兵鈴十二卷石史

十六卷南北史宮詞二卷琴史八卷奕史四卷篆隸考訛二卷子

壽都大興張志



梁應澤字射侯宛平人萬曆二十三年進士授戶部主事尚書重  
之凡章奏皆屬焉壬寅簡徽州知府緝猾胥投稅奄害民者置諸  
法郡例十歲核富民之市產稅其價什一充邊餉奸弁通礦奄誣  
徽甯匿契稅十五萬前撫按不能執以四萬二千五百有奇進充  
左藏奄涎視未已應澤申明續收類收之別絕奄覬覦奸民有指  
仇家程氏山木爲己產獻闕下者屬江西稅璫採辦展轉無所得  
因誣他販木商及程之同姓爲窩探以肆其虐應澤分別明確釋  
之坐誣奏者罪郡額織造留四司班料匠甄之半當之後以轉造  
增派議加於田畝應澤請全留四司料免派三年中始終執法以  
與閹抗率類此宛平王志擢河南副使兼攝數道事案牘山積判決詳  
敏大興張志忤巡按以計典罷去辛亥復以副使爲陝西鳳邠道至卽  
均理韓藩宗田以準宗祿皆有制而無擾巡行固原涇州平涼三

州縣見其崖峻谷深獷獮出沒建墩堡練義勇以爲保障計宛平王志

攝苑馬寺卿陳馬政八議大興張志丁內艱服闋補山西參政管河東

道陞雲南按察使整肅紀綱漢人之構釁於生熟夷者特峻其法  
以忤巡撫左遷仍授平涼參政去前任已十四年矣宗田之法久  
弛侵漁陵虐民不能堪應澤爲按戶履畝問民田入宗宗田入民  
之數爲宗別立里甲禁民之售田於宗者於是宗民不相擾害明  
年以按察使改江西九江道時逆閹魏忠賢流毒搢紳江西爲甚  
浮梁黃中介以甲子緩刑疏忤忠賢拷掠汪文言誣贓二千中介  
罄產不敷其數應澤資助之乃獲免宛平王志陞河南右布政轉山東  
左布政時以白蓮賊添設東兗兵防又以東事增置德州援兵事  
出近例無額餉皆仰給藩司應澤悉心調濟沛然有餘而民賦不  
增丁卯擢右僉都御史撫治鄖陽應詔陳天下大計兵餉爲先宜

使戶兵督撫合爲一人籌餉練兵合爲一事又言毛文龍非有大志當核其兵幾何駐兵何地度兵力未厚不能大舉宜休兵屯田生聚教訓無專倚辦於餉以寬民力鄖陽自成化初劉千斤石和尚之亂始設鎮崇禎己巳流賊出沒川陝討殲之會都城戒嚴天下督撫赴援鄖撫最先三年考績加右副都御史四疏引疾歸里卒應澤內行純孝爲治求實用不爲文飾著有守微錄關西末議涇原考晉議東藩稿撫鄖疏草國朝文憲考人物記朝政記宋韓忠獻李忠定經濟畧諸書子以柎以樟以桂並負才名時有三梁之目

大興張志

張邦紀字完樸大興人少以文章知名萬曆二十六年進士授簡討三校禮闈一主楚試得士甚多充東宮講官反覆披陳太子爲之竦息以聽天啟中預料璫禍將興堅臥不起有談朔洛事笑而

不答舉觴微屬之而已黃道周每亟稱之仕終禮部左侍郎兼翰

林院學士卒贈禮部尙書諡文愨

大興張志

張奇勛寶坻人萬曆二十八年舉人少穎悟至性過人天啟中時事日非奇勛每閱邸抄愀然泣下崇禎丙子

大兵攻寶坻城垂拔百姓紛紛逃竄奇勛獨不去介而馳欲助知縣趙國鼎固守聞師已入矣還舍驅妻子令投井死出就國鼎所遂見執語多不遜乃殺之舉人王溥任潞城縣知縣秩滿擢衡州通判以疾歸

大兵猝至溥助國鼎死守城破或勸溥去溥曰奈何負趙公但揮其子鼎呂出曰先人一脈汝延之吾畢命於此矣闔門殉者二十餘人

寶坻洪志

王好善字元甫寶坻人萬曆二十九年進士任開封府推官聽斷

若神嘗一夕夢歐陽永叔詣階下求脫心怪之旦日治簿書見有蘇繼歐者曰異哉兆矣遂力雪其冤蘇後卒成進士他所出疑獄囚凡三十餘會河決朱家口衆議紛紜好善請疏下流以殺其勢如言果無恙調青州擒妖賊柳廷瓚等梟之除十虎之爲民患者境藉以安內遷工部都水司員外郎命督清江廠通運便商計稅額工料所羨注籍上之居淮三年塞決河築戍樓江淮人肖像以祀再轉虞衡司員外郎出守鳳陽甫赴任而卒寶坻洪志

李天麟字仲仁順天人畿輔唐志七十八萬厯三十年爲關南守北學編七發

明理學言簡而醇嘗曰孔門宗旨只是求仁惟顏曾得其宗舍求仁之外別立宗旨恐非授受之真畿輔唐志張子西銘一篇形容仁者天地萬物一體可謂曲盡朱晦菴以仁爲學以敬爲存之道都是孔門家法孫徵君鍾元曰吾鄉理學一脈寥寥其人若仲仁名雖

不著而北方之學者莫之或先殆實勝而不求聞達者乎北學編七

鄧希皋字襄雍大城人少而穎異日誦萬餘言萬厯三十一年舉人授蒲臺令蒲有饑利甚巨希皋至悉屏去士民懷之遷鳳陽通判分理正陽鎮關利頗饒希皋不爲染一切常例痛除之且勒石以垂永禁內遷刑曹值內豎<sub>權</sub>獄多羅織希皋獨秉正主持所全活者甚衆出知衛輝府閱月以艱歸筮仕二十餘年廉介自守不營利不廣田宅迄今子孫繁盛極一時君子之選鄰郡以及長安莫不知有不舒鄧氏也太守鄧公傳

袁住通州人日爲馬侍御家傭水李贄寓於馬氏多嫚罵搢紳輩相接或終日不與語一見住輒曰好男子或一日不見輒曰目中何無袁住然住形貌猥瑣傭水外無他能無以異衆人也贄死詔獄方暑尸腐馬氏諸僕無敢近者獨住直前抱持痛哭殮含曲盡

其事錄

孫祖壽字必之昌平人萬厯中武舉人武一統志案明史亦作舉

麻武會授固關把總天啟二年歷官署都督僉事為薊鎮總兵官

孫承宗行邊議於薊鎮三協十二路分設三大將以祖壽領西協

轄石匣古北曹家牆子四路駐遵化而江應詔領東協駐關門轄

山海關一片石燕河建昌四路馬世龍領中協駐三屯營轄馬蘭

松棚喜峰太平四路經略王在晉總督王象乾僉謂永平設鎮本

以衛山海今移之三屯則去山海四百里於應援為疎遵化去三

屯止六十里今竝列兩鎮於建牙為贅請令世龍仍鎮永平以東

協四路分隸世龍應詔而以中西二協專隸之祖壽仍鎮三屯章

下兵部署事侍郎張經世議如其言承宗堅執如初乃命祖壽移

鎮遵化明史列傳七年五月

大兵圍錦州分兵掠甯遠明史滿桂傳祖壽赴援不敢戰被劾罷歸明史

傳列傳崇禎二年

大兵下遵化因進軍薄京城營於城北土城關之東總兵官滿桂

入援通鑑輯覽祖壽已罷官家居乃散家財招舊部曲數百人畿

唐志七從滿桂赴關明史帝趣桂出師桂言眾寡勢殊未可輕戰

中使趣之急不得已乃督祖壽等移營南城外三里許列柵以待

明日昧爽

大清以精騎四面蹙之桂及祖壽等戰不支遂俱歿通鑑輯覽帝

親為文祭之祖壽初為把總時畿輔遘危疾妻張氏割臂以療絕

飲食者七日祖壽生而張氏旋死遂終身不近婦人及為大帥部

將以五百金遺其子於家卻不受他日來省祖壽賜之酒曰卻金

一事善體吾心否則將盡法於汝其秉義執節類如此一統志

楊春元字仁甫固安人尙榮昌大長公主拜駙馬都尉特進榮祿大夫父卒哀毀不勝扶櫬歸葬徒步百餘里廬於墓側居母喪七日不食衣不解帶者三月蟻蝨滿體不捫拾竟至羸瘠而死于光夔字允諧太子太師左都督特進榮祿大夫爲楊左諸君子屢忤逆璫人高其節義謂其有父風云光龍字允納中軍都督府都督僉事崇禎甲申流寇之變奉命巡緝京城城陷投泡子河井中死家人莫知後數日遇僧告知始知死所固安陳志

劉廷諫字咸仲號良哉通州人萬曆四十七年進士授刑部主事

通州高志甚有名譽綱目三編有陝西民首韓宗功等數十人爲奸細

三法悉議辟廷諫曰廷尉天下之平若但據首詞遂律以叛何平

之有御史楊璉然之行令察覆得釋者衆調吏部郎中畿輔唐志

忤魏璫罷崇禎初通州高志選郎陳啟新上書請廢制科罷行取疏下

部議廷諫力言其謬得不行兵部尙書楊嗣昌奪情莅事廷諫上

疏諫不納畿輔唐志時僉派經紀運糧通民苦累廷諫力陳當事疏免

司漕中官誣倉役侵糧廷諫亟請大司寇上聞龔文等十五人得

出獄前後在吏二十年以耿介見泥不調甲申徵拜僉都御史卒

所著有雪菴初集次集白雲牘司銓奏草都下草退谷壘言年譜

紀略通州高志

何呈瑞字易洲文安人天啟四年舉人崇禎八年署冀州學正擢

儀封知縣凡便民去蠹之政如河口總稅小車腳店埠頭諸積弊

倚周藩爲城社毅然革除是時流寇猖獗李自成爲最強橫行躡

中州其士卒善攻城冒牛革持鋏鋤潛伏其下矢刃不能及故所

攻無不克自開封歸德間州縣以數十計長吏多聞風棄城去呈

瑞獨誓衆堅守以身殉城士民感泣用命親立矢石間與賊格鬪

會夜城忽圯數堞呈瑞身操畚鍤率士民築之令壯士持短兵接戰老弱助版築未明而就賊驚以為神又手製火燿火箭以新裁變古法毒火烈燄所投必焦灼賊僵屍委積獲渠魁數十人於是夜引去終呈瑞在邑竟不敢薄城下撫按論城守功報呈瑞最遷信陽知州時信陽已為賊據乃之汴梁汴被困日久呈瑞受事圍城中監粥厥贍貧民所全活甚眾不數月黃河潰決全汴為魚呈瑞僅以身免至今儀封人追述其城守時事尸祝猶不忘云

王崇簡儀封何易洲傳

于奕正初名繼魯字司直宛平人性孝友父歿讓財於兄弟自居荒園終日讀書工為詩歌好游名山常言秋山巖淨澹峙如有道高人每於霜清木老時策蹇而往或攀枯藤坐危石慨然賦詩有超世之概其所交往皆當世名人尤與楚譚元春劉侗友善嘗與

侗著帝京景物略

畿輔唐志七十四

奕正摭求事迹而侗排纂成文以京

師東西南北各分城內城外而西山及畿輔併載焉生長京師平

生未出國門

四庫全書提要八十七

崇禎乙亥偕侗取道金陵徧歷名勝歸

而疾作卒於旅舍

周亮工書影五

初于生夢與故人郭聖樸同人於壑聖

樸先客死秣陵者既而夢歸見母方滌鼎三指鼎耳問其環母答

兒無環矣寤告人曰三鼎士之祭母言得非兆耶死願擇秣陵一

邨地與聖樸同葬焉既卒侗曰達哉于生雖然死歸附隴禮也遂

護其喪歸楊日補歸與治刻其遺詩數十章所著有天下金石志

大興張志

王愛字仁甫

畿輔唐志七十四

號涇谷

大興張志

宛平人

畿輔唐志

授潞安府推官

讞獄平允

大興張志

剛直不阿

畿輔唐志

雖忤權貴弗卹升戶漕以兌鹽往

浙江掃除積蠹歸給軍士布花覈虛濫者將萬人諸衛望而心悸

由是以度支材著稱時邊事孔亟遼餉多虛大興張志當事欲核其實

顧諸郎廉幹者莫如愛即以委之所至澄清查出浮寄至二十四

五萬當道擬以卿寺優愛愛不受乃出備兵陝西之鄜州兼理靖

邊值火落赤犯安甯諸處愛會杜松出方略邀斬二百七十有奇

鹵獲無算宛平王志先是獬賊聚於真甯大興張志為內亂謀愛親至其帳

馘渠首散餘黨衆無敢譁者一日過花馬池適敵踰牆而入見愛

麾蓋下馬羅拜曰不圖今日得見一大人宛平王志以是制勝之略聞

於朝野方晉右布政遂以疾卒愛德氣湛深大興張志學識淵博著有

史論息機園集畿輔唐志

崔玉乾固安人有宛平武某乘驪挾資南行遺一囊玉乾就拾之

而不覺揣知貨財也大聲招呼其人已前馳不及聞矣因取寘室

中祕不令家人知次年武回復過村已無意於復得矣玉乾方路

待之逢人輒語相與印證良是即以原囊還之武且驚且拜願與

平分玉乾笑曰若待爾來平分何如全得仍留一飯而去知縣訪

知覈實申詳本道旌之仍給冠帶優免終身差徭固安陳志

紀汝清字廉卿自濟南再徙文安汝清天性篤孝年十五補諸生

陳仁錫孝行傳父病革日時值沍寒淚血凝冰水漿七日不入口抱尸僵

臥願以身殉家赤貧典身鬻田易木以葬茹素廬墓三年一日後

母復沾微疾汝清日侍湯藥衣不解帶嘗糞辨證刺指出血跪書

青詞五夜露禱祈減算以延母年夢神授藥母病得少間歲餘不

起汝清一痛遂絕良久方甦柴毀骨立如喪父時及襄喪事躬負

灰石親操畚鍤手龜足繭復廬墓所朝夕悲號歲值丁未河水暴

發文安漂沒遽無舟楫汝清乘葦桴奔父墓築堰為防大堤潰決

羣墓盡壞獨汝清父墓賴此無恙人驚為孝感紀克家陳情疏子克家官

泰安州知州臚實泣奏孝行傳奉旨紀汝清孝行可風照例建坊旌

表紀克家陳情疏

王珍字元玉保定人崇禎二年貢生孝友端慈與人無疾言遽色居父母喪哀毀骨立三年不飲酒食肉丙子秋鄉試回至固安界遇

大清兵如風雨驟至伏匿禾中兩晝夜不得食有憐之者取田中瓜啖珍擲於地曰君子不以冥冥墮行地主不在可攫而食之耶庚辰授禹州倅時流寇猖獗燎原之勢不可救辛巳十月賊衆五萬騎雲屯州城下四圍夾攻凡七晝夜忽城樓火起城中訛言賊已入城守陴者皆潰城遂陷仗劍殺賊衆蜂擁亂砍珍被數十創墮於城下膏血塗地弗自知也闖賊既入城知州吏目被殺賊盤踞三日始去次日阜隸李文光徧覓珍於積屍中得之扶起視之

猶一息未絕負至家灌以漿水漸甦調養月餘創口乃合撫按廉其狀委署州篆時城內如洗所遺老羸無幾晝夜數驚農人廢業米貴如珠賊勢益熾於殘破城池安置僞官使人來城下招降珍拒之厲闖賊遂自率萬人復來攻城城內殘民不足二百聞風股栗逃去者過半賊至不能防禦城破遂爲所執闖賊令珍跪珍怒目不屈曰爾逆天殘民吾恨不礮汝萬段豈屈膝於爾耶闖賊自起持刀斷其脛珍大罵不絕口遂被殺家人劉天祿先匿土穴中獲免賊走始出掩其屍而歸初賊將再至劉天祿策之曰賊復捲土而來此間守禦無人不如暫避河北猶可圖存不然死無葬地矣珍曰吾職司守土城亡與亡如可遷避偷生當如君命何噫烈

矣柴經國王先生傳

賈應鶴字鳴皋永清人崇禎九年副榜性直諒任山東甯海衛經



歷凡利弊當興革者必請諸大吏不從則侃侃爭於前始以為強  
項及次第舉行皆有效乃益重之先有民婦蕭氏者夫婦饋食夫  
暴卒家人以置毒訟獄成決有日矣應鶴至恐有寃復鞠之婦曰  
夫死願就死泣涕不能言應鶴曰汝畏刑威誣服耳婦大哭平反  
之上憲皆大駭應鶴據所讞願棄官伸婦寃卒得白擢行人司行  
人告終養歸家居教授以孝弟為先聞風者樂就之越四載親歿  
值甲申之變聞莊烈帝已殉社稷即具衣冠北面拜與家人訣曰  
君亡國破何以生為遺詩縣令絕粒而死時崇禎十七年三月二  
十四也永清周志  
宋一鶴宛平人為諸生即究心兵事崇禎三年舉人授教諭以薦  
遷邳縣知縣加東昌同知巡按御史禹好善以一鶴知兵薦之授  
兵部員外郎尋擢天津兵備僉事改飭汝南兵備駐信陽時熊文

燦總理南畿河南山西陝西湖廣四川軍務主招撫一鶴降其盜

魁黃三耀先後勦劇賊斬首七百有奇明史列傳有劉喜才者夜取順

義王首以降於一鶴明紀五十五總兵左良玉破賊李萬慶於張家林

七里河萬慶降綴寇紀畧七一鶴撫而定之者數萬文燦屢上其功進

副使調鄖陽文燦誅楊嗣昌代以一鶴能薦之擢右僉都御史明史

列傳代方孔詔為湖廣巡撫一統志時湖廣賊為諸將所逼多竄入四

川一鶴以雲南軍移鎮當陽中官劉元斌以京軍移鎮荆門相犄

角左良玉等大破賊於瑪瑙山一鶴敘功增俸遣副將王允成孫

應元等大破賊汝才五大營於豐芭坪斬首三千餘級嗣昌署一

鶴荆楚第一功明史列傳復移駐蘄州焚舟遏賊渡賊移而北一鶴又

斷橫江賊遂不敢渡畿輔唐志七十六十二年三月楊嗣昌自殺以丁啟

睿代為督師通鑑輯覽一百五啟睿破獻忠於麻城會一鶴及鳳陽總督

朱大典安慶巡撫鄭二陽蹙賊左金王老回回等於潛山懷甯山

中一鶴又督參將王嘉謨等追破左金王爭世王治世王於燈草

坪斬首千一百級明史列傳一鶴起鄉不十年驟秉節鉞廷臣不能無

伎又因其為楊嗣昌所薦疏詆益眾會以襄陽陷奪職戴罪十五

年李自成陷德安荆門一鶴以獻陵為重趨赴承天賊已驟至明

年正月承天陷一鶴自經死畿輔唐志先是左良玉軍擾襄樊一鶴疏

糾之既良玉自襄樊走承天軍饑而掠乞餉於一鶴不許良玉銜

之至是一鶴謀留良玉兵良玉走武昌故及於難明史列傳

王來聘京師人崇禎四年中武會試時帝銳意重武舉子運百斤

大刀者止來聘及徐彥琦二人而彥琦不與選帝下考官及監試

御史獄悉貶兵部郎二十二人明史列傳命中允方逢年倪元璐再試

逢年元璐以時方需才請殿試傳臚悉如文榜例明紀五分三甲

傳臚錫宴以前三十卷進呈欽定一甲三人來聘居首即授副總

兵武榜有狀元自來聘始也來聘既拜命泣然流涕曰上重武若

此欲吾儕效命疆場耳不捐軀殺賊何以報上恩明年孔有德據

登叛官軍攻之久不下又明年二月明史列傳孔有德耿仲明等屢為

官軍所敗又糧絕有德先遁載子女財帛入海仲明以水城委副

將王忠亦以單舸遁官軍遂入大城水城未下游擊劉良佐獻轟

城策匿人永福寺中穴城置火藥發之城崩將士踊入輒為賊擊

退來聘復先登中傷而死明紀五天子惜之贈廕有加明史列傳

陳所聞文安縣舉人任山西文水知縣陞山東平度知州文安楊志崇

禎四年登州游擊孔有德反帝命總兵楊御蕃盡將山東兵討之

不利走入萊州綱目三編十九二月己巳朔孔有德圍之分兵陷平度明紀

三五十所聞自經死贈太僕寺少卿賜祭葬建祠廕子

本朝乾隆四十一年贈節愍綱目三編三十五

曹鳴鶚大興人綱目三編三十五 倜儻英偉大興張志 以勇敢稱官河南道中

軍守備幾輔唐志七十六 崇禎六年賊自邢臺摩天嶺西下抵武安林縣

綱目三編三十五 鶚率兵五百勦流賊數千賊糾黨數萬困鶚於趙寨鶚

血戰數晝夜矢盡馬踣猶裹創步鬪被執賊誘降不屈噴血怒罵

乃支解之幾輔唐志 事聞贈游擊將軍大興張志

本朝乾隆四十一年追諡烈愍綱目三編三十五

任之華字仲華大興人幾輔唐志七十六 豪放不羈棄文力武甲申傳信錄三 登

武科除昌平守禦幾輔唐志 未久即告歸甲申寇入喟然長歎告諸同

列曰我世受國恩誓不與賊共天日遂投繯堂右弟之封解之復

甦家人守護之垂淚無語至暮復踰牆自縊於鄰舍空室甲申傳信錄四

王盾懋字有懷霸州人崇禎進士一統志 授戶部主事以廉介稱幾輔

唐志七十六 由太原知府遷甯武兵備副使李自成既陷太原遣使說

降盾懋斬之與總兵官周遇吉一統志 登陴固守礮擊無算幾輔唐志 城

陷自縊死妻楊氏投井殉之一統志

張文燧字彥彪通州人崇禎七年與弟文輝同登進士授山東益

都知縣俗桀黠難治至則抑豪強保良善禁衡邸諸奄之以稱貸

尅民利者三年奏最將遷士民請留復任後擢吏部驗封司主事

歷文選司員外郎弟文輝官徽甯兵備道文燧工書法晚益工詩

著有彥彪近藝怡堂詩集子士壽通州高志

士壽字平格少為名諸生文行兼著甲申之變文燧奉父母將避

難先匿他所士壽留京邸都城陷賊徧掠搢紳家及士壽舍士壽

恐賊脅其家人拽大父母及父匿他所出謂賊曰我張吏部子笥

篋我主之任汝曹取勿譁也賊搜括僅中人產見士壽不為屈釋

之居數日又一賊繫去拷掠備至令舉戚黨有貴者以贖其死士  
壽大呼曰終不以戀喘息累他人遂被殺先一日士壽知賊必不  
釋已遺言致父母勿為兒傷大父母春秋高傷兒恐為大父母戚  
文挺聞其言勸甚賊退往殯之瘞張灣祖塋題墓石曰張孝子墓

通州高志

紀克揚字令聞號六息文安人嗜讀書善屬文碁登逸品諸陰陽  
象緯卜筮占風岐黃之術無不諳究以至釋典道家之言多所訓  
詰童年失恃至孝性成哀毀骨立父敦諭稍進餽粥事庶母殷懇  
誠唯謹姊氏早孀迎與同居厚加卹養家世貲財悉以給庶弟田  
宅奴婢等物俱自取下分唯攜圖書數十卷昕夕諷吟隱然有以  
自命一時名流無不以偉器目之總角補弟子員才名甚盛累試  
輒冠軍食廩餼大為學使左光斗所賞識六七試不售怡然自處

益復肆力墳籍與瓦橋馬東航新城王申之詩文往來摭藻摘詞  
不作天寶以後語時著迴文體六十四字縱橫讀之可得詩三百  
六十首人咸服其綜密又構別業三楹陳列圖書與三子坐臥其  
中將以終老無何賊氛日逼鐵騎連圍克揚毅然弗顧輒云丈夫  
有命幸能壁間乞活讀書廬中不異恆昔城陷不屈遂遇害克揚  
講學多年著述甚富兵燹散失所存麗軒文集論稿四書易經註

秦松齡贈中憲紀六息傳

劉廷訓字式伯通州人性謹厚好學

畿輔唐志七十六

以歲貢生選吳橋

訓導

明季北略十四

崇禎十一年

大清兵入畿內知縣李綦隆約廷訓出走廷訓止之

明史忠義傳

與堅

守三月初以偏師來輒引去既盡銳力攻綦隆絕城遁去廷訓入  
學舍麾其妾趨出屬其稚孫名增者於所善僧隆貴介而趨南城

誓守者日守死逃亦死曷若守死為滿城忠義鬼乎

明季北略十四廷訓

腐儒惟舍身報國守者皆哭日公死我等敢求活守三日夜炮盡

城陷

畿輔唐志

於屢猶束胸拒戰連中六矢乃仆踰月其子發棺更殮面如生鬚

髯奕奕奮舉喪之歸也諸生數百道哭小民皆剪紙買漿以奠時

年六十有五

明季北略十四

國朝乾隆四十一年追諡烈愍

綱目三編三十七

周騰蛟香河人崇禎十三年以舉人除汜水縣知縣時河南流寇

方熾畿輔唐志邑兵荒明史忠義傳或勸騰蛟毋往騰蛟曰君命也可

避乎之任唐志撫字有術以其間釐定徭役民甚便之城孤懸河

畔縣人吳邦清等於城南立七砦相犄角摩天砦最險土寇李際

遇伺騰蛟往河北急據之遂攻縣城騰蛟力請於上救兵至始解

去騰蛟念故城難守遷縣治於摩天砦以扼賊衝未幾賊大至相

持十餘日勢且不支砦臨河可渡以免騰蛟曰吾何忍舍眾獨生

力竭城陷繫印於臂投黃河死賊去百姓求得其屍葬之

明史忠義傳

阮漢聞字太冲順天人讀書喜大節尤習兵家言著尉繚子解詰

戎踐墨諸篇萬歷朝出師援朝鮮敗於碧蹠館漢聞方弱冠徒步

走遼東望黃龍鴨綠訪問形勢慨然有澄清之志

畿輔唐志七十六

會解嚴漢聞乃齋志而返及妖書事起上求其人甚急漢聞避跡汴梁

遇西亭王孫

宛平王志

一見即延致邸中日飲以醇酒而出所藏祕書

俾盡讀之以此漢聞學益進西亭故好客四方知名士畢集門下

西亭等夷視之獨於漢聞有加禮呼為先生而諸名士亦俱心折

漢聞羣以阮先生稱之於是阮先生之名重河南北西亭死漢聞

鬱鬱不自得乃徙居尉氏聚徒教授畿輔唐志時有詔徵遺逸宛平王志巡

按御史李日宣上其名不報畿輔唐志崇禎末流寇大起漢聞於是料

賊情形與山川阨塞為設伏防禦方畧圖上當事又見諸帥驕蹇

不用命大興張志憤恨日諸君婦人也婦人猶有自奮殺敵者畿輔唐志乃

取古婦女以武勇著編為女雲臺書以羞之大興張志及賊攻尉氏漢

聞已臥病猶據牀畫地為守禦方略賊聞其名下令必生致之城

陷被擒大罵不屈而死時年七十畿輔唐志

朱之馮字樂三號勉齋大興人明季北略三十案北學編云之馮名之裔字德正為諸生

時即見知於楊漣左光斗東林列傳天啟五年進士授戶部主事北學編三

摧稅河西務課贏貲公帑無所私明史列傳時逆閹魏忠賢用事遣其

爪牙督理漕事勢張甚之馮略不為禮其人見之馮年少風骨稜

稜咋舌而去丁父艱歸里襄事後鍵戶讀性理諸書每言為聖人

之學舍此無由服闋北學編三起故官進員外郎坐望誤謫浙江布政

使理問稍遷行人司副歷刑部郎中浙江驛傳僉事青州參議明史

列時海右戒嚴之馮率屬沿岸修治墩埃造甲仗火器北學編三盜劫

沂水民株連甚眾之馮捕得真盜大獄盡解禽治樂安土豪李中

行權貴為請不聽進副使明史列傳齋表入京頓家屬於濟南俄城陷

東林列傳妻馮匿姑及子於他所而自沈於井姑李聞之為絕粒而死

樞還之馮廬墓側三年明史列傳母死以正月二日自是每元旦守母

位啜粥飲水過十五日蓋痛母露骸半月方葬也東林列傳辛巳起補

山西副使以馮宜人節烈不復娶北學編三亦不置妾媵一室蕭然明史

列衣布茹素如廬墓時河東與秦豫接壤烽火無虛日之馮飭備

甚嚴宗室朱全宇招納亡命焚掠村社遙與秦中賊通撫按以其

宗室不敢問之馮知廢弁謝鳴進與善召之膝前諭以大義遂擒

全宇殺之馮當戎馬倥傯建河東書院與諸生講經史著在疚

記北學編三十六年正月權右僉都御史巡撫宣府明史列傳宣府去京師

不四百里而法令久弛兵將皆不習戰之馮至則劾庸懦補虛伍

十史外時坐明倫堂召諸生講學激發忠義東林列傳司餉主事張碩抱

以剋餉激變羣縛碩抱明史列傳之馮出即撫定誅首惡七人東林列傳劾

碩抱下吏軍情帖然明史列傳甲申春賊氛漸逼兵部主事金鉉上疏

謂宣府京師屏藩請亟撤內監掣肘專任之馮之馮忠勇必足辦

也不報東林列傳二月八日聞太原陷蔡懋德死之馮設位哭二月二

日聞甯武陷周總兵遇吉舉家巷戰死之馮歎曰此真男子也北學明

三編三月大同陷之馮集將吏於城樓設高皇帝位歃血誓死守明史

列傳諭軍民毋聽賊誘東林列傳時宣鎮總兵王承允已潛遣騎齎降表

迎賊而之馮尚勞苦登陴中官杜勛見之馮叩頭請以城下賊之

馮大罵勛不答笑而去俄賊且至勛蟒袍鳴騶迎三十里之外之

馮登城太息見大礮語左右為我發之默無應者自起爇火則礮

孔釘塞或從後擊其肘之馮撫膺歎曰不意人心至此仰天大哭

賊從南門入言賊不殺人且免徭賦則舉城譁然皆喜結綵焚香

以迎左右欲擁之馮出之馮叱之明史列傳日離此一步非死所遂易

公服登北城樓縊死豫具遺疏勸收人心培節義收人心在愛民

力愛民力在拔廉官又作書與金鉉別且戒子弟當讀經世書呂

新吾呻吟語不可不讀疏上三日而都城陷之馮死時甲申三月

十一日也東林列傳賊棄屍濠中犬日食人屍獨之馮無損明史列傳十四

日始有好義者收殮之明季北略二十福王時贈之馮兵部尚書諡忠壯

明史列傳子永慶

永慶字長源以字行大興諸生乙酉夏豫王下江南郡縣推長源起義兵敗被執隸正黃旗僦宣府人姜納吾居長源修幹美髯儻負氣節性佞佛嘗搭七條戒衣人目爲三教總持王聞而賢之賜以婦人輒辭不受掌科楊某死於難夫人華墮德姬隊王嘗以賜人華薙髮以拒或以告長源領之王旣賢長源茲欲賜以婦遣入德姬隊恣所擇長源旣聞楊夫人墮是院也遂弗辭見裏佛巾者大言曰予大興故殉難巡撫朱之馮子也熟視而自引其服曰若道裝予亦道裝大興達毘陵程易與耳毘陵者華故里也以此言微動之華知其非常人欲資以上掌科墓也亦弗辭長源以歸納吾家向夕華叩長源曰君脫難人于厄哀難人否長源曰爲全夫人節非特哀之而已是時納吾伏童奴數輩偵兩人而長源據椅誦佛燭且盡聲益高至曉聲不輟童奴報納吾異之不言抵夜

復令童奴再伺長源誦如初納吾又不言三夕伺之又復如初則納吾晨興盥洗更衣候門啟抱長源足叩頭呼活佛徐曰君旣不近婦人何贅疣此一受爲長源曰此搢紳婦吾非欲妻之欲完若璧以歸恐機洩弗果吾願故且同室然非誦佛無以明心不意爲君偵得幸爲我諱毋敗機事也納吾曰君誼動鬼神毋復夕夕苦君爲治別室遣老姬侍楊夫人曰奉兩人如佛矣久之聞於王王愈益賢長源召長源曰公誠異人吾爲公合浮屠尖趣長源令華具書達毘陵以其母與其弟來王資送之還平江踰年長源示微疾跣跌而化

史外二  
十八

劉文炳字淇筠宛平人孝純劉太后姪也

一統志

祖應元娶徐氏生

孝純皇太后爲烈皇帝生母後封瀛國太夫人者也子效祖繼祖效祖娶杜氏生子三文炳文耀文炤

史外  
十三

帝卽位封效祖爲新樂



伯歷代名臣言行錄二十四崇禎八年卒明史外戚傳文炳嗣焉晉新樂侯母夫人

杜氏賢每謂文炳等曰吾家無功德直以太后故受此大恩當盡

忠報天子帝遣文炳視鳳陽祖陵密諭有事上聞及歸奏史可法

張國維忠正有方略宜久任必能滅賊後兩人俱殉國難歷代名臣言行錄

文炳謹厚不妄交獨與宛平太學生申湛然布衣黃尼麓及駙

馬都尉鞏永固善時天下多故流賊勢益張文炳與尼麓等講明

忠義為守禦計及李自成據三秦破榆林將犯京師文炳知勢不

支慷慨泣下謂永固曰國事至此我與公受國恩當以死報十七

年正月帝召文炳永固等問國事二人請早建藩封遣永定二王

之國明史外戚傳一封山東以屏翰神京一封四川地險而富可以為

後圖上是之以內帑乏遲其行三月初八日聞闖賊李自成將逼

京師京營兵未議城守唯中府派分文武勲戚坐守京城內外皇

城諸門繼祖守皇城東安門文耀守外城永定門魏叔子文集十七文炳

以繼祖文耀皆守城未有職事十六日賊攻西直門勢益急尼麓

踉蹌至謂文炳曰城將陷君宜自為計明史外戚傳家人環而泣繼祖

自東直門至與妻訣貯草薪所居樓下魏叔子文集又念瀛國太夫人

年篤老不可俱燼因與文炳計匿之明史外戚傳以文炤付蒼頭文炤

不肯去魏叔子文集十七十八日帝密召文炳及永固文炳白母曰有詔

召兒兒不能事母母拊其背曰太夫人既得所我與若妻妹死耳

復何憾文炳偕永固謁帝時外城已陷歷代名臣言行錄上曰能為朕一

巷戰乎兩臣對曰今止臣等親隨數騎耳其何以戰上曰至是耶

朕志決矣於是君臣相向哭綏寇紀略補遺中上起二人趨出魏叔子文集文

炳歎曰身為戚臣義不受辱不可不與國同難明史紀事本末八十其女弟

適李年未三十而寡文炳召之歸與文耀擇一大井驅男女子孫

及其妹十六人盡投於內閉門令餘悉入樓積薪縱火焚之明季北略

二十出馳至崇文門永固射賊文炳助之歷代名臣言行錄俄而賊大至

文炳顧永固曰吾與君畢命此賊時黃尼麓在側曰滿城皆賊守

此何益當速歸焚府第也二人遂各馳去文炳至第火烈不得入

魏叔子文集走省癡國太夫人於申湛然家黃尼麓亦至曰鞏都尉焚府

自刎矣史外十三文炳頓足曰鴻圖先我耶將投井魏叔子文集顧其影乃

戎服曰此軍容不可以見皇上地下索冠服不得得他冠而小裂

之乃得冠遂投井死綴寇紀畧中繼祖歸亦投井死初文耀見外城破

突出至渾河聞內城破復入見第焚大哭曰文耀未死以君與母

在今至此何生為遂覓文炳死所大書版井旁曰左都督劉文耀

同兄文炳畢命報國處亦投井死闔門死者四十二人明史外太威傳

夫人以匿湛然家得全按明季北略云太夫人時年九十亦投井死與此互異南都贈文炳

大師恆國公諡忠壯弟文耀贈太保諡忠果明季北略二十一

鞏永固字洪圖順天大興人明季北略二十一尚樂安公主一統志爵駙馬

都督善騎射好詩工書魏叔子文集十六喜飲酒而樂與賢人名士游慷

慨多大節史外十四性喜讀書御史李清過書肆見皇明泳化篇命易

歸書客故高其價李曰緩之及旋騎再訪則曰鞏駙馬易去矣李

心誠之曰駙馬皆豪華自喜渠所好乃爾耶歷代名臣言行錄二十四崇禎末上

疏請肄業太學帝褒答之一統志總督趙光抃以邊事繫獄特疏申

救又請復建文皇帝廟諡事雖未行時論譴焉明史公傳與新樂侯

劉文炳為刎頸交都下稱戚畹之賢者必曰劉鞏魏叔子文集甲申春

賊破宣大李邦華請太子南遷為異議所格明史公傳永固入朝上

問救時切務永固說上南遷請衛馭以從力可召募義兵數萬寇

亂不難平也上曰義兵何易永固曰豈獨數萬果如臣策即數十

萬度可必致若徒守京師京師已玩弊久祇坐困無益也上不聽  
 及寇逼外城上密召永固曰卿向說朕南行能集兵數萬今猶及  
 乎永固曰今無及矣上曰卿尙言可致數十萬何乃云無永固曰  
 暇日人易集今事急人心盡亂雖一卒亦難致也時新樂侯劉文  
 炳並在上因言兩卿各率家丁護從南行可乎劉鞏並曰家丁何  
 足以當賊鋒况臣家素謹不敢私蓄家丁甲申傳信錄三帝愕然永固曰  
 臣等已積薪第中當闔門焚死以報皇上明紀五十七乃出日晡太監  
 啟彰義門賊盡入外城陷永固射賊文炳及楊光陸助之殺賊數  
 人明紀五十七文炳入告母永固匹馬至庭前著白戎服束弓矢見文  
 炳下馬哭拜於地曰城內無守外無援吾輩世受國恩當自殺爲  
 厲鬼殺賊耳特與兒訣吾當死信地即馳去魏叔子文集十六欲從帝突  
 圍出不得歸家殺其愛馬焚其弓刀鎧仗大書八字於壁曰世受

國恩身不可辱

明季北略二十一

見蒼頭在側日汝留此何爲對曰侍主

人死手摘所服戎帽金頂與之命取酒至以一杯北向酹地拜皇

上一杯酹公主自飲一杯曰此永固報陛下殿下時也史外十四時公

主已薨永固以黃繩縛子女五人繫樞旁曰此帝甥不可汚賊手

綱目三編三十九

盡取所賜古玩書畫環繞殯宮縱火焚死然後自縊云

自刻三十一

南都贈少師諡貞愍

歷代名臣言行錄

國朝順治九年追諡忠烈

綱目三編三十九

成德字元升先世晉之霍州人

明成介愍公墓碑

依舅氏占籍懷柔

明史列傳

少倜儻負大志常以椒山自命墓碑爲諸生時璫燄熾嘗讀文文肅

公擊奸疏輒研几狂叫心儀而足躡之

明季北略二十二

崇禎四年進士

畿輔唐志七十六

原名張成德奉旨復姓

明季北略二十二

除滋陽知縣性剛介

清操絕俗

明史列傳

有廉能聲

明季北略二十二

文震孟入都德郊迎執弟子

禮語刺温體仁體仁聞而恨之宛州知府增餉額德固爭又嘗捕治其爪牙吏知府怒讒於御史禹好善好善體仁客也誣德貪虐逮入京滋陽民詣闕訟冤震孟在閣亦為之稱枉德道中具疏論

體仁罪明史列傳好善再劾德言其疏出震孟手帝不之究歷代名臣言行錄二

四德母張伺體仁長安街繞輿大罵拾瓦礫擲之體仁恚疏聞於朝詔五城御史驅逐移德鎮撫司掠治杖午門下坐贓六千有奇

畿輔唐志謫戍榆陽而家寓居順義時

大兵破其城家人皆避入地窖父文桂曰豈有男女並入一窟中乎終不以顛沛違禮兵至遇害妹及妾蕭氏童氏皆縊死後十日

德出獄至家一慟甫畢旋赴戍所而妾劉氏及女終以追賊逼死於家明季北略德居戍所七年用御史詹兆恆薦起知如皋尋擢兵部主事德以母老三疏力辭不允畿輔唐志乃就道明史列傳轉車駕司

員外郎痛心時事以幼子夢來託同門友王重誓以身殉既受事

益究心戎略為國家桑土計明季北略上言年來中外多故居官

者爵祿迷心廉恥道喪陛下御極十七年何仗節死義之寥寥也宋臣張栻有言仗節死義之臣當於犯顏諫諍中求之夫犯顏諫

諍何難在朝廷養之而已表厥宅里所以伸忠臣孝子於生前殊厥井疆所以誅亂臣賊子於未死苟死敵者無功則媚敵者且無

罪死敵者褒揚不亟則從賊者恬而不知畏也明史列傳上為之動容

明季北略甲申三月寇圍京師即致書同年馬世奇曰主憂臣辱我等不能匡救貽禍至此惟有一死以報國耳明史紀事本末八十質以慷慨從容二義明季北略未幾城破不知帝所在旁皇廳事已趨至

午門見兵部尚書張縉彥自賊所出德以頭觸縉彥且詈之俄聞帝崩明史列傳梓宮暴露東華門德以雞酒哭奠梓宮前明史紀事本末八十觸

地流血賊露刃脅之不為動明史歸寓跪母張氏前慟哭

八母曰吾知汝意矣綴寇紀略兒為忠臣吾獨不能為忠臣之母

乎入室自縊死有妹年二十餘未嫁德顧之曰我死汝何依妹曰

兄死妹請前德稱善哭而視其縊明史然後自殺福王

時贈光祿卿諡忠毅唐志祀旌忠祠明季北略本朝賜諡介愍明

傳列

金鉉字伯玉其先武進人占籍順天之大興東林祖汝升南京戶

部郎中父顯名汀州知府明史鉉少有慧質讀書目數行下北學

以聖賢自期許年十八舉鄉試第一歷代名臣言行錄二十四明年戊辰成進

士北學自以為不習吏事東林改揚州府教授明史日集諸生講

濂洛之學燕居言行俱有規格被服造次居然老成人比之胡安

定東林轉國子監博士陞工部主事北學帝方銳意綜覈疑廷臣

朋黨營私度支告匱四方亟用兵餉不敷遣中官張彝憲總理戶

工二部建專署明史鉉曰此天下存亡之機也奈何誅一忠賢復

任一忠賢且我為工曹必將屬視我矣乃抗疏言彝憲既有獨踞

之處必強二部郎官匍匐進謁挫士氣辱朝廷史外廉恥不可不

維浮費不可不惜不報北學而總理已建署與其黨議接郎官禮

或曰視尚書當稍倨東林果檄郎官以謁尚書儀注見鉉復上疏

固爭之且集諸郎官倡議曰職事可令掾吏移之吾曹有一人登

彝憲堂即屬彝憲假子毋許入孔子廟堂提吾靴擲腫其面辱之

朝堂於是諸郎官詣尚書各以公事出彝憲入新署扇導呵殿如

尚書闈堂皇南面據案黃衫緹衣列侍階下吏抱文書雁鶩行俟

命者左右數十百人而曹郎無一至者史外彝憲愠甚鉉當摧稅

杭州辭疾請假彝憲撫火器不中程劾鉉落職明史歸家居與弟

錄閉戶讀書

東林列傳

北學編三

躬爨以養父母

明史列傳

自題所居曰狷菴專

讀程朱書

東林列傳

學日益遂或詢以宗旨正色曰日用躬行未之有

得何宗旨為

唐志

性至孝父嘗病衣不解帶者數月父卒於丹陽

號泣奔喪煢然骨立服除

北學編三

王午冬上御文華殿命科臣舉清

官以孫承澤薦起鉉補兵部主事分守皇城

東林列傳

聞大同陷疏曰

宣大京師北門大同陷則宣府危宣府危則大事去矣請急撤回

中官專任巡撫不報

明史列傳

已而宣之迎賊者果中官杜勛也

明儒學案

京師陷痛哭急趨入朝見宮人狂奔知帝已崩解牙牌北向四拜

投金水河從者力挽之奮臂躍入死

通鑑輯覽

一百十六賊踞大內月餘始

去金水河冠袍泛泛見水上內官羣指之曰此金兵部也弟鏞辨

其屍驗網巾環得鉉首歸合以木身如禮而殮事竣自經

明史列傳

初鉉巡視每過御河輒流連不能去卒後家人簡其書籍王午晦日

讀邵子記其後曰甲申之春定我進退雖遇時外而弗內退若

苦衷遠而弗滯外止三時遠不卒歲優哉游哉庶歿無世至是而

驗鉉曾問學於葢山

明儒學案

生平訥訥然如不出口篤志力行惟義

所在則千萬人不可奪真所謂學道人歟

北學編三

著有語錄傳於世

學者稱狷菴先生

東林列傳

福王時贈太僕少卿諡忠節

明儒學案

唐志

本朝賜諡忠潔

明史列傳

王承恩字君弼順天人為司禮監秉筆太監

明儒學案

唐志

崇禎十五

年十一月壬申

大清兵分道入塞京師戒嚴命勳臣分守九門承恩督察城守

明史

莊烈帝紀上屢夢神人書一有字於其掌中覺而異之宣問朝臣眾皆

稱賀謂賊平之兆獨承恩大哭羣臣愕然上亦驚問承恩曰皇上

赦奴婢不死始敢言上曰汝無罪直言無隱承恩奏曰以奴婢推

之神人顯告我皇大明江山將失過半上詰之承恩叩首曰蓋有  
字上半截是大字少一捺下半截是明字少一日合而觀之大不  
成大明不成明殆大明缺陷之意神人示以賊寇可虞之幾願皇  
上熟思之上不懌明季北略十五十七年三月李自成犯關中命承恩提  
督京營是時事勢已去城陣守卒寥寥賊架飛梯攻西直平則德  
勝三門承恩見賊坎牆急發礮擊之連斃數人而諸璫泄泄自如  
帝召承恩令亟整內官備親征明史列傳日晡太監曹化淳啟彰義門  
賊盡入外城陷羣奄皆降明紀五十七急詔承恩入與語語密外不得  
聞頃之命酒同飲承恩泣曰受陛下深恩惟一死以報萬一帝微  
服持槍命承恩從畿輔唐志奪門不得出甲申傳信錄三是夕上不能寢內城  
陷一閫奔告上曰大營兵安在答曰大營兵散矣上即同承恩幸  
南宮登萬歲山望烽火燭天徘徊踰時回乾清宮明史紀事本末七十九天

將曙鳴鐘集百官無至者明紀五十七遂仍回南宮登萬歲山之壽皇

亭自經明史紀事本末七十九承恩縊於側明紀五十七自成得其屍殮之甲申傳信

錄三福王時諡忠愍

本朝賜地六十畝建祠立碑旌其忠葬故主陵側明史列傳

高時明永清人初名日升賜名時明十五歲入內庭熹宗朝掌內  
官監印務侍經筵講官孫承宗謂時明日民間家塾朝夕考究猶  
慮不熟今上縱聖明恭默無一問難臣下踏蹶而退何由熟也與  
若約上問某句講官通俗細解散發問難是在若等時明善之曰  
公欲致君堯舜請復午講何如格於東廠不果行時明亦求退杜  
門不出懷宗入繼大統三召就命一日御批令票擬章奏時明日  
票擬之權豈可假內官乎旨從中出萬世後有累聖德上弗聽時  
明竟日不食上為感悟詔毀批時明日皇上御批臣安敢毀上書

純忠二字賜之後因病乞休甲申之變逆闖薄都城時明預令人厝棺於東廠城陷之日正衣冠拜天辭闕大書於堂壁曰司禮監掌印太監高時明率門下李繼善等合門死節三月十九日辰時書書畢臥棺中令蓋棺李繼善等十人環泣畢縊死舉火焚堂又其徒方正化者監保定軍拒賊眾寡不敵死李憲章守城死前後守節十二人逆遁後時明徒魏國徵等拾骸骨於灰燼中葬西直門外七十里九龍山容城孫奇逢表其墓永清吳志

申湛然大興諸生與布衣黃尼麓新樂侯劉文炳駙馬鞏永固相友善四人者平居過從見時事日非相對輒潛然泣下李自成圍京師永固守皇城門文炳方在筵坐梨花樹下尼麓踉蹌入曰賊攻西直門甚急門且破府中宜早為計文炳乃急命弟文耀往託瀛國太夫人於湛然家及城破文炳永固同殉難湛然匿太夫人

甚祕為細人所發賊執湛然拷掠備至堅不言賊怒乃置湛然於木杙上壓以碾石七竅流血死終不言太夫人所在尼麓亦坎壘以死畿輔唐志七十六

劉孝子德瀆涿州人鴻臚寺鳴贊劉源汴子甲申傳信錄七以監生入國

子監涿州吳志流賊破京師按京朝官及選人諸籍悉名索之或走或

徙指蹤株引必獲而後已連繫毒笞以責貢獻號曰追賊又謂之

淘物或立斃或賂而免或受其賂而又殺之方是時源汴名亦在

索中德瀆匿源汴他所而身自詣賊曰劉鳴贊即我是也賊拷責

數百德瀆默無言久之度父已遠去乃奮起叱咤罵賊賊怒杖殺

之而源汴竟行遯沒齒不出錢儀吉涿州劉孝子傳

史可法字憲之號道鄰大興籍祥符人東林列傳世錦衣百戶祖應元舉於鄉官黃平州知州有惠政語其子從質曰我家必昌從質妻



尹氏有身夢文天祥入其舍生可法

明史聰穎異常數歲時短衣列傳

無火寒涕交頤然好誦讀受書輒求益數倍常見左光斗視學京畿一日風雪嚴寒從數騎出微行入古寺廡下一生伏案臥文方成草光斗閱畢卽解貂覆生爲掩戶叩之寺僧則可法也及試吏呼名至光斗瞿然注視呈卷卽面署第一召入使拜夫人曰吾諸兒碌碌他日繼吾志事惟此生耳可法爲人軀小貌陋不稱其衣冠語不能出口然有大志好經世方畧

東林列傳崇禎元年進士明史列傳

初授陝西西安府推官時洪承疇才畧過人在陝大得民心可法亦效之治聲日起召爲戶部雲南司主事歷員外掌戶科尋陞安池兵備道轉江西右參議兼僉事協理勦寇軍務才望益著擢都察院右僉都御史巡撫安徽廉公勤果信賞必罰將士皆爲用命提軍數與賊戰賊輒奔潰當是時史都堂之兵號稱強在軍中與

士卒同甘苦臨陣以身先之矢必死所衣布袍徧書已姓名曰戰

歿後可易識也丁父憂讀書城外素冠麻經過者不知其爲貴人

或竊聽其誦書朗朗多匡濟天下語亦不知其何書也

東林列傳服闋

起戶部右侍郎兼右僉都御史代朱大典總督漕運巡撫鳳陽淮

安揚州劾罷督糧道三人增設漕儲道一人大濬南河漕政大釐

拜南京兵部尙書參贊機務因武備久弛奏請更行八事十七年

四月朔聞賊犯闕誓師勤王渡江抵浦口聞北都旣陷縞衣發喪

明史列傳遂議立君鳳督馬士英者逆黨也主福王福王與東林有卻

欲資以傾正人翻逆案可法謂王有失德持不可而士英握重兵

與諸將深相結連營江上勢張甚諸大臣懼爲亂不敢違如士英

史外旨可法不得已乃以福王名告廟乙酉逆王於江浦丁亥百

官迎見於龍江關王素服角帶哭五月戊子朔王謁孝陵奉先殿

出居內守備府羣臣入朝王色赧欲避可法曰王毋避宜正受朝  
議戰守可法曰王宜素服郊次發師北征示天下以必報讎之義  
王唯唯明日再朝出議監國事張慎言曰國虛無人可遂卽大位  
可法曰太子存亡未卜儻南來若何劉孔昭曰今日既定誰敢復  
更可法曰徐之又明日王監國以可法爲東閣大學士入閣辦事  
通鑑輯覽可法定營制如北都故事侍衛及錦衣衛諸軍悉入伍  
一百十六操練錦衣東西兩司房及南北兩鎮撫司官不備設以杜告密安  
人心又議分江北爲四鎮明紀五復奏請設督師於揚州節制諸  
將舉朝方倚可法爲重而士英挾擁立功恣爲奸忌可法位出其  
上迫腋肘欲不得逞遂擠之因言於朝曰史公任巖疆屢建奇勳  
淮南士民仰史公盛德不啻如神明慈父今日之任舍史公其誰  
可法曰東西南北惟君所使吾豈惜頂踵私尺寸墮軍實而長仇

敵願受命去史外遂請出鎮明史既啟行卽遣使訪大行帝后梓

宮及太子二王所在明紀五奉命祭告泗鳳二陵上疏曰陛下踐

祚初祇謁孝陵哭泣盡哀道路感動若躬謁二陵親見鳳泗蓬萊  
滿目雜犬無聲當益悲憤願慎終如始處深宮廣廈則思東北諸  
陵魂魄之未安玉食大庖則思東北諸陵麥飯之無展膺圖受籙  
則思先帝之集木馭朽何以忽邁危亡早朝晏罷則念先帝之克  
儉克勤何以卒墮大業戰兢惕厲無時怠荒二祖列宗將默佑中  
興若晏處東南不思遠略賢奸無辨威斷不靈老臣投簪豪傑裹  
足祖宗怨恫天命潛移東南一隅未可保也王嘉答之名臣言行  
錄二十四

可法督師揚州也

本朝已定鼎燕京中原震疊諸將莫有固志四鎮惟黃得功忠勇  
善戰而高傑故降將又爭據揚州失人心劉澤清劉良佐輩皆養

寇自重左良玉擁兵跋扈不奉朝命可法力支危疆經營軍務外史

比  
大清兵已下邳宿飛章告士英謂人曰渠欲敘防河將士功耳慢弗省是爲

大清順治之二年正月明史興平伯高傑進兵歸德許定國方駐

睢州明紀五傑至睢州爲定國所殺部下兵大亂屠睢旁近二百

里殆盡變聞可法流涕頓足歎曰中原不可爲矣明史於是大梁

以南皆不守衛允文承馬士英指疏謂可法士英卽擢允文兵部

侍郎總督興平軍以分其權可法益不得展布明紀五四月二十

三日甲戌

大清兵渡淮如入無人之境二十四日略八可法檄諸鎮來援皆觀望不赴攻圍甚

急可法屢疏告警不應血書請援又不應外史知事不支召副將

史得威入相持大哭得威曰相國爲國殺身得威義當同死可法

曰吾爲國亡汝爲我家存吾母老矣而吾無子汝爲吾嗣以奉吾

母我不負國汝無負我得威泣拜受命可法復囑之曰吾死汝當

葬我於高皇帝之側其或不能梅花嶺可也復操筆書曰可法受

先帝恩不能雪仇恥受今上恩不能保疆土受慈母恩不能全孝

養遭時不造有志未伸一死以報國家固其分也獨恨不早從先

帝於地下耳書畢付得威乃登陴指揮諸將城西北崩兵入外史

可法拔劍自刎不死一參將擁可法出小東門遂被執可法大呼

曰我史督師也遂殺之可法爲督師行不張蓋食不重味夏不簟

冬不裘寢不解衣明史督師所至凡有技能獻書言事者闕禮賢

館廩餼之冀拔真才備緩急外史十八年四十餘無子其妻欲置妾太

息曰王事方殷敢爲兒女計乎歲除遣文牒至夜半倦索酒卮人報殺肉已分給將士無可佐者乃取鹽豉下之可法素善飲數斗不亂在軍中絕飲是夕進數十觥思先帝泣然淚下憑几臥比明將士集轅門外門不啟左右遙語其故知府任民育曰相公此夕臥不易得也命鼓人仍擊四鼓戒左右毋驚相公須臾可法寤聞鼓聲大怒曰誰犯吾令將士述民育意乃獲免嘗子處鈴閣或舟中有言宜警備者曰命在天可法死明史列傳得威旣被執乃曰我史可法子也釋之急收可法遺體而天暑衆屍皆蒸變不能辨識痛哭歸明年三月奉衣冠及笏史外招魂葬於揚州郭外之梅花嶺其後四方弄兵者多假其名號以行故時謂可法不死云明史列傳

閻應元字麗亨順天通州人崇禎中明史列傳以吏員除江南江陰縣

典史畿輔唐志十七年海賊顧三麻入黃田港應元往禦手射殺

三人賊退以功遷英德主簿道阻不赴明史列傳寓居縣之東鄉應元

爲人唐志偉軀幹面蒼黑微髭性嚴毅史外有智畧好騎射其

居東鄉也率鄉勇一千以保一鎮順治二年

本朝大兵破江甯列城皆下畿輔唐志閏六月朔諸生許用倡言守城

遠近應者數萬人典史陳明遇主兵用徽人邵康公爲將而前都

司周瑞龍泊江口相犄角戰失利

大清兵逼城下明史列傳勢危急明遇謂衆曰吾智勇不如閻君此大

事須閻君來則夜馳騎往迎應元應元投袂起率衆丁十四人夜

馳入城史外請設高皇帝位勵衆以大義衆皆哭願以死効畿輔

唐志當是時城中兵不滿千戶纔及萬又餉無所出應元至則料尺

籍治樓櫓令戶出一男子乘城餘丁傳餐發前兵備道曾化龍所

製火藥箭貯堞樓勸諭巨室令曰輸不必金出粟菽布帛及他物

者聽於是圍城中有火藥三百罌鉛丸鐵子千石他酒醅鹽鐵芻藁稱足史外二將四門分堡而守城門用大木塞斷一人守一堞如戰則兩人守之晝夜輪換十人一面小旗一銃百人一面大旗一紅衣砲初間夜兩堞一燈繼而五堞一燈初用燭照繼用油又以飯和油則風不動油不潑每堞上瓦四塊磚石一堆明季南略九部署甫定而外圍合當是時

大兵薄城下者已十萬列營百數四面圍數十重引弓仰射頗傷城上人而城上礮礮機弩乘高下

大兵殺傷頗衆乃架大礮擊城城垣裂應元命用鐵葉裹門板貫鐵緝護之取空棺實以土障潰處又攻北城北城穿下令人運一大石塊於城內更築堅壘一夜成會城中矢少應元乘月黑束藁爲人竿一燈立睥睨間而城兵士伏垣內擊鼓叫噪若將縋城砍

營者

大兵驚矢發如雨比曉獲矢無算又遣壯士夜縋城入營順風縱火軍亂自相蹂踐相殺死者數千

大兵卻離城三里止營帥劉良佐擁騎至城下呼曰吾與閻君雅故爲我語閻君欲相見應元立城上與語劉良佐者故宏光四鎮之一封廣昌伯降

本朝爲總兵者也遙語曰宏光已走江南無主君早降可保富貴應元曰某明朝一典史耳史外二死何足惜汝受朝廷封爵今日

反來侵逼汝心何心良佐慚而去明季南略九及松江破

大兵來益衆明史列傳八月望應元給錢與民賞月明季南略九令善謳者

曼聲謳之歌聲與刁斗聲相應竟三夜罷

大兵旣覘城中無降意攻愈急梯衝死士鎧冑皆鑕鐵刀鋒及之

聲鏗然鋒口爲缺礮聲徹晝夜百里內地爲之震城中死傷日積巷哭相聞應元慷慨登陴意氣自若史外二夜巡城見有睡者以箭穿耳軍令肅然二十一日明季南略九大雨如注至日中有紅光一縷起土橋直射城西俄城陷

大兵從煙焰霖雨中蜂擁而上應元率死士百人馳突巷戰者八所當殺傷以千數再奪門閉不得入度不免史外二至睢陽廟奮聲大呼自沈於溪溪淺唐志水不沒頂而劉良佐令軍中必生

致遂拽出良佐見應元至躍起持之哭應元笑曰何哭事至此有一死耳一卒持鎗刺之貫脛脛折踣地大呼速斫我不絕口遂死史外二子晞後以株連坐罪晞妻王死最烈乾隆間

賜應元諡忠烈道光十七年知州李宣範爲建專祠通州高志米壽圖字青坪宛平人唐志崇禎舉人授新鄉知縣一統志土寇來

犯督吏卒破走之斬首千二百餘級明史忠義傳治甚有聲以禦賊功

擢南京御史畿輔唐志七十六十五年四月極論監軍張若騏罪言若騏

本不諳軍旅諂附楊嗣昌遂由刑曹調職方督臣洪承疇孤軍遠

出若騏任意指揮視封疆如兒戲虛報大捷蠟光祿卿冒功罔上

恃鄉人謝陞爲內援陞奸險小人非與若騏駢斬何以慰九廟之

靈會廷臣多糾若騏遂論死陞亦除名明史忠義傳先是廷臣請練邊

兵楊嗣昌定議宣府大同山西延綏甯夏甘肅固原臨洮遼東薊

鎮保定凡練七十三萬有奇明紀五擾民特甚壽圖疏陳利害又

言往時督撫多用京卿今封疆不靖遇卿貳則爭先推督撫則引

避宜嚴加甄別內外兼補明史忠義傳劾偏沅巡撫陳睿謨廣西巡撫

林贄貪劣罪帝皆納其言一統志十七年五月明史忠義傳馬士英擁立

福王薦用阮大鍼等朝政日亂壽圖抗疏論劾出按四川畿輔唐志時

川地已爲張獻忠所據命吏部簡堪任監司守令者從壽圖西行至則與督師王應熊總督樊一蘅等聯絡諸將號召遠近漸復川南郡縣唐王立擢右僉都御史巡撫貴州

大清順治四年獻忠遺黨孫可望等陷貴陽壽圖出奔沅州十一

年沅州亦陷壽圖死之

明史忠義傳案畿輔唐志云爲定南王孔有德所執令之降不屈死之考米壽圖

以順治十一年死於沅州據東華錄云九年七月偏沅巡撫報逆賊孫可望陷廣西省城定南王孔有德自縊則是時定南王已前死久矣安有爲定南王所執不屈死之事今

據明史死於孫可望陷貴陽時較確唐志誤也

黃鼎字惟梅父俞由歛遷京師遂爲大興人鼎生數歲不與羣兒嬉戲長治六經子史唐宋諸大家之言無不博貫世方尙速化皆以通經學古爲迂黷所好顧若是初爲順天學諸生兄鼎中鄉試嫉之者謗其非士著遂業太學受知於李騰芳倪元璐月合太學諸生數百人課以古今文鼎輒居前效其文者率取上第而鼎終

不售時文震孟居政府考核天下人才元璐稱鼎將薦之朝以疾去不果劉宗周金鉉李日宣蔡懋德雅重其人與之談論文章經濟以至性命之學輒窮日夜尤務細行舉動必以禮妻孥告不足顧而笑曰吾道固如是客滄州時潰兵薄城而軍夜縋城過嚴圍犬吠聲如豹從火光中匍匐一夜走二百里抵某帥壁不爲動以計劫之圍乃得解同行八九人迨歸止一二人耳甲申客萊州聞兵變避之勞山浮海幾沒平生著述書沒海水中旣而歸省其兄弟或勸之科舉笑而不答將復往海上忽疽發於項三日死年四十九

王崇簡都門三子傳

崔子忠字青蚓一名丹字道母

王崇簡都門三子傳順天府諸生畿輔甚貧

都門三子傳好讀書尤深戴禮發爲古文詩歌博奧奇崛非近世所有

畿輔唐志督學御史左光斗奇其才置高等食餼及累試而困慨然棄

去不復應試筆門圭竇冬一褐夏一葛妻疏裳布衣黽勉操作三女讀書誦詩雖無終日之計晏如也都門三子傳先是子忠受業於宋

應登之門大興張志其弟應亨弟玠為同學應亨官吏部屬選人以干

金為子忠壽子忠笑曰若念我貧不出橐中裝餉我而使我受選

人金應亨愧謝畿輔唐志宋氏兄弟既貴為大官並不至其門平生不

修刺謁勢人當時貴人多折位願與之交皆逃避不顧都門三子傳二

三故人以文字過從談竟日不能去當天啟時閻豎魏忠賢用事

有國子生建議立祠太學約其同舍生不敢顯絕子忠教生蓬

垢病臥以免士自四方來慕其人多謝不見人或尤之笑曰交游

盛而朋黨立東漢之季可鑑也後果有以復社植黨言者其智識

過人如此工圖繪為絕技都門三子傳所作許旌陽移居圖橫幅丈餘

人物怪偉較宋龔高士開所狀鬼物略殊然寄託之情一也徵存錄十

人有欲得其畫者用金帛購之雖窮餓弗顧大興張志宋玠居諫垣數

求畫不應一日誘致邸舍子忠不得已與畫一幅出坐鄰舍使童

往取日樹石簡略尚須增潤玠與之子忠即碎畫而去史可法自

皖撫家居畿輔唐志一日過崔見其蕭然閉戶晨炊不給大興張志解所乘

馬贈之徒步而歸子忠售馬得數十金呼朋轟飲一日而盡日此

酒自史道鄰來非盜泉也畿輔唐志為人短小端飭雙目炯炯高冠草

履蕭然若在世外董其昌嘗謂其人文畫皆非世所常見年五十

病幾廢無何遭寇難都門三子傳潛避窮巷無以給朝夕有憐之而不

以禮者去而不就竟以餓死大興張志

王嘉猷順義人父孝先早喪母杜氏居孀嘉猷竭力耕耘以養其

母母素懼雷聲嘉猷夫婦每遇陰雨閉戶共侍於其側而母心始

甯凡遇陰期雖官差急務亦未嘗不舍而歸家以省其母也迨其



母歿葬於本縣龍王山側嘉猷因而言曰母在懼雷今母在野其靈豈無懼乎儻有陰雨誰其事之誰其衛之遂為廬墓計鄉親屢阻之竟莫奪其志乃棄家築室於墓右獨居之日擔土數擔以固其墓取薪於山汲水於河年餘墓前涌一泉其水甚甘始免遠汲之勞人僉傳為孝之所感云

順義黃志 按嘉猷未知何時人因與晉孝子王良廬母墓護雷事相類

又與蜀旌陽漢孝子姜詩孝感涌泉同瑞故附錄於此

曹孝子廣據字蘊菴大興人父國柄兵部左侍郎以廕補國子生孝子生而穎異稍長就塾師學輒日記累千言因旁通經史諸家之書性簡遠以盡倫為己志先是從父觀察嶺南舟過鄱陽風濤掀涌人為色危孝子則安坐誦讀自若年弱冠則就楊商賢講求性命之學制藝力宗先正手錄陳羅章艾之文以為模楷無何母病餌藥少効馴至陸困孝子旁皇失措悲嘔慘號心計所以救母

非鬻母遺體以進弗瘳也父憫其狀微言解慰之泣曰母儻不諱兒何獨生乃陰割股肉烹炙之舉以進母母食之疾霍然頓愈孝子大悅作止如常若無痛楚者祕其事不令人知家人亦無知之者越二旬後驟感風疾獨隱而不言醫者亂投藥劑以致不起其父母及妻妹弟輩推明厥故環泣籲天而終不可救遂歿年二十有五然孝子雖至疾困了弗為意易贊時父問以意作何光景但指天指心曰胸中一團天理又曰死生之際殆難言之且自咎不孝囑薄葬示罰並念及骨肉師傅諸語皆不亂類有道人真能解脫者

顧如華曹孝子傳

顧仲禮保定人幼孤事母孝洪武中蝗起仲禮行田間泣曰食吾苗何以養母俄疾風吹蝗去母歿仲禮年已六十廬墓三載

一統志

楊小兒永清人性至孝母病小兒剖肋下肉一片妻周氏亦剖臂

肉煎湯以進母病痊洪武中旌表

畿輔唐志八十八

杜輔薊州人父老且瞽

永樂初遼東兵攻陷薊州輔卽舍其妻負父而逃事平而回其妻

亦克保其身而歸

薊州沈志

張法保大興人永樂中爲金吾衛總旗祖

母病刲股煮汁以進獲痊後復病刲臂肉療之亦愈擢尙寶丞

唐志

楊景薊州衛百戶其父以文守禦崖口失機論死景陳情請

以身代父得免

薊州沈志

周尙文東安人父目瞽以舌舐之復明後爲

樂昌訓導母喪歸葬廬於墓盜不敢犯

一統志

時值淫潦羣蛙墳墓

旁甚厭苦之曰何爲驚擾吾母明日蛙皆徙去

東安李志

成化中旌表

畿輔唐志八十八

張廣薊州人父病篤醫者言必得人肝和藥以進乃可愈

廣遂引刀剖腹割肝和藥與父服之病卽愈廣亦復生人皆以爲

神異

薊州沈志

祝綸大城人父犯罪論死綸堅請以身代遂繫獄妻張

氏訴願代夫死當事義之量減綸罪又有大城廩生陳霖父敬歿

哀毀骨立時值土賊之變人皆逃避霖獨守墓不去盜稱其孝而

遺之金帛又值境內大水霖守墓水止墓旁不沒人以爲至孝所

感

大城張志

李秀薊州人父病祕結秀吮腸得通其兄無後遺產毫不

自私以之盡周貧族客有遺金全緘還之子二人皆成進士

薊州沈志

張坤永清人嘉靖中父麒被誣死於戍坤幼甚痛父寃與弟訥相

對泣及長母歿遂棄家觸冒煙瘴卒尋父骸肩負以歸與母合葬

焉

畿輔唐志八十八

袁璽寶坻人少孤事母孝娶王氏亦賢曲如璽意母患

痿痺夫婦朝夕侍側宛轉牀榻者十八年一日夫婦往場穫麥遺

米籬內雞豕踐食之母連叱不動忽下牀驅之步履如故迄百歲

乃卒又寶坻生員楊一訓嘉靖二十四年值兵變其母被執一訓

疾呼奔援力與賊格鬪賊殺之其母遂得脫按院以聞詔旌之

寶坻志

沈吳端御字宜僕宛平人

畿輔唐志八十八

文思秀壯家貧屢試見斥遂絕

意進取買田於百花陀事母至孝母病冬月思甘蔗端御日夜涕泣求之大興張志忽於山谷中得蔗數本奉母遂愈人以爲孝感所著有織絢堂集畿輔唐志八十歐俊薊州人父早歿繼母邵氏性最嚴俊得其懽心母病爲母嘗糞改藥能痊後母亡遺子倫信俱幼俊友愛甚篤延名師教之倫及信皆登仕薊州沈志裴成錦永清人幼孤不識父而聞母言輒涕泣歲時伏臘必詣父墓哭奠母歿亦如之終其身畿輔唐志八十芮圖南寶坻廩生明末兵燹時不暇顧妻子急負母王氏出走遇一兵被執不屈死之妻王氏聞姑與夫俱死遂挈一子一女投於水寶坻洪志劉緋永清人崇禎丙子城陷父被執緋哀懇求以身代敵感其誠俱捨之畿輔唐志八十芮國大寶坻人廩生昌齡子明末時闖賊入京師國大隨其父避難國大恐父被執冒鋒願以身代死之父因得免寶坻洪志洪武時則有北平東安王重昌平劉驢兒

永樂間則有大興王萬僧奴明史列傳三河滑忠三河陳志密雲成仁密雲薛志永清趙昇畿輔唐志八十天順間則有宛平龔然勝永清賈懋成化間則有神機營指揮方榮一統志作大興人順天舉人萬盛武清柳芳宏治間則有大興錢福宛平序班夏琮薊州孟振明史列傳正德間則有大興劉懷義通州左衛總旗孫雄明史列傳昌平侯顯一統志永清右衛穆宏嘉靖間則有通州歲貢生河南桐柏縣知縣呂棟通州高志涿州舉人邳州知州潘滋涿州吳志隆慶間則有大興李彪萬曆間則有通州武生苗必進通州高志天啟間則有寶坻芮浩張改寶坻洪志崇禎間則有通州庠生楊定午通州高志寶坻薄敦復生員苑景瑞寶坻洪志香河崔光業畿輔唐志八十又有薊州李致中李致和薊州沈志三河增廣生劉芳廩生李棟三河陳志寶坻生員劉達寶坻洪志東安劉學光東安李志文安紀于蕃紀述邢瀾貢生李邦彥庠生周嵩文安楊志固安庫天才固安陳志大興張銳大興

張皆以孝行旌其門又有通州龍踏馬昇潘應科通州高志良鄉魏寔

朱錦良鄉楊志香河宋琰田迎庠生楊鶚香河劉志三河誼于芳工部員外

郎李瑄妻張氏三河陳志東安魏邦才東安李志固安張墳齊綱固安陳志密雲

舉人安徽石埭知縣孔廷謨密雲薛志大城生員郭釗王潤王夢麒大城張志

張薊州敦本貢生山西平定知州李誌薊州沈志寶坻陳英寶坻洪志平谷

歲貢生山東齊河縣訓導王鼎平谷米志俱以孝行稱

程惟遠香河人父璋潞安廣文以文學稱惟遠樸茂負直節慷慨

好施與里中義舉無巨細皆與焉親故不贍者周之雖更貸必應

無吝色眾詫曰人負我緩不責償幸矣復爾爾得無過乎惟遠曰

彼急難不復告我我挾而難之不忍也疾革諭後人曰我生無他

長惟周急一節爾輩毋違遺訓盡焚所負券而歿香河劉志趙允昌涿

州人家貧以驢雇騎為生計有鬻妻妓家者給以歸甯雇昌驢行

數里其妻覺有變自顛下墜窘甚昌慰勸之入京投報國寺遇干

總洪宇告之故遂贖金如所鬻數贖之又賣妻為人妾者其人妻

極悍昌邀諸生王宅中等贖金贖之歸其夫涿州吳志武金曹璉張欽

皆灤縣庠生正統十四年英宗北狩也先以之去嗣遣使送還京

師震恐召募勇敢士三人素有義行憤然曰何至被敵侮若是遂

應募也先使至都門恣意悉索三人勇拒之使恐乃馳去贈三人

國子生後金官處州府知府璉官撫州府知府欽官前軍都督府

都事通州高志案明正德時趙伋字季賓涿州人性耿直初游

國學祭酒徐階憫其貧使參司崇文門稅務伋曰伋固貧饔飧猶

能自給如某生者貧甚請讓若階義之聞於上上命監中作樂三

日以宣其賢仍勒石紀其事後官絳縣主簿以廉介著涿州吳志郝勳

字孟立涿州人舉嘉靖丁酉鄉試以母老躬耕奉養不赴銓選及

母歿廬墓三年不至私室修族譜立譜訓以教親遜族人化之共  
爨者不析各爨者復合同居至二百餘口一時稱為義門畿輔唐志八十八

劉萬里密雲人廩生嘉靖二十九年兵變友人聶鏞全家遇害僅

存幼子緒萬里收養之教之讀書補弟子員乃為授室萬曆六年

祀鄉賢密雲薛志郝永清人服田為業性誠樸自奉儉約好施與歲

饑託為貿易以訪貧民周以衣食有被德而莫知其姓字者問之

則飄然去其厚德類如此永清吳志余之祥字鳳梧宛平人畿輔唐志八十八

性剛方於書無所不讀大興張志父仕彰德教授雅慕山游祥備肩輿

飭具竭力以娛父心兄歿躬親殯殮學使校士漁陽已及期親友

促之去不聽畿輔唐志八十八竟因兄喪過勞感暑疾而卒大興張志著有易統

旨詩經宗旨四書宗旨要言其妻陳氏孀居四十五年壽八十八宛平

米志郝雙保涿州人兄以旅店為業有解妖賊者宿其家賊夜逸去

兄坐罪論死雙保時年十三請以身代遂棄市兄收葬之其後裔

為立碑云義祖郝雙保墓涿州吳志馬奇薊州生員學問賅博與兄章

友愛甚篤章有疾奇親供藥餌昏夜不寢告天願損已壽益其兄

及章亡奇哭之喪明而終薊州沈志褚時中通州庠生性剛直尚氣節

萬曆間州試多冒籍時中呈於當事請查禁知州銜之以他事羅

織時中戍死御史馬經綸日時中義士也以無辜戍戌且死故築

虛墓招魂以葬並表其墓石通州高志康永錫字荷九父西泉由廣甯

衛移徙通州世襲通州衛指揮永錫誠謹醇厚有善行中年未舉

子崇禎五年置妾孟氏詢其有故夫以貧而鬻立遣還之未幾生

子二長莊順治十一年舉人官兵部主事次政康熙十一年拔貢

生官隆平教諭通州高志韓惟城通州庠生性耿介無絲毫苟取崇禎

間巡檢差役解官項入京遺公卿及所齎銀雜城得於渡所候其

來覓役果涕泣奔至訊實還之役得免罪通州高志朱光祚涿州人闖賊破京師賊衆入涿括富室金拷掠慘酷光祚與兄延祚糾義勇士王樂善張應斗等畫灰密計推諸生朱萬祺爲首衷甲厲兵而出遇賊黨李書吏者拔刀直前斫之急趨賊所斃其類無遺率衆登陴固守會闖賊薄城下張應斗發西洋礮中賊黃蓋闖賊驚墜馬怒甚誓破城必盡屠之而

大清兵追至賊奔散涿州得全涿州吳志王政行字次泉昌平州人崇禎中官守備里居甲申三月莊烈帝后既殉社稷梓宮暴露僞符下州令葬時州皆僞官庫藏如洗政行與署吏目省祭官趙一桂及監生白紳庠生孫繁祉義士劉汝樸王汝樸徐魁李某鄧科趙永健劉應元楊道等十人各傾資得錢三百五十千啟田妃壙宮奉安帝后以妃槨爲帝槨出募西山口居民擔筐舁土築塚修垣

復率鄉耆奠祭悲號聲震陵谷畿輔唐志八十八其同居敦睦者則成化間

霸州秦貴七世同居密雲宏治間密雲李瑀明史孝義傳舉人光祿寺典簿

李機五世同居密雲大城李大任五世同居大城張志皆旌曰義門定

邊衛韓鵬六世同居明史孝義傳涿州楊誠八世同居又有涿州張增

七世同居宋五六世同居鄉人均稱爲義門云涿州吳志其同懷義讓

者則有涿州貢生鄭安涿州吳志其鞠養遺孤者則有嘉靖間平谷張

景春平谷朱志涿州楊尙信涿州吳志崇禎間通州諸生吳承錫通州高志皆以

義稱其輸財助官賑濟者則有正統間通州耿從通州高志天順間涿

州顧眞正德間涿州楊謙涿州吳志萬厯間順義楊惟孝明史孝義傳密雲

王倉王度劉啟元劉士登劉自仁蔡士迎鄭守卿張元度諸生薛

天培密雲薛志其施德好義者則有嘉靖間平谷王英平谷朱志天啟間通

州工部文思院副使王可成工部郎中董中行通州高志涿州陳佐李

光代涿州香河庠生李維新張應捷香河薊州姚鎮雄賈鉞劉淮

王時可貢生孫育豪生員賈國賓薊州固安劉九功固安

張銓別號衡宇良鄉人性孝友蚤失怙恃事諸兄嫂如父母諸兄

歿撫姪猶子及孫曾同居如故宗族鄉黨無間言自奉至儉素而

於恤孤濟難助婚殯死諸事則罔不竭力厚施甲子歲里胥張姓

者有負於官至賣妾鬻子償之銓代為完納使得復聚而絕口不

道若惟恐人知者丙子兵變有甯得城郭世松等誤拾軍營遺牛

兵官視為奇貨所求不遂將殺之銓出資以贖其死戊寅兵馬雲

集食不克給銓出穀五百石草三萬束有司列之奏章得旨給敘

庚辰歲凶人相食銓煮粥賑之王無咎張公以存活者不可勝計

遣人收拾遺骸作大壙數處理之後連歲被兵得脫皆有天幸嘗

遇亂兵夾道弗之見值盜勒馬向之百方不前乃免又山行失足

臨萬仞溪適一石橫出應手援挽而留人以爲厚德所致良鄉甲

申

大清定鼎有司重銓德望數行徵聘銓力辭不就曰堯舜在上亟

宜攀鱗附翼奈暮年善病得爲太平民足矣墓志子錫卿字調鼎

恩貢生甲申之變適他出聞寇掠人比餽痛心曰吾家有素封之

名吾父定羅其毒急歸省視果然慨然曰吾父七十老叟何堪逮

問我願以身代之及受刑夾木折繩絕終無怨言久之乃釋良鄉

次調鼎舉賢良謁選山東陽信縣令銓勉之曰忠君愛民此日將

見之行事矣壬午冬陽信不守殉之訃至銓曰吾兒忠君報國得

死所矣既奉旨褒卹贈如其官墓志

樊夢斗字北一號文成文安人高祖瑀成化甲辰進士筮仕浙川

令爲刑部曹郎日逆瑾用事平反主事安奎獄面折瑾因忤旨酷

暑晚正陽門三日會瑾敗轉四川順慶府知府稱名臣夢斗少穎  
敏年十二補博士弟子員於書無所不讀著中庸講義原性道究  
天人精義洞徹桐城左光斗見之曰此洙泗真傳也崇禎七年鄉  
貢廷試第二人時國家孔棘自以累世受君恩且才可濟時上書  
闕廷請為國家効力封疆奉旨報可將授職矣無何以內艱歸慟  
哭出都門跣行三百里至京舉人王膺其姪壻也殉寇難遺孤呱  
呱夢斗收養之使與子翰同寢食學同師姊貧無倚生死周恤不  
遺餘力論者以為內行純篤彷彿陽亢宗云邑中築城濬河復役  
鹽鐵諸大議人所畏憚不敢言者輒言之鑿鑿可見諸行事其屯  
海八議侍御吳某稱為經國碩畫將上之朝會亂不果甲申之變  
俯仰唏噓遂絕意仕進攜家入桐柏山中偕二三老友攀枯藤捫  
蒼壁翠屏玉女龍潭石門號淮源勝地無不窮極幽絕詩成放歌

呼白慨然有超世之概病中遺命子翰曰死即葬我山中百歲後  
樵採茲土者指某山某水為隱君樊某游釣賦詩處足矣所著有

駐槎亭詩集

湯斌樊  
文成傳

楊潔號蓮修先世固安人流寓永清遂家焉父官閩中潔為閩產  
父卒數歲始自閩歸途次遇湖山勝境輒吟嘯流連人擬之鐵崖  
子歸後廬舍田園悉為族黨侵蝕潔介然不與爭寄食戚舊日以  
詩畫自娛晚歲構草草堂數椽僅蔽風雨潔處之泊如也永清  
進士劉詩橋為草堂歌以紀之永清周志齊汝漢字冲字涿州人居家  
孝友不願仕進嘗築別墅於房山之東郭外竹石花草皆手自位  
置性尤愛菊以晚節自名其園後以壽終涿州吳志王業隆字居敬永  
清人庠生當明末造作忠烈攷二卷上自帝后下及甲申殉難諸  
臣參考羣籍各繫以詩多掩抑悲涼之作餘詩八卷蟲魚剝蝕不





